

ASO TOFI, 23 JANUARI 2020

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: Ou te faasilasila atu ua amatalia nei taualumaga a le Fono Aoao Faitulafono. Ou te faatalofa ma ou avatu le faamalo i le paia maualuga o le Palemene, malo le onosai. E ui lava ina faaaaogagase le tatou galuega i le Fono anapo, ae faalagolago ma faamoemoe i le Atua e aumaia le malosi e faaaauau ai lo tatou valaauiina.

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono, e tusa ai ma T.T.49(2).

1. P.P.2019/2020 Nu.155, Lipoti Faaleausaga a le Faalapotopotoga o le Malosi Faaeletise i le tausaga faaletupe 2018/2019.

TULAFONO TAU FAAOFI O LE FAATATAUINA O TUPE FAAOPOOPO (NU.1) 2019/2020 – felafolafoaiga faaaauau i luga o le faitauga faalua – Aso 3

FOFOGA FETALAI: E tolopo Galuega a le Fono Aoao i le po anapo ua maea le saunoaga faalauaitele a le sui usufono i le Tulafono Tau Faaofi o le Faatatauina o Tupe Nu.1. Ia ua maea foi ona saunoa le Afioga i le Palemia i nisi o mea e ao ona faamalamalama mo le silafia e le Maota, aemaise foi o le faafofoga tapuai mai a Samoa.

O lea ua saunoa o le a faagaso le tali a afioga i le Kapaneta. O le avanoa lenei ou te tapa ai le Afioga i le Minisita mo Fesootaiga, Faamatalaga ma Fesootaiga Vavave Faaneionapo e tulai mai e saunoa e talifuaitau i mea sa laga e sui usufono mamalu o le tatou Palemene.

Afioga Hon AFAMASAGA LEPUIAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo): Faafetai i lau Afioga i le Fofoga Fetalai. Ua tala mai e le lagi le mamalu o

le Atua i lenei taeao ua faapea foi ona faaalia e le vanimonimo galuega mana a ona aao. O lea ua sila saaga lupe o le taeao, taeao manino ma le taeao totoa. A o le a sa outou silasila i le alofa o le Atua ia Samoa i le oso ae o le la o le amiontonu i lenei taeao? O le faailoga vaaia o le alofa o le Atua o lo o tatou tapuai i ai, o le Atua le Tama, le Atua le Alo ma le Atua le Agaga Paia. O le mea lea ou te valaau atu ai i le paia o le Maota nei, aumai se pati tele e viia ai le Atua.

Ou te muamua ona ou faapoi faaalofisa o tupu nai le vavau nai Mulinuu ma Nuuausala, ma ou faatulou i paia siliilagi ma mamalu suluipapa o le paia o le Maota nei, ae tainane foi le faafogafoga ma le maimoa tapuai mai a Samoa i ona tafa e fia, mai lava i le fatifatialuga o le tai samasama o le Tuimanua seja paia le taitoa le ulaula o Nafanua o le tai ma le malae na saili i ai Malo. Tau ia ina ou faapea atu, tulou, tulou, tulouna lava.

Ae ou te le i utufia foi le mataiva o le vai gagana sa faapena ona momoo i ai le tamaitai o le Alataua aua se tali atu i manaoga ma finagalo faaalia o le paia o le Maota nei i atinae a le Malo i le matou matafaioi, e muamua ona ou faatalofa atu i lenei taeao i le alafai mai i faguga lelei o lau afioga i le Fofoga Fetalai, ae tainane foi le afio o le Afioga i le Palemia ma le paia o le Kapeneta nei, Afioga i Minisita Lagolago ae tainane le lavaloa ma le paia o sui usufono mamalu o le Fonousu a Samoa ae faapena foi le malosi o le Malo i Afioga i Ofisa Sili o Pulega o Matagaluega ma Faalapotopotoga Tumaoti o i latou e lagolago ma le paia o le aufaigaluega a le Malo aemaise foi lau Afioga i le Failautusi o le Fono nei ma le aufaigaluega i lenei taeao.

E faatalofa atu foi i le paia o lou itumalo ua mafai ona faafogafoga mai i lenei taeao i le Fonousu a Samoa. Sa matou faitau lava galu ma faapena ona matou matau ma le totoa a o outou filitupetua i le momoli mai o le tofa faapea foi se finagalo i itumalo taitasi aua atinae a le tatou atunuu. O le mea lea, o lea ua uma ona outou faafogafoga i le po anapo ua fofola le fala o le Malo i lana tali atu i le tanoa faalele a le Afioga i le Palemia e tamua ai sa matou tali atu i manaoga ma finagalo faaalia a o se tuualalo foi mo le Malo i ana atinae aua le agai i luma o lenei foi tausaga o galuega. O le mea lea o le a taualauta ai sa matou faamatalaga, e le toe tele tau lava ina matou tali sao atu i manaoga ma tulaga na momoli mai aua le atinae o tulaga uma faatekonolosi ma tulaga o fesootaiga i totonu o le atunuu.

E lua lava itu taua sa faapea ona momoli mai i finagalo o tulaga tau fesootaiga telefoni, ae le gata i lea o fesootaiga i luga o le tatou digital TV ua maea ona faatulaga ma ua amatalia.

O le tulaga i telefoni, e moni lava o outou finagalo. E i ai itu o le atunuu e le i faapena ona faasopolia i telefoni. O le mea e aupito sili ai ona lelei la matou faalogologo, e i ai vaega o lo o pe ai le Bluesky ae i ai vaega o lo o ola ai le Digicel, pe pe foi le Digicel ae o lo o ola ai le Bluesky. Ou te faamalulu atu i sui usufono sa faapena ona laga ia tulaga. Ua oo atu i le \$50 miliona tupe faaalu a nei kamupani talu ona taunuu mai le tatou cable

lea o le Tuisamoia i le taumafaiga o le toe suiga o le initaneti, ma ina ua toe sui le vave ma le lelei o le fesootaiga i initaneti, sa manaomia foi e toe fesuiai atoa le tulaga i coupon ma masini o lo o faaaogaina aua fesootaiga. E pei o le ala lea na mafua ai ona faateletelegese pea. Ae ou te tau atu i le agaga faamaomi, o le molimau a nei kamupani ma le tali mai, o lo o faaauau pea a latou galuega, o le toe fesuiaiga ma le toe faaleleia o le tulaga tau telefoni feaveai ma le tulaga tau fesootaiga i telefoni, i so o se itu lava o le atunuu. E pei ona outou matau mai, o pisinisi e faapena lava ona fuafua i tupe maua. O le ala lea o le faateletelegese, ona e laitiiti le fuainumera o si o tatou atunuu a o le lava e taumafai ina ia faapena ona faasopolia a o le i maea lenei tausaga.

O le tulaga i le digital TV a tatou ua faagasolo, e moni finagalo faaalia o sui usufono. O i latou sa faapena ona oo i ai saunoaga i lea tulaga, e le i oo atu i ai le tatou TV i le taimi nei. O le vaega muamua ua faapena ona amatalia, e mai le afioaga o Vailele seia paia le afioaga o Fagamalo i le la itu ma le afioaga o Taga i le isi itu. Ae i ai lava itu o lo o faapena ona maua ai pea i le taimi nei, e ui e le o le naunautaiga lea na i ai, a o le faamoemoe ua i ai le vaega lona lua o le tatou TV e faasopolia ai le 95% o le atunuu o le itu lea o lo o faamoemoe ina ia faapena ona faamaeaina i le faaiuga o lenei masina. Ae peitai o lo outou silasila pea i le louloua o le tau, e pei o itu ia o lo o faigata ai ona sopoia auala e agai atu i pou faasalalau. O le mea lea e talosaga atu ai ma le faaaloalo ina ia faapena ona lavapapale. E ui foi ina faapena ona outou vaaia le la i le taeao nei, ae seiloga lava pe lua ni vaiaso o la faalausosoo ona faatoa mafai lea ona toe ala taavale i luga o pou ma faatinonia nei galuega. A maea loa le 95% lea o le atunuu, ona totoe ai lea o nai vaega e tau o grey areas o lo o faapena ona manaomia e toe faataunu atu i ai le galuega. O le vaega la lea o le galuega ua i ai le faamoemoe o le masina o Mati ona faapena lea ona faasopolia le tatou atunuu atoa pe afai e tumau pea le lelei o le tau. O le mea lea ou te tatalo atu ai ina ia faapena ona outou onosaia, a o lenei lava taimi o lo o ola pea le TV masani, analogue. O le digital TV, o lo o faagasolo i le taimi lenei le Ofisa o le Pule Faatonu, o lo o faagasolo atu ma pusa. A faapea o lau TV o le TV tuai, ia o lena e i ai pusa ia e faatau i le Samoa Stationaries faapea foi ma le Bluebird ma nisi o faleoloa i le taulaga e \$55 ua faapau i ai e le Malo ina ia faapena ona agavaa ma faigofie i le mamalu o le atunuu ona faatau. O le pusa la lea e faapipii i ai le antenna ona faapipii lea o le pusa agai i le TV ona ola loa lea o lau Digital TV. Ae ua faapena ona faagasolo atu i tua aoaoga, o lo o outou silasila foi i luga o TV ma faasalalauga i lenei taimi, o lo o faapena ona momoli atu ai le faatinoina o le faapipiina o nei pusa ia mo le faigofie mo le mamalu o le atunuu. Ia o le faamoemoe la lena, e oo atu i le faaiuga o Mati po o le faaiuga o le masina o Aperila ua faasopolia le tatou atunuu i lenei faasalalauga o le tatou TV fou. O le taimi lava e faapena ona faasopolia atoa le atunuu ona tape loa lea o le tatou faasalalauga tuai. Ia le paia e o le Maota aemaise foi o lele faafogafoga mai

Samoa, o le taimi la lenei e faatau ai lau pusa ina ia faapena ona mafai ona e maimoa ai i le TV, ua le gata ina manino a ua tutusa lelei faasalalauga a televise taitasi, ala televise uma i totolu o lou maota ma lau silasila, e manino uma. Afai foi e i ai se fesoasoani e manaomia, o lo o tatala pea le Ofisa o le Pule Faatonu e faapea foi le Ofisa o Fesootaiga ina ia faafesootai mai. O le taimi lenei, toe pau lava televise e le o i luga o le tatou digital platform, o le TV1 ma le TV3. Sa i ai i luga o le TV1, ae peitai ua toe tuuina ese mo le taimi nei seja toe faaatoatoa ona ua matauina e i ai nisi itu e manaomia e faaleleia ona faapena lea ona toe agai mai i luga o le digital platform. A o lo o ola pea le latou analogue i le taimi nei. E faapea foi le TV3, e le i taunu mai a latou masini e faapena ona faapipii ai i totolu, ae o lo o ola pea foi le latou faasalalauga i le alaleo tuai. A o isi TV uma lava a le tatou Malo e pei ona masani ai, o lo o e maimoa ai i le taimi nei i luga o le tatou digital TV.

O nisi o finagalo faaalia sa faapena ona agai i le tatou Samoa National Broadband, o le ala o fesootaiga a le Malo ua leva ona faataatia mai i le 2014. E moni finagalo faaalia. Ma o le mea moni foi ou te tau atu, ua amata ona faaaogaina, o lo o faaaogaina e nisi o Matagaluega a le Malo i le taimi lenei le tatou ala o fesootaiga aua le faatinoina o galuega, ae le o Matagaluega uma foi a le Malo. Ua faatulagaina nei le digital transformation a le Malo e lavea ai i totolu le digitise ina o services uma aua le faafaigofieina o le auaunaga mo le atunu. O lo o tuu foi i totolu ma le tatou E-health programme o lea sa faapena ona lagalaga e sui usufono ina ia tuu ai i luga o le Samoa national Broadband le auaunaga a le falemai o lea ua amata ona agai i ai le Malo. E faapena foi le tatou Nationa ID ma le taumafai uma ia liliu uma le auaunaga a le Malo mai le tulaga o lo o i ai nei le faaaogaina o pepa ina ia digitize ma service ia faafaigofie mo le mamalu o le atunu. Po o fea lava e te i ai o le atunu o le a mafai ai ona faatinoina mai galuega ma lou manaoga i auaunaga nei a le Malo.

O le isi tulaga taua sa laga, o le tulaga lea i a tatou faasalalauga i luga o le social media. E moni outou finagalo faaalia, ma ua matauina foi i le tulaga o lo o i ai nei le faaaogaina o gagana le talafeagai ma faasalalauga e le tusa ai ma tatou tu ma aganuu i luga o internet. Peitai, e le na o Samoa o lo o faapena ona afaina i lea tulaga, o le lalolagi atoa e oo lava i Amerika, o Saina, o Rusia, o se faafitauli tele lea i nei atunu, e oo lava i nai atunu uma o le Pasifik. Ae mo tatou lava ia i Samoa, o lo o faaauau pea ona faia aoaoga, faaauau pea le faaalu i tua o faasalalauga mo le silafia e le atunu o tulaga uma e tatau ona puipuia ai ia tulaga uma, ae o lo o taumafai pea foi le Malo ina ia fesootai ma kamupani tetele nei. O lo o i ai fesootaiga o lo o mafai ona i ai nei aemaise o le tatou Ofisa o le Loia Sili ma le Ofisa o Leoleo e ala i le Tulafono. Ma afai sa outou matauina i le taimi o le misela, na i ai faasalalauga na alu alu tou te le toe vaai i ai, aemaise lava i ata. Na faigofie ona tuu i lalo faasalalauga nei ina ua tusi atu le Ofisa o le Loia Sili i le facebook ma nisi o social media platforms ona tuu lea i lalo aua o lea e

tilotilo ma silasila i ata ona faigofie lea ona latou iloa ma faamautuina le sao o le tulaga o lo o faapea ona tatou molia atu.

E le gata i lea, o le itu lea o lo o faafaigata ai tele i kamupani tetele nei ona agai mai so latou finagalo i tulaga uma o lo o tatou momoli atu ona o le gagana, ma ua latou silasila ina ia faapena ona faafaigaluega tagata e faaliliu i totonu o latou kamupani ina ia faafaigofie ai ona silasila i tulaga uma e pei ona tatou avatu. Ae le o malolo le Malo i nei tulaga uma o lo o faapena ona tusi pea ma tusi pea, o lo o galulue faatasi le Ofisa o Leoleo, o le Ofisa o Fesootaiga aemaise o le Ofisa o le Loia Sili, o i latou ia o lo o fai ma fofoga o le Malo ma fesootaiga a le Malo i totonu o kamupani tetele nei, tusi atu tusi mai. O lea foi na outou silasila nei i tulaga o faamasinoga talu ai nei o molia ai nisi o le atunuu mai fafo, le tama o itupopo ma le isi tama, o mafuaaga na ona o lo o fesootai pea tatou ma kamupani nei. E le gata i lea, ua i ai foi Tulafono ua maea ona faatulaga e le Malo i le tausaga lea na tea na pasia ai le tatou Tulafono o le Criminal Liable Law, o i ina i le Tulafono lena ua e agavaa ai e molia so o se tagata e faia ma lafaina ni upu matuia ma ni upu le talafeagai ma faaleaga oe i luga o le social media, facebook po o le a lava, ma agavaa ai e mafai ona molia i lalo o lea Tulafono i le Faamasinoga. O lo o i ai foi le Tulafono a le Malo lea na faataga na mafai ai ona molia i latou ia sa faapena ona lafo ma faia nisi o tulaga le talafeagai i le Palemia. O lea la ua i ai Tulafono a le Malo ua faataatitia mo tulaga uma, a o lo o faaaauau pea ona tatou galulue ina ia faapena ona atinae aua o lea ua agai ai nei le atinae o le internet, ia, e tatou te puipui atu i i ae faapena ona malama atu le taeao a taeao ua ese foi le itu ua agai i ai. O itu uma ia, e le gata ina tatou galulue faatasi ai ma i latou o nei kamupani, a ua i ai foi Tulafono faataatitia ina ia resitala kamupani nei i totonu o le atunuu.

O lo o galulue le Ofisa o le Law Reform po o le Ofisa o le Toefuataiga o Tulafono po o le Ofisa o le Loia Sili ina ia faatulaga Tulafono ina ia mafai ai ona aumai kamupani nei, social media, facebook, google, twitter, instagram ma isi mea uma ina ia resitala i totonu i inei ina ia agavaa ai tatou e molia kamupani nei ina ia faapena ona faatulaga ma faafaigofie ai le tatou galuega. Ae paga lea, e faigata tele ona tilotilo mai kamupani tetele nei ona o le laitiiti o le tatou atunuu, o le mea lea o lo o taumafai ai le Pasefika ma le Asosi o IT i totonu o le Pasefika aemaise i matou o Minisita uma o Fesootaiga i le Pasefika, ina ia tutu faatasi tatou, ona le alu lea na o le 200,000 a Samoa ae faapena ona malaga faatasi le 10miliona po o le sili atu foi o le tatou Pasefika atoa e momoli le mau ona faafaigofie ai lea ona tatou maua le lagona ma tilotilo mai kamupani tetele nei ia tatou.

Ua i ai le fuafuaga a le malo ua faataatia ma ua faatau foi le masini e tauala mai i le fesoasoani a Malo Aufaatasi ina ia faapena ona faaaogaina loa le tatou Samoa National Broadband aua le tulaga i totonu o falemai. Sa outou silasila a o feagai ai tatou ma le faamai o le misela i se tasi o faataitaiga sa fai mai i le falemai i Safotu, sa saunoa mai ai le Afioga i le

Palemia i le falemai i Motootua ma vaaia ai, na o le pau lava le tulaga e i ai i le taimi nei, na o le faatulaga atu o se fomai i totonu o Motootua ae faaaaoga luga o le laina o le Samoa Broadband e fai ai le consultation ma faatonutonu atu ai i fomai o lo o i tua le faiga o le togafitiga o mai. O le ala lea o lo o galulue faatasi i le taimi nei le tatou Ofisa o Fesootaiga ma le Ofisa o le Soifua Maloloina aemaise o le tatou asosi o IT a Samoa ua toe faatulaga ina ia faatino loa lea faamoemoe i se taimi vave. E faafetai atu ai i le Afioga i le Minisita mo le Soifua Maloloina mo le faatagaina o lea tulaga ina ia faamamaavega i le mamalu o le atunuu. O lona uiga la pe faatasi ona taamilo atu le fomai i tua i falemai itumalo uma, o le a faapena la ona i ai lava le fomai e maua i taimi uma o le aso pe a manaomia e ni mai tulaga e fesootai mai ai o fea lava o le atunuu o lo o i ai tatou falemai.

O le tulaga foi i aoga, ia o lea ua faaaaogaina e le tele o aoga le tatou school net programme o lo o alu atu ai i luga o le tatou laina faasalalau lenei se i vagana ai nai aoga e le o i ai ni latou computer labs, a o aoga ua i ai computer i totonu o latou faleaoga, o la ua o latou faaaaogaina le tatou Samoa Broadband o lo o alu atu ai le school net i totonu o aoga. Ma o le taimi foi lenei, o lea ua faaaaogaina e tusa ai ma le finagalo momoli mai o nisi o sui usufono mamalu o lea ua i ai polokalame o aoaoga e pue lava e le tatou Matagaluega o Aoga ma faaaalu atu i luga o le laina. O le amataga lena ma agai atu ai ina ia mafai ai ona live atu le aoga, faatulaga le matafaioi a le Ofisa o Aoga ia mafai ai ona faatino atu le aoaoga i luga o le laina, a o silasila mai tamaiti i fea lava o Samoa o lo o tuuitiitia ai faiaoga ina ia fesoasoani ma faaatoatoa lea tulaga mo aoaoga. O lona uiga la, o lea ua faaaaoga le tatou laina i le taimi nei, pau lava ina ia faatele pei ona outou faafofoga mai i le tele o atinae o lo o taumafai ona faaaaoga atoatoa ai tulaga uma o lo o moomia mo le tatou atinae.

FOFOGA FETALAI: Tulai mai le sui usufono mo Falealili.

Afioga Fuimaono Teo Samuelu Teo: Lau Afioga i le Fofoga Fetalai, mo le faasaoina o le taimi i lenei taeao i le saunoaga matagofie a le afioga i le Minisita. E faafesili atu ona o lea ua oo tonu lava le saunoaga i le vaega lea o le school net. Masalo e le na ma le laina o lea sa alu le asiasiga a le Komiti, o lea e faapea o lea e faaaaoga i le taimi nei. Sa matou talosagaina foi se faamaumauga mai le tatou Ofisa Autu i le aoga ona o lea e maua le tele o faleaoga, o nisi na o screen ae le o hook up ina e le o oo i ai se laina. O nisi faleaoga o la e taatitia e le o faaaaogaina, e le o koneti. E pei o le vaega lena o lea ua e saunoa o lea ua faaaaoga, pe mafai ona maua mai se faamaumauga mausali, aua e oo mai i le taimi nei o lea e talia le faamaumauga lea mai le Ofisa o Aoga. Ua uma ona ave i ai le talosaga i le alii o lo o vaaia le IT, e oo mai i le taimi na uma ai le lipoti e le i oo mai i le taimi nei, ona o le tele mai o faasea i tua i aoga talu ona uma le polokalame lenei, na o le taimi lava na tuuina atu ai masini nei i tua i aoga,

e le i toe i ai se follow up ma ni tagata e o atu e asiasi. Ma le faaaloalo lava i lau Afioga.

Afioga Hon AFAMASAGA LEPUIAI RICO TUPAI: Faafetai i le sui usufono mamalu i le toe laga o lea tulaga, a o lea ua toe faafogfa atu le Afioga i le Minisita o Aoga. Ae pei ona maua mai i lau folasaga, e i ai aoga ua faaaoga ae i ai foi aoga e le i faaaogaina. Ma o le lagona lea e i ai i a outou Afioga i sui usufono, ia outou fesoasoani ane e saili atu ni computer a outou aoga. A i ai loa computer i totolu o aoga ona faafaigofie loa lea ona faapipii latou i le laina. O lea foi e faapena ona matou o lava matou i o matou itumalo e tau saili...

FOFOGA FETALAI: Tulai mai le sui usufono mo Falealili Sasae.

Afioga Fuimaono Teo Samuelu Teo: Masalo e le o maua e le afioga i le Minisita o la e i ai masini a o le faafitauli o le leai o se laina e koneti agai i ai masini. E le mafai ona koneti aoga nei mai le tatou system. E pei o le faafitauli lena, a o la e i ai masini. Ma le faaaloalo lava.

FOFOGA FETALAI: Se i toe tulai mai le Minisita.

Afioga Hon AFAMASAGA LEPUIAI RICO TUPAI: Faafetai i le sui usufono mamalu, a o lea ua faafogfa atu Ofisa Sili o Pulega o Matagaluega nei e lua, aina ia faapea ona aumai faamaumauga aloaia. A o le i oo mai la faamaumauga i i, aumai muamua le faamaumauga e faagaoioi ai le galuega ina ia mafai ona faapipii a o le i faapena ona toe momoli mai mo le lipoti mai i le Palemene.

FOFOGA FETALAI: Malie le Minisita se i tulai mai le faauilavea a le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga, o aoga uma lea e alu atu i ai mea ia, e le o atu e avatu mea ia, o le tiute lena o le komiti o aoga latou te faia. E ala ona ou iloa mea ia, ona o le mafuaaga foi lena na ou alu ai au ia ou komiti i le matou aoga, ina ia iloa onu mea ia e fai. O la e a e koneti a matou mea aua matou te o lava matou fai. O le mea la lena e aoga ai le pule aoga e ola le mafaufau, ae afai lava e pe le mafaufau o le pule aoga, o le a le mea a fai? Ae tatau foi la ona tilotilo i ai le pule aoga e faafesootai uma. O le ala lena na ala ai ona fai le tatou fesootaiga lena , o le fesootaiga ma aoga ma totolu o Matagaluega, o lea sa taua e se tasi foi o sui usufono e \$20 miliona na fai mo fesootaiga i totolu o Matagaluega a le Malo ina ia faafaigofie ona fesoottai, ae lelei ona lafo mai i le Matagaluega o Aoga latou te tilotilo i ai e toe siaki uma aoga nei, aua e matua le aoga

lava masini nei pe a avatu ae avatu i le ulu aoga e le ola le mafaufau. E tatau ona vaai i mea ia e faaaoga lelei mo fanau a Samoa.

FOFOGA FETALAI: Malo. Ia se i tulai mai le sui usufono lea mo Gagaifomauga Nu.3.

Susuga Hon Laauli Polataivao Leuatea: Faafetai mo le folasaga manino a le Afioga i le Minisita. E momoli atu le faafetai tele, o le agaga foi lena na afea ai e le lauga a lenei itumalo. Ua uma foi ona tapena le matou potu faapitoa aua le mea lenei. O le upu lea na avatu, e ese lava aiaiga ma mandate na avatu e install ai mea ia. E oo mai lava i le taimi lenei o lea e faatali. A na malamalama le avatuga, o la e saunoa le Palemia. E pei o le ala lena e lafo atu pea i ou aao, e \$17 miliona Amerika. O lea o le a ova atu ma le lima tausaga o faasolo le polokalame lea lau Afioga i le Minisita mo Fesootaiga ma lau Afioga i le Minisita mo Aoga. Ae pei o le taua o polokalame nei mo i matou nei mamao i tua. Ae ana faapea atu e i ai le matafaioi a le matou foi pitolaau, leaga o lea foi ou te komiti i le matou aoga, a o lea foi e faatali. Faatali, faatali, ui o lea, faafetai o lea ua e saunoa manino, tutu maia faatasi lau Afioga ma le Minisita mo Aoga, se i faasolo po o fea ua oo i ai lenei polokalame taua mo aoga a tamaiti. Faafetai foi mo le broadband. Ioe, e \$20 miliona Amerika le tau foi o lenei polokalame. O se connection binding connections a Matagaluega uma o le Malo. E te le toe fealuai, falemai, pepa fanau, so o se mea, femalagaaiga, ae faafetai o lea ua e saunoa, ia, alo ia i ou faiva ia vave ona taunu. Time is money. Ma lou agaga faaaloalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea lea ou te uu atua o le telefoni. Afai o lea tatou te telefoni i fafo oo i Rusia, oo i Peretania, oo i Amerika, o le a le mea ua le mafai ai ona telefoni mai le ulu aoga i Apia pe telefoni foi le ulu aoga i Apia. Lau Afioga i le Fofoga Fetalai, o le faigofie ia. E ese le faigofie o lea mea. Na o le pau lava le mea lea e misi, o le tulaga foi lea o le naunau o le faiaoga e sii le tulaga o le aoaoga o fanau, faaaoga mea ia. O le tulaga lea na alu ai le matou asiasiga e oo lava i Savaii, na ou alu atu lelei lava ou tilotilo o la e faaaoga. O isi faleaoga e fou, o la e ola mea. Ae lona uiga o le ulu aoga lava ia e faapena e le sogasoga lona uiga o lea e faaaoga le telefoni lea e telefoni i Niu Sila ae le iloa telefoni mai i i le ulu aoga po o le Ofisa Sili o Pulega, telefoni mai i le IT ona avatu ai lea o le faatonuga. Ae a oo loa lava i le suega o le loan pe momoria le guarantee, ona sau mamao lava lea e alu atu i lou Ofisa mo se faamalamalamaga. Ae le tau sau o lea e i ai telefoni.

FOFOGA FETALAI: Ia, atonu o lea ua manino le tulaga lea, e faigofie lava so o se mea e faigata pe a galulue faatasi. Tasi lea vaega o tiute o le Pule Aoga o le fesili mai i le Matagaluega. Ia, faaaauau le saunoaga a lau Afioga i le Minisita.

Afioga Hon AFAMASAGA LEPUIAI RICO TUPAI: Ia, e leai. O lena, e faigofie lava. A faapea o i ai ni faaletonu, vili mai i le Matagaluega o Aoga ia matou. Ia ona matou o atu loa lea e faatino le finagalo o le afioga i le Minisita.

E i ai foi ni isi o aoga ua molimauina, e avatu le mea lea, ae tago le Pule Aoga ma Faiaga taofiofi na o latou, ae o le mafuaaga na avatu ai, ina ia aoaoina tamaiti. Ia o lea ua agai le Malo i le tulaga lea. Ua tuufaatasia uma lava i totonus o le mea e tau o le TWG a le Malo, Technical Working Group a le Malo i latou uma lava e faigaluega IT, ma ua amata ona galulue e autilotilo, o le a le taimi e toe faatulagaina ai ina ia o ai i tua o aoga, ina ia fesoasoani i faiaoga, fesoasoani i tamaiti aoga.

Ua faapena foi ona faatulaga ua amata ona i ai aoaoga o coding a tamaiti. E aoao ai tamaiti laiti i le faaaogaina o computer. O le mea lea ua i ai nei, o le tatou atunu, o le atamamai ia. O lea la ua i ai le tulaga ua lelei ia fesootaiga. O le tulaga o le data a tatou, o lea ua tuufaatsasi ina ia fesoasoani mai ia le Malo Aufaatasi ina ia tuufaatsasi ia le tatou big data. O mea ia e 2 faaopoopo ai ma le atamamai o tamaiti i le computer, ia ona mei loa lea o Samoa i le isi tulaga, ona tatou le toe talanoa loa lea i le cyber security e puipui ia le atunu i osofaiga mai fafo, ae o tatou tilotilo foi pe faafefea ona tatou fausia i Samoa ni isi o products, po o ni isi o atinae e mafai ona tatou faatau atu i fafo i luga o le tatou cyber security.

Ae o le taimi lenei, afaia o e faafogafoga mai, ia faapea foi le paia o le Maota nei, amata ona faataitai lau fanau i le computer. A i ai ia le computer i le fale pe taumafai foi e faatau se computer ave i le fale e taaaloalo ai tamaiti. Amata ona tatou taumafai e naunautai ia tamaiti, ia agai ia o latou mafaufau ina ia faaaoga le computer. So o se galuega lava, galuega tau faatoaga, galuega tau tupe, ia o isi uma galuega, o le computer lava lea ua faaaoga. O le mea lea, ia ua taumafai foi ia faapena ona faavavevave ona aumai i totonus ia telefoni ia e pei o ni, ina ia faafaigofie ai ona tatou agavaa uma, ia ma faafaigofie ona maua uma avanoa o tamaiti uma, latou te taumafai ai ia maua pea i taimi uma le avanoa e atinae ai ia o latou mafaufau.

Ia faatai lea ma se matou faamatalaga, ia o tulaga uma lava e pei ona i ai ia le tatou atinae o lo o faifaipea, ia ma galulue faatasi. O le Matagaluega o Fesootaiga, ua na o se Matagaluega ina ia gaioi e faatino fesootaiga, faapipii le pito le la, faapipii le pito mai. O le tele o matafaioi o le Ofisa o Aoga...

Afioga Sulamanaia Fetaiai Tauiliili Tuivasa: Lau afioga i le Fofoga Fetalai, pe maua se avanoa o lenei itumalo, ona o lea e matau atu o le a lamalama faaiu ia le saunoaga a le Minisita.

FOFOGA FETALAI: Sa lavea le vaega lea i lau saunoaga?

Afioga Sulamanaia Fetaiai Tauiliili Tuivasa: Sao lelei lava lau Afioga i le Fofoga Fetalai.

FOFOGA FETALAI: Tautuana ma outou sui usufono mamalu, seiloga e sa lavea i lau saunoaga ona faatoa e...

Afioga Sulamanaia Fetaiai Tauiliili Tuivasa: E pau lava lea o le sui usufono sa taua ia le vaega taua lea o le a avatu ae le i faia se tala i le saunoaga foi a le Minisita, e muamua ona momoli atu le agaga faafetai i lau afioga i le Fofoga Fetalai, toe faafoisia foi le malosi, vaai atu foi i lenei taeao i le agalelei o le Atua i lau afioga.

O le mea taua lea sa laga e le sui usufono lenei o Vaimauga, i le saunoaga a le Minisita, na ou fesili i ai po o fea le OLP? O lea e matau i lenei taeao i le Maota lenei, pau lava o le sui usufono na lauga i ai. E mafua i se a? Ou te alofa i le atunu ma taitai ma le atunu atoa. O le ala foi lea sa ou manao ai o lea e matau atu o nei mea uma e saunoa i ai le Minisita e le taua i lou sui usufono.

Ae o le tulaga e tatau ai, talu ona oulua nonofo mai i lenei 5 tausaga, o la e faaleaga le atunu e oo lava ia i tatou o taitai. E le mafai foi la ona saunoa i ai ia le tele o sui usufono uma aua e saunoa loa sau i luga o le OLP. O le uiga la o lau faamatalaga i lau afioga i le Fofoga Fetalai, se silasila ane i le faaleagaina e le gata o le Maota lenei i taitai o aiga e oo i nuu. O le matou nuu e sau faafia i lea foi tagata e lafi mai i tua. Ae talofa e i si o tatou atunu. O lea o le Tulafono ia ma le tele o au cable ia e faatutu ma... o lona uiga ua televave ia le sau i totonu o mea. Ae ua saili o faamama ia mea ia e o mai i totonu?

E lelei le auaunaga, ia ae talofa i le... aemaise foi ia le afioga i le Palemia, e pei o le agaga lena o lenei sui usufono se i faamanino mai ma talanoa mai le Minisita po o fea ua oo i ai lea vaega? Aemaise vaega e le o faailoaina ia o latou suafa i luga o fesootaiga lenei. E tatau ona oo i ai ia se lua suesuega, o le mea lena e fia faalogologo i ai le atunu.

FOFOGA FETALAI: Malo, faafetai. Tulai mai le Minisita.

Afioga Hon AFAMASAGA LEPUIAI RICO TUPAI: Matau mai lau afioga i le Fofoga Fetalai ma le Maota i lau tali atu, na ou amata lava na ou tali i manaoga o le sui usufono mamalu. Na ou faapea e taua ia ia le TV ma telefoni. Ae o lea e taua ia ia lea mea e leai se taua. Ia o le mea lea lau afioga, ia e le na ma le laina i le tou faafogofa ia talaave mai i fafo, o lea lava e sue i Amerika po o ai na tulioso i totonu ma faaleaga ia le latou palota. O lea e sue e Filipaina foi, po o ai na tulioso i totonu fai mea e faaleaga sui le latou palota. E oo mai lava i le taimi nei ia nei atunu tetele o le lalolagi, e le na o le pau foi ia. O lea lava e taumafai e saili po o fea o i ai tagata. Po o fea pe faafefea ona maua.

O le taimi lenei, ma o lea tou te silasila lava i ai aua o lea e sau i luga o faamatalaga o upega tafailagi, ua pisinisi. E i ai lava ia kamupani faapitoa o le lalolagi e pau lava ia le latou mea, o le isi vaega o le kamupani a faapea o oe lea e te alu i le palota, ia ona e pay ina lea, ia e pau lava ia le latou mea e fai, na o le promote o oe. Ae o le isi vaega o le kamupani, na o le pau lava le mea e fai, na o le faaleaga o le sui la e te lua tamomoe. Ua pisinisi le mea nei i le lalolagi.

O le mea lea, e tele le tupe e alu i le saililiga nei. O lea ua i ai latou faapitoa o lea ua silafia e le Malo e aafia ai i totonu i i mo tatou. Ae e tele le tupe e alu ai. Ae o le mea lea, e le alu ai se afu o le Malo e tausaili lea mea. Aua tou te faitau i na mea. O lena e tele mea lelei ma atinae e mafai ona tou faitau ai ae faataatia nei mea e leai se aoga. Aua le alu ai ia so tatou afu, ae tatou agai i luma ina ia faapena ona... o lea lava e silafia e le atunuu.

O le tele o mea na e omai i luga o le OLP e leai ma se mea e moi, mo mea o taufaaleaga, mea pepelo. Ia po o ai lava la lea e faafofoga le atunuu e sau i luga o le OLP ia ni mea e agai ai, e pepelo uma lava. E leai ma se mea e sao i luga o le OLP, o le ala foi lea, o lea lava e agai i luma le galuega a le Malo. Tele o mea lelei i luga o laina ia o fesootaiga lea e sau mai fafo. O mea la na, o lea e agai i ai ia le tatou Malo e aputiputi, ma taumafai aua fanau, aua si o tatou atunuu ina ia agai Samoa i luga i le isi tulaga maualuga e mafai ona tatou oo i ai, aua ia lo tatou tamaoaiga ma tulaga uma.

Susuga Hon Laauli Leuatea Polataivao: Lau afioga i le Fofoga Fetalai, pe maua sina avanoa faamolemole.

FOFOGA FETALAI: Ia ou te...

Susuga Hon Laauli Leuatea Polataivao: E leai lava se agaga e toe afe i le mataupu leaga o lea sa faamamafa i lau lauga.

FOFOGA FETALAI: Ou te fesili atu i le sui usufono, sa lavea i lau lauga le OLP po o lau saunoaga?

Susuga Hon Laauli Leuatea Polataivao: Leai, o le gagana i luga o upega o faamatalaga lau afioga. O le manumanuga lau afioga i le Fofoga Fetalai, e leai lava se afaina o le faalele o upu ma tala. Ae o le gagana o lo o ua matua malepe ai le oia o le tatou atunuu. Afai lau afioga i le Minisita o lea ua e saunoa e faigata ona sue, tatou saili i se isi auala. Aua tatou te tuufaua le gagana e malepe ai le atunuu. O i lea na ou agai atu ai lau afioga, silasila i le mea lea na fai e le nuu lea, tulou lava Tuisamau Laulii, na ona faatonu lava e alii ma faipule aiga ia, vaai outou tagata ia e gagana leaga i luga o le mea nei. E faapena foi lo matou nuu. Lua faatonuga uma. E le i toe i ai se mea na tupu.

O le agaga lena lau afioga, afai o lea e manumanu i tupe e saili tagata nei e le mafaufau i le gagana a le atunuu, faamolemole, aua tatou te fiu e saili auala e fofo ai. Aua o le gagana e pei ona ou fai atu, a leai se gagana, e leai se aganuu. A leai se aganuu ua leai se atunuu. O le tatalo lena lau afioga aua e te fiu e foia le mea lea. If we lost our language...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau afioga i le Fofoga Fetalai...

FOFOGA FETALAI: Se i tulai mai le Taitai o le atunuu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: masalo e sili ona taatia mai pea i le Malo... lea e i ai ia... O le mataupu lea e faataua e le atunuu. O lea foi la e fai i ai gaioiga i mea ia o cyber crimes. E le na o Samoa o lea e maua ai. O la foi e lavea uma ai lava atunuu. O mataupu foi ia sa talanoa i totonu o fonotaga a le Taupulega, toeitiiti lava sausaunoa uma i ai Taitai o Malo.

E oo foi la i totonu e pei o le Malo o Amerika la ua pulea mai ma faatonutonu mai e Rusia latou faigapalota lea e afua ai nei le faamasinoga la e fai ma le faaiuga e ono aveese ai le Peresetene o Amerika.

Lau afioga i le Fofoga Fetalai, e sao ia le mataupu lea e laga, ae taatia mai pea e i ai nai tulaga lavelave o lea e i ai faaletulafono. Sa ou tapaina ai foi le fesoasoani mai Ausetalia ma Niu Sila e ala atu i lou Ofisa. Ae o le mea la ua ou matauina ua sui atoa uma foi i Niu Sila ma Ausetalia. Masalo sa ou faatonuina le tatou Matagaluega ia a le Ofisa o le Loia Sili faapea foi ma le Komisi o le Toefuataina se i tilotilo ane i Tulafono ia ua faataatitia e faasaga tonu lava i mea ia, ua matua sui atoa talu ai le tagatavaleina o tagata ia i Niu Sila.

O Malo lea e pei sa agai tele i mea ia o le aiatatau e tuu ai pea i latou e faaali taofi, ae o le mea la ua tupu, e le afaina le taofi i uiga tuusao o mea faaletonu. Ae o le mea ua tupu nei, ua matua ova mamao ma le faaaogaina o gagana faameaola lea e faaaoga e o tatou tagata. E taua tele la ia faaiuga e fai e Pulega a alii ma faipule.

A o le tulaga ia faalemalolo, o lea e i ai tatou Tulafono i le taimi nei, ae moomia le faamalosia atili ina ia o gatusa ma Tulafono i fafo, e tagofia e i latou ia. O lea e iloa e le Malo, o lea ou te iloa ua leva ona ou taua mea ia o tagata e o faaaoga le mea lea, o la e manatu i latou e na o latou e iloa. Ae o le auala foi lea na auala uma lava i ai latou e faaigoa o hackers, latou ia e mafai ona latou agai sao lava i tagata e i ai lava lavelave faale-tulafono lau afioga, o lea e mafua ai ona i ai le tatou project lea e i ai nei mo le tagofia o tagata nei o lea e taua i le tulaga lautele o cyber crimes.

Lau afioga i le Fofoga Fetalai e pei o le tulaga lena, sa tatau ona tali atu ai ia le Minisita. Lau afioga i le Fofoga Fetalai, ia o le fesoasoani atu lena.

FOFOGA FETALAI: Malo faafetai, ia o la e faafofoga tapuai mai foi Samoa ia ma le atunuu. O tatou e i ai le aganuu, ae o le galulue faatasi o le Malo ma le pule mamalu a alii ma faipule, ina ia tau fofo faafitauli aua e i ai ia vaega e le o matua iloa lelei. E i ai foi vaega o la e matua manino ma malamalama lelei i ai afioaga.

O le aafia lava o le afioaga i totonu o se tama fanau po o ai lava e i Amerika po o fea le itu o le lalolagi ae faaalia se uiga faapena ae o le tama la ia po o le aiga la e i le afioaga, e afea le tulaga lena i le pule mamalu a alii ma faipule. Leaga ua i ai afioaga ua faapena e oo foi i lo matou nuu o Fasitoo-uta. E i ai matai na tetea ai e oo mai i le aso. A o faafogaga mai la le atunuu, ia o le vaega lea e tatou te silasila totoa i ai aua o tatou o sui usufono o itumalo, o sui usufono o nuu lea e palota mai ina ia aumai tatou te faia ia le mea e limataitaiina lelei ai le soifua o ona tagata.

O le mea la lea e le tau fautuaina, ae afai ua laga e sui usufono mamalu, ia o le tiute foi lea o tatou. E leai lava se eseesega o le mea lea ma le faamai misela lea sa i ai nei. Tatou te tau fai galulue faatasi ona taunuua lea i le taunuuga lelei.

Ia tulai mai ia le...

Afioga Hon AFAMASAGA LEPUIAI RICO TUPAI: Ia, o le tali lava lena ua outou faafogaga i ai i le afioga i le Palemia, aemaise foi i le afioga i le Fofoga Fetalai, aemaise foi o le sui usufono mamalu na mafai lava ona toe tali e le sui usufono mamalu ia le fesili.

E pei ona ou tolaulau atu i le amataga Tulafono uma lava a le Malo ua agai i ai, ina ia malupuipuia tatou i tulaga ia o le cyber crimes. O Tulafono uma ia na tolaulau atu i le amataga, o le naunautaiga lena o le Malo lea e i ai. Ae o le mea foi le ua i ai, e fai nei le Tulafono ae teuteu taeao, e pei ona malie i le saunoaga a le afioga i le Palemia, e alu lava suiga i taimi uma. Ia ma e le o malolo ai lava le Malo. Ae o le mea lava ia lea sa laga e le sui usufono mamalu i le OLP, ia e faamalulu atu, o tulaga na o le tali lea o tatou. O lo o alu pea aoaoga a Matagaluega, e le gata o le Matagaluega o Fesootaiga, o le Matagaluega o Aoga, o le Matagaluega o le Pule Faatonu, ia o lo o alu ai lava aoaoga i le faaaogaina o le internet i tulaga tatau, ina ia aoaoina fanau aoga, ia aoaoina le atunuu pe faapefea ona faaaoga, pe faapefea ona puipui mai tatou mai tagata leaga o lo o i ai i luga aua e tele mea lelei i luga o le internet ae tele foi tagata leaga o lo o feoai ai. O le ala lea o lo o faaauau ai pea aoaoga i taimi uma, o lo o taamilo i tua e le na o le nonofo i totonu o le taulaga, ae o lo o taamilo, o la foi e i Savaii i le taimi nei le aoaoga lea, aemaise i le toe faatulagaina o le tatou TV o lo o feoai ai ma Tulafono la nei o lo o galulue faatasi ai ina ia taumafai ina ia puipuia tatou. A o le naunautaiga lava lea, amata mai i totonu o aiga, amata mai matua, ina ia aoaoina le fanau i le gagana, tu ma aga e ola ai ona faapena foi lea. O le aiga lava e amata ai mea uma. Ona talosagaina ai foi lea ma toe

faaoloolomaau i le pulega a alii ma faipule i totonu o nuu ina ia faapena ona faatulafonoina ma avea ma aiaiga i totonu o nuu taitasi i latou e taufaaleaga ae iloa pe o fea le afioaga e sau ai. Po o fea lava o le lalolagi e i ai, ina ia faapena ona faatulafonoina ma avea ma aiaiga i totonu o nuu taitasi i latou e taufaaleaga ae iloa po o fea le afioaga e sau ai, po o fea lava o le lalolagi o i ai, ina ia faapena ona faatulafonoina i totonu o nuu taitasi. Ae faafetai atu i nuu ma afioaga ua faapena, pei ona saunoa le sui usufono mamalu i lo latou foi afioaga, faafetai atu i le pulega mamalu a alii ma faipule ua amata ona latou faatulagaina Tulafono faapenei. Ma o le tatalo foi lea i afioaga uma ina ia tatou galulue faatasi, o lo o faapena ona taumafai atu pea le Malo ma taumafai atu pea aua le malupuipua o tatou i nei tulaga uma.

Lau Afioga i le Fofoga Fatalai ma le mamalu o le Maota nei, o tulaga nei sa faapena ona lagalaga ai finagalo o sui usufono mamalu. Ae a i ai nisi itu ona tatou toe feutagai lea pe a maea, a o le Matagaluega o Aoga, o le Matagaluega o le Soifua Maloloina, o le faamuamua lea o lo o i ai nei. Ma ua alu atu galuega i tua, taumafai ina ia lelei fesootaiga e faaaoga mo aoga ma faaaoga foi mo le tatou soifua maloloina mo le agai i luma o lelei o tatou tagata. Ia, ia agalelei le Atua, o lea ua ou tamua ae o le a faasolo atu le matou Kapaneta e tusa ma le tali atu i manaoga uma. Ia faamanuia le Atua i fonotaga o lenei aso.

FOFOGA FETALAI: Malo faafetai. Faafetai mo le saunoaga a lau Afioga i le Minisita mo Fesootaiga. Ma ua oo mai le faasologa i lau Afioga i le Minisita mo Faamsinoga.

Afioga Hon FAAOLESA KATOPAU T. AINUU (Minisita mo Faamsinoga ma Pulega Tau Faamsinoga): Lau Afioga i le Fofoga Fatalai, faafetai mo le avanoa. E muai faatalofa atu i le Palemia o le taitai o le Maota, le Kapaneta ma Minisita Lagolago. E faatalofa atu foi i lea itu o le Maota i le afifio o Taitafono o Komiti Faa-Palemene, alii ma tamaitai sui usufono. O lea foi tatou te faatasi ma Ofisa Sili o Pulega o Matagaluega ma Faalapotopotoga Tumaoti a le Malo, malo le tauatai faamalo le onosai.

E faatalofa atu foi i le Failautusi o Fono ma le aufaigaluega a le Ofisa o le Fono Aoao Faitulafono. Avea foi lenei itula e avatu ai se faatalofa i Lana Afioga Mamalu O Le Ao o le Malo ma lana masiofo, Sui o le Fono a Sui Tofia ma le faletua faapea foi le tapuaiga mamalu a Samoa. E le galo foi le nofo tatalo a le aufaigaluega paia a le Atua o lo o nonomanu aua se manuia o Samoa.

E faatalofa atu foi i lou itumalo o Vaimauga Sisifo Nu.2, malo le tapuai, malo le fai tatalo. Lau Afioga i le Fofoga Fatalai, o le a tali atu i mataupu sa sausaunoa i ai sui usufono mamalu o le Maota, e sa afea le Matagaluega o Faamsinoga ma le Ofisa o Faiga Palota.

O le sui usufono mai Safata Sisifo ma Aleipata Itupa i Lalo sa sausaunoa i le tulaga lea pe mafai ona faatino le faasalaga lea o le faamsinoga lea e taua faaperetaniaina o le home detention. O lo o i ai le tatou faasalaga e tau o le community service e tau tali tutusa lava ma le faasalaga lea e faatino i fafo, ae o le faalavelave o le faasalaga lea e fai si taugata. O le mafuaaga lena e mafua ai ona le mafai ona faatinoina i le taimi nei. Masalo e i ai se taimi oi luma ona asiasi lea i ai o le Matagaluega o Faamsinoga.

O le sui usufono mamalu mo Falealili Sasae sa fesiligia po o lea le mea ua le molia ai faamasino ia sa faatea. Ia, o le vala lea, o le matafaioi lava lea a tagata o lo o aafia a latou mataupu i le Faamsinoga e momolia a latou tagi i le Ofisa o Leoleo ma faatino ai e le ofisa o Leoleo moliaga. A o le matafaioi latou a le Faamsinoga o le saili o latou mea ua faaletonu ma fautuaina le Peresetene ma le Ofisa o Faamsinoga i le mea e tatau ona agai i ai. Ma o lo o mafai ona faatinoina le mea lena i le taimi nei.

O le sui usufono mo Gagaifomauga Nu.3 lou uso ia Laauli. Ua tau vaivai lou faatuatua.

Afioga Fuimaono Teo Samuelu Teo: Lau Afioga i le Fofoga Fatalai...

FOFOGAFETALAI: Saunoa le Minisita ou te le o iloa po o i ai se isi o tulai mai.

Afioga Fuimaono Teo Samuelu Teo: Lau Afioga i le Fofoga Fatalai pe maua se avanoa?

FOFOGA FATALAI: Oi, malie la le Minisita o lea e tulai mai le sui usufono mo Falealili Sasae.

Afioga Fuimaono Teo Samuelu Teo: Leai o le vaega lea ona o lea o le a see ese le Minisita ma se tasi lea o mataupu sa oo i ai se lagona o lenei sui usufono o lenei itumalo, o le vaega lea o lo o faamanino mai pe le o manino lelei le aumaiga o le tali a le Afioga i le Minisita. O lea e pei e foliga mai o lea o le a tuu i aiga o lo o aafia a latou mataupu. A o le fesili; afai ua faamalolo ona ua faamaonia e le faamaoni, o le mea lea lea sa base ai luga le faamalologa pe afai ua faamalolo. O lona uiga, e le tau molia mai e aiga aua o lea lava ua i ai le faaiuga a le komisi lea ua le faamaoni. O lona uiga, e tatau ona molia e le komisi po o le Ofisa ona o totonu o le Matagaluega. Aua e le na ma le laina le toatele o aiga o aafia ae le faapea o mautinoa le vaega lea ua aafia ai. E pei o le vaega lea e fia maua ai se manino.

FOFOGA FATALAI: Malo. Ua maua atu faafetai. Se i tulai mai le Afioga i le Minisita mo Famasinoga ma Faiga Palota.

Afioga Hon FAAOLESA KATOPAU T. AINUU: O lau fautuaga i le sui usufono, e le faapea le faatinoga o tatou galuega. E le molia sao e le Matagaluega, e momoli e le tagata lea e complain, e momoli i le Ofisa o Leoleo ona fai lea o moliaga.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga e fia fesoasoani atu, e le o malamalamala le Minisita i lana tali. O le tulaga lea o la e i ai le vaega tonu i le judicial services commission o i latou na e faia le faaiuga. Afai lava la e fai le faaiuga e faatea ae le molia, o le discretion lena a latou. Afai ua manatu latou e molia, ona faatoa molia foi lea pei foi la o mea ia a le tatou Malo. E i ai taimi e manatu ai le Malo e molia le sui usufono ona e matuia tele ni ana soligatulafono

ona molia lea. Ae manatua foi, a faasala le sui ua faatea, o le matua tele o le faasalaga, lona uiga e le toe maua se isi ana galuega i le lumanai. O le mea la lena e masani ona faia e le tatou Malo ae vagana la ua matuia tele ona molia loa lea i le Tulafono ona lua ai lea o sala.

Lau Afioga i le Fofoga Fetalai, e faapena foi la le mea lea sa faatino i le Peresetene, ua uma ona fai i ai le iuga toe molia toe aumai i inei, e leai se tulaga e taofia ai ae i ai le discretion e mafai ai ona fai mea na.

FOFOGA FETALAI: Malo faafetai. Ua manino e le gata i le Palestene a o le faafogofoga tapuai mai a Samoa.

Ia, tulai mai le... e i ai se faafinauga po o se...o lea ua tali lau...

Afioga Fuimaono Teo Samuelu Teo: Lau Afioga i le Fofoga Fetalai, leai e le o se faafinauga, o le faafetai o lea ua tali... pei e manino atu aua o lea a tuu foi lea i nisi o solitulafono i totonu o Matagaluega a le malo, e tele mea o le malolo toe molia. O le ala lena o lea sa tau tulituli atu ai le vaega lea, ae faafetai o lea ua manino le tulaga o le faamaninoga i lo le tali a le Minisita na aumai. Faafetai.

FOFOGA FETALAI: Ia, faapea ai e te tulai mai e te le o malie, a o lea la ua manino. Malo faafetai. Tulai mai le Minisita.

Afioga Hon FAAOLESA KATOPAU T. AINUU: E faamalulu atu i le sui usufono o lena ua saunoa atu le Afioga i le Palestene i lea mataupu. O le itu i le mataupu lea sa laga e Laauli ua tau vaivai ai lou faatuatua o lau folasaga talaatu anapo. E atagia mai i lau folasaga le le manino o lau Afioga i le tulaga lea. E tatau ona ou tali atu ona ua faalogologo Samoa i lau folasaga. O le mataupu lea sa e saunoa i ai, le mataupu i faila a le faamasinoga. O le mea muamua, o le filifilia ma le faamutaina o se CEO, o le matafaioi tonu lava lea e nafa ma le komisi o tagata faigaluega a le Malo, le PSC lea e iloa ai e le lautele. O le mea lona lua, o moliaga ma le suesueina o le CEO, o le matafaioi tonu lea sa nafa ma le PSC ae le o au. Lona tolu, o le faaiuga o le suesuega a le PSC e i ai mataupu ogaoga sa saili i ai le PSC e le o aafia ai faila. E le o aafia ai faila i le mataupu lea, ae tolu mataupu ogaoga ua manatu ai le Komisi e fautuaina le Kabeneta e faamuta le auauanaga a lea foi tamalii. O le faagasologa lea o le mataupu, ae leai lava se aafiaga o au. Na pau lava le aafiaga o lea e taua o faila na aumai i lou ofisa. O faila na aumai i lou ofisa e faataga i lalo o le Tulafono. O le faamalamalamaga puupuu lea mo le silafia ona o lea ua agiga le saunoaga a le sui usufono mamalu.

Susuga Hon Laauli Polataivao Leuatea: Lau Afioga i le Fofoga Fetalai, na o sina avanoa lau Afioga, o se mataupu laitiiti lava na ona ou faamanino. E faamalulu atu i lau Afioga i le Minisita, e leai lava se agaga e tau le pua ma lafo atu, a o nei e faatonutonu folau ai Samoa ina ia sologa lelei mea uma. Na pau lava lea o le mea na ou augani atu ai ona o le tulaga i le puipuiia ma le malu o tatou faila, aua ne i faia nisi auala le talafeagai. O le ala lea na ou tatalo atu ai. A o si tamalii lea o le atunu, o lena ua ou fai atu, e tele pe a ta fetuunai nei i le tulaga o mea na tutupu ona ou musu lea. E ese le mea na tupu. O le tusi lea na tapena faasaini ai le tama, o le tulaga lena, ae malie lau Afioga i le Minisita o lea lava ua ou taumafai atu, ia, o le a le mea? E faapefea ona fai lenei mea i lenei tagata ua

leva ona tautua i le atunu? A o lena e te silafia le mea na tupu, o la e foi e iloa e le atunu le mea na tupu. Ae o le a ou le fia faia se faaiuga po o se faafinauga, leaga e malamalamama lelei le mea na ala ai ona mafua ona saini Papalii i le tusi. O lau tusi na tapena.

FOFOGA FETALAI: Ua ou fautuaina foi lau Afioga i le Minisita, o lea ua manino i lau saunoaga o lea foi ua toe tuu atu le avanoa i le sui usufono mamalu sa aafia i lana saunoaga le tulaga lea. O lea la ua taufai manino itu e lua, a ua maea foi ona fai le faaiuga. So o se mea lava ua maea ona fai le faaiuga, ua ou manatu e le aoga ona toe tagofia e le Palemene. O le mea la lea, ou te fautuaina lau Afioga i le Minisita, see atu ia i se isi vaega o saunoaga ma tali e fia faamalamalama ina ia vave faagasolo le tatou galuega.

Afioga Hon FAAOLESA KATOPAU T. AINUU: Faafetai i lau Afioga i le Fofoga Fatalai. O le a ou see ese ma le mataupu lea, o le mataupu lea o lea e silafia e le sui usufono mamalu le auala e faagasolo ai le faamaoniga o ana tusi ia e tautau mai.

FOFOGA FETALAI: Ia, aua pei e tasi lea itu aua e le mafai ona ou tuulafoaiina le tulaga lea e le mafai e le mamalu o le atunu ona tali mai i a tatou felafolafoaiga pe afai e safea le suafa. Ma e ui lava o lo o faalauaitele, ae o lea tatou te taufai malamalamama uma i le o lo o faapea ona faasino i ai le mataupu lenei. O le mea la lea, ou te fautuaina lau Afioga i le Minisita faapea foi le sui usufono mamalu, leaga e le mafai ona tali mai le mamalu o le atunu i a tatou felafolafoaiga. O le mea la lea, o lea na ona faailo o le tulaga lea, o lea foi ua manino, ona faapea lea o le fautuaga a le Nofoa, see ese mai le mataupu lea.

Se i saunoa mai le Palemia.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fatalai, ina ia taoto i lagatonu lea foi mataupu, o le mataupu lea e laga e le sui usufono faasaga i le Minisita, na oo mai foi ia te au ma ou faasalalauina faalauaitele. O le tulaga sao lava ia, o le va lea o le Minisita ma le Ofisa Sili o Pulega o le Pulega, so o se Minisita ma so o se Ofisa Sili o Pulega, i le va fealoaloai. A tupu loa ni uiga faigata faapea, o le mea lava e masani o le valaau e le Minisita o le Ofisa Sili o Pulega ma talatalanoa i ai ina ia maua mai se tulaga sagatonu o le mataupu o lo o aafia ai, ona ave foi lea o le tuualalo a le Minisita e fesoasoani ai i sana mataupu po o le aoai foi. Po o le ave la i le tusi pe ave i le tulaga ofatalanoaga, e le faapea e fai le mea lena ina ia fesoasoani ai e tau fofo faafitauli o lo o feagai ma ia. A o la e ia te ia le faautautaga tatau na te faaaogaina ai se fautuaga po o se tuualalo e avatu i le Minisita. O la e ia te ia. Ina ua aumai la le faasea i le tusi lea, lea sa ou tali aloaia i ai, faasalalau ma ou talanoa foi i ai i le sui, o le mea lena e te le tuuaia le Minisita po o se isi foi i le latou fautuaga na avatu, aua o oe o le Ofisa Sili o Pulega. E le o se Ofisa Sili foi o Pulega e faaletonu, o le Ofisa Sili o Pulega maualuluga lana ia foi aoaoga na te iloa ai le mea e lelei ma le mea e le lelei, o le tuualalo lelei ma le tuualalo le lelei. Afai la na ave e le Minisita se fautuaga lelei i ai ae nofo mulimuli ma tagi talatala ua na faaaogaina le fautuaga na avatu ae lavelavea ai, e leai la se mea e ala ai ona toe tomumu ma toe faitio faalauaitele ua

taitaiseseina ai tagata, aua o ia o le tagata atamai pe na e faaaoga le fautuaga pe leai, lau Afioga i le Fofoga Fetalai, o le mea lena e fitoitonu ia te ia. Na ou faamatalaina lea i ai, vaai, o le fautuaga lea na avatu, faauma ai lea i ina filemu le mataupu. Ae ana le faia la le fautuaga lea a e tetea pea ae ave i luga, matala uma mai loa ma au amio faavalevaledia ia na fai. O ai la e tigaina ai? E tigaina ai ia, tigaina ai lona toalua, mataga uma atu ai ma le aiga atoa.

Lau Afioga, o le tulaga sao lena, e tele a le aoga o le tuualalo, lea la na taofi uma ai le gasu lena ma le mapuna ae i luga, a o le maua tele o mea faaletonu lea na i ai.

Lau Afioga i le Fofoga Fetalai, o le faamatalaga lena, leaga o lea o le a taofi tutu i luga o tatou Tulafono ona faapea lea ai o i ai ni mea matuia o i ai, a o lea ua uma ona ou faamatalaina atu, ua uma foi ona ou tautala faalauaitele ina ua fesiligia au i polokalame ia e faamalamalama i le atunu mea, fola i luma o le atunu, ona uma ai lava lea o le masalosalo. Ia na toe logo mai la au e le uso lea ma faapea mai, faafetai lava e taua tele lau tuualalo. Ia ona uma ai lea o lena mataupu.

FOFOGA FETALAI: Ia, ua 450% le saunoaga lea o le sua foi lea i le faamalamalaga o se mea, o lea la ua tatou toai taunu i le mea o le faamaninoga atili o le mataupu lenei. O le ala lena o lou taua o le 450%. Ioe. Sa fesiligia le mea e tasi a o lea ua sau le faamalamalama, ua faamalamalama atoa ai le taiala. Ona faapea lea, taoto loa i paga le tulaga o lea mataupu ae faauma mai le saunoaga a lau Afioga i le Minisita.

Afioga Hon FAAOLESA KATOPAU T. AINUU: Faafetai i lau Afioga i le Minisita, o lea ua malamalama le mataupu i le faamalamalaga a le Palemia. O le sui usufono mulimuli lea sa afea le Ofisa o Faamasinoga o lou uso a sui usufono lea mai Vaimauga Sasae lea sa fesiligia le mea ua tuai ai le faamasinoga o taulelea ia lea sa faaooolima i si ona alo. Tuisamau ae ou te le i tali atu, e i ai si au tala lea e fia fai atu muamua. O le faatinoga o Faamasinoga, e faigata le galuega o lo o faafeagai ma faamasino. E i ai tua o patatua pe a faatopelau le faiga o Faamasinoga. O lea ua tatou silasila i ai i le tele o mataupu aua a faapea e faatopelau faatopelau te i ua ave se isi i le falepuipui, ona leai lea o se aoga pe a te i ua ave se isi i le falepuipui. Na pau le faamafanafanaga lea e tau tulai mai i se tulaga faapena, o lea ua lelei atili le tatou falepuipui talu ona tulai mai le Minisita o Falepuipui. Ae o le mafuaaga lena...

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai ou te le fia faauilavea leaga o le sui o le uso, o Vaimauga lava o le uso, sa faapea e le... Ae pei e matuia lana saunoaga lea fai mai e le faatopelau ona ave lea i le falepuipui. E fefe la e ave e a i le falepuipui tagata ia? E pei o le lagona lea o lea na avatu pei sa faatusa i lou atalii o se faatusaga lautele i le delay. E le gata i faamasinoga ua leva ona faataatitia, a o iuga foi ua leva ona fai e le i faalauiloa. E pei la e faapena le lautele sa i ai. Ae tou te faalogo la i le tala lea, a faatopetopelau faatopelau ave faafalepuipui. O le a le tali? O le mea lena e lagona ai le faanoanoa. Sa ou fiafia lava, sa ou fiafia sa avatu le faamoemoe o lou atalii e fai ma faataitaiga, lea ua tausaga ma masina, o isi cases faatoa avatu nei a ananafi ae ua maua iuga. O fea la ua oo i ai? Ae pei o le lagona lea ua toe aumai e pei e tiga ai le manatu o lenei sui usufono, fai mai e fefefe e ave i le falepuipui.

FOFOGA FETALAI:E faamalulu atu i lau Afioga i le sui usufono mamalu mo Vaimauga Sasae, se i tapa se finagalo o le Palemia ua tulai mai.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fatalai, e manatua mai i le vaiaso le la sa faatauto ai le isi faamasino, o le isi faamasino ua leva ona gasegase. O le ala foi la lea a maua mai foi ua litaea foi le tatou Faamasino Sili lea sa i ai. O le tulaga la lena lea sa laualuga i le finagalo o le Kapaneta ina ua aumai le talosaga lea e toe faaopoopo atu Faamasino, e 7 faamasino ia na ioaina e le Kapaneta ma faataua e le Kapaneta le tulaga o le faavavevave o le lotea o mataupu ia. Masalo o tua atu o le vaiaso lea sa faia ai le feiloaiga faaleaoaoga faasemina o alii faamasino Samoa ae sa i ai la ma le toatolu o faamasino mai luga i solitulafono, le Sui Faamasino Sili faapena foi ma isi faamasino e toalua, sa ou faamamafaina i ai le tulaga lea o le fua taualuga lea o faamasino uma, a e aoaoina foi le tomai faa-loia, o le fua taualuga lea e faavae ai faamasinoga o le justice delay, is justice denied. O le mea o le faia o se faaiuga amiontonu, afai e tuai ona fai, ua e fesoasoani i le faatosotosoina o le le amiontonu. E sao la le mea lea e laga mai e le sui usufono, o le matua le amiontonu lava o lenei mea o le tosotoso o faamasinoga. O le mea lea sa ou ttau i faamasino, o atunuu i fafo, o lau faalogo i ai, e tolu loa masina e le i deliver ina se faaiuga, ua tatau ona faamavae lena faamasino. E tolu loa masina e le i faia e se faamasino se iuga o se faamasinoga ua ana faia, ua tatau ona faamavae, ma o le mea tonu lena e tatau ona i ai le faamasinoga a Samoa. O le mea la e i ai, ua ova i le tolu, fa, lima, ona, fitu, valu, iva, sefulu masina e le i kiliva lava iuga a le toatele o faamasino.

Lau Afioga i le Fofoga Fatalai, o le tulaga lena. Atonu foi o le isi lea mea o lo o tuai ai, o le le lava o faamasino. A o le Kapaneta ia, e augofie. O le upu a au e masani ona ave i faamasino, e leai se limiti o mea nei o le amiontonu. Afai e saili le amiontonu, po o le a lava le tulaga pe fia faamasino e moomia, fesili mai i le Kapaneta ona avatu lea o le faaiuga e lagolago a le Kapaneta. O le ala foi lena so o se taimi lava, o isi faamasinoga apili e fia omai fafo, e muamua taunu mai ae faatoa aumai le pepa, e avatu le ioega a le Kapaneta. A o le agaga lagolago lea o le Kapaneta i le faamasinoga ma le latou iuga e tatau ona faavavevave lea na ala ai ona ou faatuina le lafo i totonu o le Palemene lenei, ua tatau ona fai suesuega o le faamasinoga, e le mafai ona nofonofo pea le atunuu i le faamasinoga o fanua ma suafa, e faapea foi le faamasionga o solitulafono. Ua ou lelava le toai atu o tagata ia te au e fai se faaiuga i iuga nei e tolo, tolo pea, tolo pea tolo pea, aisea? E atagia ai i ina le vaivai o le Pulega.

Lau Afioga i le Fofoga Fatalai, o le ala lena, e nofo tapena le Kapaneta e ave le fesoasoani i o i le faamasinoga aua le atunuu lea e mafatia, mafatia e le gata o mea o faamasinoga solitulafono, a o le faamasinoga o fanua ma suafa. Sa ave i ai lau upu, ‘vaai, o mea nei o faamasinoga, e lua tatou faamasinoga, o le faamasinoga solitulafono ma le faamasinoga o fanua ma suafa. O le faamasinoga o solitulafono, e fai lava ma uma ai i ina, faasala le tagata i ina lea na faia le solitulafono. Ae a oo loa i le faamasinoga o fanua ma suafa ma eleele, o mea a aiga e tatau ona puipui i ai, e le gata o tagata ia e ola, ua fao a latou measina, talu ai ni iuga e faaletonu, a o augatupulaga e fananau mai i le lumana i le a matua afaina i le lio lea.

Lau Afioga i le Fofoga Fatalai, o le ala lena e taua ai tele manatu nei e laga i totonu o le Maota lenei i le faamasinoga, ma o lea foi na ala ai ona naunau le Malo, toe teuteu atoa tulafono ia e i ai nei ua matua vaivai tele, ua tatau ona fai se iuga e faamalosia ai. Afai loa e silia i le tolu masina e le i deliver se iuga a se faamasino, e sili loa ona tapa ae faamavae mai. E leai se aoga e soona saofai ai i luga o le Nofoa ma faalue ai ae o lea e faatali tagata ia latou faaiuga. Lau Afioga i le Fofoga Fatalai, o le tulaga lena. Ma e le toe teuteuina foi upu pe a oo i tulaga ia, o lea e mafatia le atunu ia latou measina ua faoa. O lea e ala ai ona ave pea lau fautuaga i le Ofisao le Loia Sili faapea foi ma le Ofisa o le Komesina o Toefuataina o Tulafono e tagai i Tulafono nei, ma mafaufau faasamoona e i ai tu ma aganuu a Samoa. O papalagi e leai ni latou tu ma aganuu, e oo foi la i le misela, o lea e pisi ai nei i suesuega. A o tatou, e i ai a tatou tu ma agaifanua tatou te o ai e saili ni fofo. Ae leai ni fofo faapapalagi, e le o le faapea mai lava o le papalagi e fai ni suesuega, tau fai oso uma. E tatau ona fai ni suesuega faaalu ai tupe, a o lea tatou iloa ma malamalama lelei i le mafuaaga ua ala ai ona maliliu fanau ia. Ua maliliu fanau ua maua o tatou tagata i le fememeai ma le le mautonu. Lau Afioga i le Fofoga Fatalai, e taua tele mataupu nei e laga i totonu o felafolafoaiga nei a le Palemene.

FOFOGA FETALAI: Malo faafetai. Ua faafogaga mai lau Afioga i le Minisita, se i fai se saunoaga e logo malie. Ae leaga e pei ua fai si paopapa o lau saunoaga lea na fai nei, leaga o lea e manua finagalo.....

Afioga Hon FAAOLESA KATOPAU T. AINUU: Ou te faamalulu atu i lou uso a faipule. O le uiga o lau faamatalaga, a faapea e faatopelau faatopelau te'i ua sasi sao le tama pe falepuipui foi se isi, o le uiga lena o lau faamatalaga. E le.....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau afioga i le Fofoga Fatalai, o le ala lena o lea e....a vaai i faamasino ia e i ai nei e le lava, aumai faamasino mai fafo e faia. Ae le faapea o le nonofo ai lava nonofo ai lava. Lau Afioga i le Fofoga Fatalai, o le mau tauave o le toloa o faamasinoga e le maua ai se amiontonu.

FOFOGA FETALAI: Ia aoga le saunoaga a le Taitai e faatupu manatu e faamaite, o le lui lena e tatai i ai le amiontonu. Aua a tuai le faaiuga, o lena ua filia e le tiapolo ma le.....Se i saunoa mai po o le a se isi au tali.

Afioga Hon FAAOLESA KATOPAU T. AINUU: O lea ua avatu le faamaualaloga i le sui a faipule, si ou uso a faipule i Vaimauga. O le uiga lena o lau faamatalaga, ao lea ua musumusu mai le Loia sili ua faatulaga le faamasinoga i le aso 24 o Fepuari.

Afioga Sulamanaia Fetaiai Tauiliili Tuivasa: Ou te le faatautee foi pe..... e pau lava le agaga sa....o le sui usufono lenei ua maua le loto faamagalo, a silasila foi le Minisita i lau lauga sa avatu ua maua e lenei aiga le loto faamagalo. O la e sisila fofoga o le Atua. Ae sa avatu lou atalii e fai ma faataitaiga i nisi faamoemoe o lo o i ai. Leaga o la e tapuaia e le atunu. Ae ua maua le loto faamagalo ma faagalo. Alolofa i nei alo o le atunu, ae pei ua toe oso i luga le toto. Fai mai e falepuipui, a outou faalogo i saunoaga e **mauafine**. Faafetai i le susuga i le Taitai, faamalulu atu, ua vaai lava i lenei taeao i lou inaina e tau faamalamalama, talofa e, e leai e pei ona faailo atu o lea ua maua le loto faamagalo, ae aoga le case lea a lou atalii po o le faamoemoe e faatupu manatu ia te oe i lou tulai mai. Sa le tatau foi ona e tali mai, pau lava le mea se i silasila ane i ai. Ae o lou tali mai ma toe fai mai, a faanatinati ua ave e falepuipui, o ai e falepuipui.....e te fefe e fai faaiuga i tagata naa o le loto faamagalo, o la foi e faafogfa le atunu i le aiga lenei. Ua uma ona ou totogia le pasese o si ou toalua, ina uae oo mai lava i le masina ua tuanai, e pei e valea le fafine ua oo i le taimi foi lele ua alu tagi i luga o le tuugamau o lana tama, “sau ia, sau ia” ona o le tuai ona **delay** se i faamatuu atu le.....ona e le i oo ia outou, ona e le i oo i ai le mea lea. Na ou totogia lea o le pasese, e alu i o i Isaraelu le nuu paia. Toe alu ifo i Roma le nuu o le matou ekalesia, se i maua ai ni ona manatu. Foi mai loa le tina, ou fai atu, ua a? release le tama, o la ua i ai le tama i le ola e faavavau. Leaga na lavea lou atalii, sa maua le avanoa sa ola ai, lea foi na ou inaina ai lava e ave le tama i fafo. E pau lava lau tala na fai i lou atalii i le taimi na ou alu atu o la e taatia mai, ua fasi e le au palaaai ia na o faatino le faamoemoe. Son fai mai le fomai a fai lou taotoga e te ola, e te le iloa pe 50 50 lou ola ma lou oti. Faailoa mai pe fai lou taotoga, o le a le tali, tagi, sau loimata. Ou fai atu loa i fomai, e fai. Na fai le taotoga po o le 11:00 i le po faatoa fai le taotoga i le 4:00 i le vaveao po o le 5:00....Mataulia o le **internal bleeding o le mafaufau**. Na tali le Atua, ola. O le ola-ga la lena i le taimi lena, ao le vaiaso atoa sa naunau ai e ave. Sa fai i ai galuega, son, o a mea uma release, ia e maua le ola e faavavau. E pau lava lena o lou fiafiaga, ua i ai lou atalii i le ola e faavavau.

Ae o le faamoemoe o lou atalii, lea sa ou tuualalo i ai, se i silasila ane i ai le Minisita i le ituaiga....e le gata i lou atalii i le tuai ma le delay o mea nei, ae e lagolago i ai, leaga o le Vaimauga le aiga. E tulai mai foi e lagolago.....ae pei o lea ua toe tiga lou finagalo i lenei taeao. O le fai mai ua mautu falepuipui, e pei e foliga mai ua le vaai mai i lenei itu, ae ua vaai i itu ia na.....pei e faapena....e declare e lenei sui usufono, e maua le loto faamagalo. O lou toe tulai atu lena.

FOFOGA FETALAI: Leaga o le soifuaga e faapena, fai mai le salamo e 37. Fiafia lou loto i le Atua, aua e faia e le Atua mea uma e manao i ai lou

loto. Aua e te popole i se mea e tasi. E toe maua foi nisi atalii ma nisi atalii e faatele ai lou auvaa, e aumai e le Atua.

Ae tulai mai le Minisita o Faamasinoga.

Afioga Hon FAAOLESA KATOPAU T. AINUU: Faafetai Tuisamau mo lou loto faamagalo. O lea foi se lafoga ua le tau tamalii i lau faafofoga, ia tuu i le Atua.

Ae lau Afioga i le Fofoga Fatalai, ua faaiu atu lau folasaga. Ae lagolagoina malosi e lou itumalo o Vaimauga i Sisifo Nu 2, le Tala Faatatau o tupe faaopoopo Nu 1, ma le faaaloalo.

FOFOGA FETALAI: Malo faafetai. Ua oo mai le faasologa i le aiga Kapaneta i le Afioga i le Minisita o Aoga Taalogma Aganuu. Tulai maia e saunoa i mea sa laga e sui mamalu.

Afioga Hon LOAU SOLA KENETI SIO: Faafetai mo le avanoa i lau Afioga i le Fofoga Fatalai, i lenei taeao. O le taeao manino ma le taeao totoa. Ua tau ese foi lagona, i saunoaga o lenei taeao. Ae ui i lea, o lo o sisila fofoga alofa o le Atua, faamalumalu mai ona aao alofa aua le Fonousu a lo tatou Palemene. E manatu foi o lea ua uma ona paelago paia sa ma faiga o le taeao ma le aso, aua le Maota nei.

Le afio o lau Afioga i le Fofoga Fatalai, afio foi le Taitai o lo tatou Malo le afioga i le Palemia ma le mamalu o le Kapaneta, malumaunu o le tiasa i le afifio o Minisita lagolago ma lena itu o le tatou Maota i Taitaifono o komiti taitasi faa-Palemene aemaise o sui usufono mamalu, tamaitai ma alii faipule, o e faapena ona faia mai i le fufui. E faapena ona sufi ia upu fai a lo tatou Malo i ona tulaga. Ona manatu lea o le a le toe ta i tua le tili, lea na faapena ona saunoa le afioga i le Minisita o Afamasaga e paepae paia o le aso, e faigata o le tamaloa na faapena ona matematea malo. Na saunoa foi le Minisita ia Faaolesa, o le matou leo lea e faapai ai aua paia sa ma faiga o le aso.

O le Maota fai mai e poupou i le tofa ae fola i le faautaga, o lenei taeao ma le matau, ae a matau foi i le suiga o le tau, e ese le matautia o faiga a le Alii. O le laulelei ma le lagilelei o lenei aso. Ai ona o le aso o le a faapena ona tali ai le Malo, faafogafoga Samoa i le latou tapuaiga, i mea foi faapena na laga e sui usufono, e pei ona saunoa foi le Taitai anapo. O le tou pito laau e faapena ona lalaga ma lagalaga mea aua le....ua o lenei foi itu e le o i ai se tonu ma se atoatoa, aua o le upu moni lea. Ona manatu lea, o lea ua tu la vaatele ma tu lau folaua i lenei aso i le afifio mai ma le tala mai o aao. Viia le Atua.

Ae o le a ou agai e tusa ai ma mea na faapena ona lagalaga e le Maota nei. O le fa ai lea o tausaga, o lea ua alu le tausaga faaiu o le Paeaiga. Mai lava i le 2016 seia oo mai i lenei tausaga e lagona lava le iuleo ma lagona le agaga o lena itu i le fafetai mai i le Matagaluega. O le tele o taimi tou te

siisii le Minisita o Aoga ma tuutuu atu lava i luga, tuutuu atu lava, o le a oo lava i ao i le isi taimi. Ua ou toe manatua ai le faleaitu a Petelo, se faamolemole tuu au i lalo. E ui i lea, e le mafai ona taofia lo outou saafi e faagaganaina ai outou e le Atua, e tau mai le mea moni. I le lelei ma le atoatoa ona faatino galuega a lenei Matagaluega. E le o au la, e le o au e i ai le viiga lea, leaga e i ai le Matagaluega o e o lo o faapena ona vae ma lima i le auaunaga. E le faia la mo sou viiga, ae ave ai le viiga o le Atua. Ae faafetai i lo outou agaga saafi ma faaleo lo outou agaga i se auaunaga a lenei Matagaluega ua faapena ona oooo, i lo tatou atunu, aua la latou tapuaiga i alo ma fanau ina ia faapena ona atamamai ma popoto, o le auga lea.

O mea na laga ou te talaoa faalauaitele, ne i ou paepae ia sui usufono ona avea lea ma ou lapse. Ae o le auga atoa o le auaunaga, ua maea faataoto faiga faavae. Ua i ai ona taiala e mulimultaia e le Matagaluega ona vaega uma, aua le faatinoga o le auaunaga ina ia lelei ma atoatoa. O le tala a le atunu, e leai lava se faiva e asa ma sona maumau, o le upu moni lea. E leai se atoatoa iai matou, e i ai lava lapse o le galuega, e i ai ona to'a e faafitauli ai. O le mea lea, ia malu ave i fale i outou finagalo pe a faapea ua i ai se auaunaga ua le talafeagai i la outou silasila. A o fautuaga ua tuuina mai, e talia ma le agaga maualalo. O a outou fautuaga uma, ua uma ona ou faamaumau uma, e avatu i le Ofisa Sili, o le NUS, SQA, ave uma i ai, faaaoga fautuaga na aumai e sui usufono. Aua nei i ai se fautuaga e maumau leaga o le tofa ma le uta o le faautaga e fau ai. O le ala lea, faaleo nisi o fautuaga. O faiaoga foi nei, e fai mai e tele lava ina oo i le aso Lulu o le pay ma o mai i pasi. Ou te le faasese atu, ae matau le suiga o lenei vaitau ua ese, faiga faavae e galulue faatasi le komiti, ne i te i ua outou matau ai o faiaoga, leaga ua toniga faatasi lava faiaoga ma komiti, ma tea ladies. E i ai foi ma **teacher aid**, o latou o faiaoga fesoasoani, ua toniga faatasi uma lava. E i ai lava le taimi a oo i le Aso Lulu, ona ave uma lea i ai o tusi tupe a faiaoga e o mai latou e tala, ne i te i ua sese ai le sui usufono, a o lena. Ae e le mafai lava, o la lava e ave i ai le fautuaga leaga o la ua taatitia faiga faavae ae aoga le fautuaga e pei ona tuuina mai, e toe matimati ai ma toe autilo i ai le puleaoga. Aua e sao ai le Taitai, o le puleaoga e mataala e le tulai mai lea tulaga. O le auaunaga aua e le la ma le laina, ae o le a faafefea faiaoga mamao. Ae oo lava i le auafaigaluega a le Malo, e alu atu lava e tala le pay i le aso Lulu ma alu atu ai lava, a o lea tatou te faafesagai i Apia. Ne i te i ua outou tepa i tua, e pei o le tala vaai le lauamanu. A o le fautuaga e talia ma le faaaloalo. O le a tilotilo totoa foi i ai ia le Matagaluega. Ae ua uma ona taatia faiga faavae i ia tulaga. O le le lava o faiaoga, e sao lelei. O le galuega lena o lo o faapena ona tausoa. A mea foi o le tele o a tatou primary school. Ua tofu le nuu ma le primary school. E tiga lava ena o le valu aiga o le isi nuu ae taumafai lava e fai le primary school. Ona alu ai lea o resources ae le mafai ona tuufaatasi ma le isi nuu la e lata ifo. Faataitaiga manaia lava, o Falevao ma Lalomauga. O nai tamai

nuu lava ae lua faleaoga tetele lava la e tutu ai, ona alu ai lea o resources. Faiaoga i, faiaoga mai le tuaoi, e le mamao lava e va i le togafai. Ou te le fai atu la o le agaga foi lea ae o le matau lena. A tuu ifo i le statistics ma faamaumauga a le Matagaluega o lo o lava ma totoe a tatou faiaoga pe a fua i le aofai o tamaiti o le tatou atunuu, ae o le vailiu la lea o lea e eseese ai. E manao lava le sui usufono ia e fai foi ma le faleaoga o le latou nuu, ae le tuu faatasi. O lea lava e mafua ai le sioki lea. O lo o silasila foi i ai le Matagaluega.

Tofa Lealailepule Rimoni Aiafi: Lau Afioga i le Fofoga o le Fono

Afioga Hon LOAU SOLA KENETI SIO: E i ai se mea alii e.....

Tofa Lealailepule Rimoni Aiafi: E sao le saunoaga a le afioga i le Minisita, a o le mea lea e laga atu, a o le i faia ni faleaoga, e tatau ona avatu le maliega a le Ofisa o Aoga. O latou e avatua le maliega i le mea e tatau ona fai ma le mea e le tatau ona fai. Manatua o lea na ou laga kolisi, e fiafia tele tatou o sui mamalu e fai le kolisi i i, fai le kolisi i i.. O ai e avatua le faatagaga e avatu e le Matagaluega. O le Matagaluega e fuafuaina resources ma le mea e tu ai le faleaoga. E fuafua i le mea e tatau ona fai. Aua e te i lava ua college, leai se library leai se science lab leai uma na mea. Ona fai ai lea faapea sau le sui mamalu lauga faafetai ua i ai lau primary school ua i ai lau kolisi. Maumua le taimi, a o lau afioga lea e avatu le fautuaga, o le faaiuga e tatau ona avatu e lau afioga ma le Matagaluega.

FOFOGA FETALAI: O le a i lou finagalo lava pe e te tali i ai, e le i tapa e tulai mai.

Afioga Hon LOAU SOLA KENETI SIO: O uiga lava nei o Leala, a fia tu lava i luga e faalavelave o lea e fai le lauga e taua i le faalogologo. E le o Leala o le atunuu lea e agai i ai ina ia faalogologo mai. Ae fia lauga i le taimi i tua atu, lauga ia Fiame e le o au. Malie lau afioga i le tamaitai. O le a lau mea e fai, e toe talepe i lalo faleaoga la ua uma ona fai.

Afioga Hon Fiame Naomi Mataafa: Faamolemole lau afioga i le Fofoga Fatalai.

FOFOGA FETALAI: Se i tulai atu le sui Palemia..

Afioga Hon Fiame Naomi Mataafa: Na ona ou fia faamanatu i le Afioga i le Minisita, e lua isi Minisita faatoa toe oo atu ia te au.

FOFOGA FETALAI: Ia alofa lau Afioga i le Minisita o Aoga, se i fai fuafua ou aao, ua tai lavea ifo le Minisita o Tupe na e fealofai lava i ou aao.

Afioga Hon LOAU SOLA KENETI SIO: Lau Afioga i le Fofoga Fetalai, ua uma foi ona ou fautua i nai ou uso a Minisita, soso atu laititi lava leaga o a e alu lima ne i te i ua aafia ane ai. Faafetai mo fautuaga, e sao Leala i le tulaga lea. O le faafitauli lena ona ua tofu uma lea tamai nuu ma lea tamai nuu, ua utiuti ai la le **human resource** e pei o faiaoga. Ae o lo o lava a tatou faiaoga o lo o lava ma totoe pe a fua i le numera o tamaiti i totonu o le tatou atunuu.

FOFOGA FETALAI: Se i toe saunoa atu le afioga i le sui Palemia.

Afioga Hon Fiame Naomi Mataafa: Na o le pau lava le mea e fia faamanatu atu i le afioga i le Minisita, o lea ua saunoa nei, faafofoga mai le atunuu. A o lana saunoaga o le sui mamalu e, o le loto o le sui mamalu, e tofu le sui mamalu ma lana aoga ma lana kolisi. E te lauga la i le atunuu ae a le vaega lea, e i totonu o le Maota lenei? Aua o le uiga lena o le saunoaga a lau Afioga i le Minisita. E le o se finagalo o le atunuu, ae o le vaega lea e i totonu o le tatou Maota. Ite i ua e naunau i le faafofoga mai a le atunuu, ae o lea lava e....o le tatou lava mataupu. Ma e sao lelei lava oe.

FOFOGA FETALAI: Se i tulai mai...

Afioga Hon LOAU SOLA KENETI SIO: Faafetai mo le fautaga lau Afioga i le sui Palemia. O le aotelega o le agaga aua e taua le faalogologo mai foi o nai toeaiina, talu ai le tou omai tauanau e fai lea faleaoga fai lea faleaoga. O lo outou fia lelei faavalevalea i le itumalo, ma fai i ai a outou polokiki sese ae tou te le tilotilo i le anoa o le mea e tatau ona i ai. O lea la tou te fai mai e le lava faleaoga, a o ai e tuuai i ai? O outou ma le tauanau. O le ala lea o lou taumafai...

FOFOGA FETALAI: Ou te faamalulu atu, e pei e foligae agai lava le sese o lau Afioga i le Minisita.
Ae talu ai o lea ua tatou taunu i le malologa, faataatiae galuega mo le tatou malologa masani.

Na faataatia ese Taualumaga a le Fono Aoao Faitulafono mo lana malologa masani i le itula e 10:45 i le taeao ma toe faaaauau i le itula e 11:37 i le taeao.

Na toe faaaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2019/2020.

FOFOGA FETALAI: Ou te faasilasila atu ua toe amatalia Taualumaga ma galuega a le Fono Aoao Faitulafono. Malo le onosai ma le usufono. Ua ou manatu ua faaopoopo le malosi o lau Afioga i le Palemia ma le sui Palemia ma le Kapaneta, aemaise foi o le Palestine, Ofisa Sili o Pulega o Matagaluega ma Faalapotopotoga e faaaauau ai la tatou galuega.

Ae tatou te le i.....e tapa le saunoaga a le Afioga i le Minisita o Aoga Taaloga ma Aganuu, ou te muai tapa muamua lau Afioga i le Palemia, mo sou finagalo i le tatou itula faigaluega.

LAFO MO LE FAAAUAUINA O ITULA FONO

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:

Lau Afioga i le Fofoga Fetalai, ou te tulai atu ma le faaaloalo, o lea ua maea felafolafoaiga a le Maota i le Tala Faatatau Faaopoopo Nu 1 o Tupe, ma o lea foi ua tali le Malo. Ou te manatu ai i le maea ai o le tali a le Malo, ona tatou agai loa lea e auiliili le Tala o le Tupe, *Ina ia faaaauau Taualumaga a le Fono Aoao i le aoauli nei seia maea ona tali le Malo, ona iloilo auiliili lea o le Tala o le Tupe, ona tolopo ai lea o le tatou Fono mo le aso mo le aso a taeao.*

Faaluaina e le Sui Palemia ma le Kapaneta.

Na faamaonia le lafo.

FOFOGA FETALAI: Ou te tapa ma le faaaloalo lau afioga i le Minisita o Aoga Taaloga ma Aganuu.

Afioga Hon LOAU SOLA KENETI SIO: Faafetai atu i lau Afioga i le Fofoga Fetalai, matau foi i lenei itula o le aso o lea ua matu i fau, ua maea foi ona paleauau le taliga o le sua e le Maota nei. Lau Afioga i le Fofoga Fetalai aemaise le Taitai o le Maota aua le faasiligamalosi i la le tino, e faaaauau ai a tatou galuega e pei ona valaauna i ai i tatou.

Ua ou tulai atu ma le agaga faaaloalo, masalo ua malamalama le mataupu e tusa ai ma le le lava o faiaoga e pei ona ou taumafai atu. Ae o le tatou galuega e fau faatasi, o le mea foi lena ua i ai faiga faavae o le galulue faatasi o komiti, o le Ofisa o Aoga ma faiaoga. E masani lava ona ou lauga ai, pe a ou alu e tatala galuega o faleaoga. I matua ina ia faapena ona galulue faatasi ma le komiti o aoga aemaise o faiaoga. Aisea? E taua lava

le vailiu lea, le sootaga vavalalata lea ia faapena ona uluulu ma oo le lelei ma le tomai i alo ma fanau. O le tele ia o le galuega a matua e tatau ona fai. E masani ona ou faapea, matua siaki le komiti. Komiti siaki le puleaoga, ina ia faapena ona galulue faatasi. Vaai e le isi le isi ma faapena ona.....O le mea lea e taua mai o le o o faiaoga ae tiai le aoga, e sao ou te le faasese atu, ae o le galuega lena a le komiti. Vaai atu loa ua o ifo le solo valaau atu loa, e..e..e o fea o le a outou o i ai o lea faatoa, ioe fesili i ai ma fai i ai. O le mea foi lena o lea e i ai le agaga o le Malo ia o uma tatou nei o sui mamalu e taitai komiti, o i totonu o komiti. Afai e iva nuu o lou itumalo, e iva foi komiti e tatau ona e i ai ina ia faapena ona soosoo tauau le galuega ia uluulu ma oo le auaunaga i alo ma fanau.

O nisi o saunoaga, e faatino ia tatou sikolasipi, masalo e i ai se taimi ona saunoa lea o le Palemia, o ia o le Taitaifono o sikolasipi. Aua ua ese suiga i lenei vaitau, i le silasila foi a malo o lo o faapena ona fesoasoani mai ia i tatou i sikolasipi. Faataitaiga e pei o Niu Sila, e ese foi a latou foi faiga, ina ia faapena ona manino, o le semester muamua avatu tamaiti ua oo i le 75 % ia le latou total ona faapena lea ona apply online fai interview. Ua ese foi, ae silasila foi i ai le Malo ia latou foi faiga. Na e i ai le agaga faapena ao la outou matau mai, o le mea lava e tasi. O Ausetalia o lena ua faapena ona tuuвааtasi togi o le tamaititi ona ave lea i ai. O le taimi nei, o le PSC po o le Ofisa e pulea tagata faigaluega a le Malo, o i latou ia o lo o faapena ona gafa ma sikolasipi a alo ma fanau o lo o faapena ona tuuвааtati atu i fafo. E ese foi la le faiga a Ausetalia mai ia Niu Sila. O Ausetalia e na o le tamaititi lava e sitiseni Samoa, o Niu Sila e no, Ausetalia e no, e na o le tamaititi lava e sitiseni Samoa e mafai ona autovaa atu ma talia i totonu o sikolasipi a Ausetalia. Ne i te i ua le manino i ai le tulaga lea, ae masalo e saunoa i ai le afioga i le Taitaifono, e i ai se taimi o lana saunoaga.

O pili o tamaiti aoga, e pei ona faapena..... o le mataupu ua faafagogo tagiao foi e saunoa soo i ai ia susuga....e sao lelei, e vaevaeina ina ia faapena.....o lea ua faapena ona ou fai atu, o lea ua agai mai le pulega fou, vaeatu si tamalii lea sa faapena ona i ai, ua ta fiu foi e fautua e le taliaina se fautuaga a le Minisita. Ae atonu o lea ua afio mai le isi tamalii atonu e mafai ona ia taliaina ni fautuaga e tuuina atu, aua le vaevaeina o le pili ina ia gafatia e matua ona totogi i lea taimi i lea taimi. E oo ifo i le faaiuga o le tausaga, o la e faapena ona faaauau le aoga a alo ma fanau.

O faiga faavae e pei ona ou fai atu e sosolo lava le Matagaluega ma au nei i faiga faavae, ina ia faapena ona laugatasia. O lenei foi la tausaga o le sector plan mai le 2019 – 2024 lea ua amatalia. E faatauaina e le Matagaluega o Aoga ia aoga sauoo, o aoga amata, e tasi lea vailiu o lea tatou te faapea,...ae ese le taua ma faatauaina e atunuу atamamai ma lelei lo latou tomai, o le amata atu i lalo. E moni ai le upu foi lele tatou te faia soo lava, saili mai lalo malo. O lalo lava, o lalo lava e maua ai malo. O lalo i i, ave i ai le faataua, o lea foi ua faatauaina e le Malo aoga amata ma aoga faataitai. O lea foi ua i ai le fetuunaiga, masalo o le financial year lea o le a

sau, e faapena ona fesoasoani ai le Malo i le totogiina o ni isi o faiaoga. E silafia foi o lea ua i ai ia le tatou Tulafono e compulsory uma ai aoga a tamaiti 4 tausaga. O lona uiga e saili e le Malo po o le a le tupe e totogi ai, o lea la ua i ai fuafuaga, talatalanoa foi i le Minisita o Tupe ina ia faavanoa se seleni aua a tatou faiaoga ia, faiaoga amata.

O lea foi ua i ai le fetuunaiga, e fai le polokalame lea i gauta i le NUS, uma le Certificate i tai i le latou aoga foi lea i Sogi, fai le Diploma i gauta i le NUS. Ia faasolosolo atu ai lea fai le polokalame o le Degree, ina ia faapena ona aoaoina tatou faiaoga, quality teachers aua ia tatou Aoga Amata.

E i ai la le isi vaega foi lea ua tulai mai, ia o le Early Childhood Development po o le ECD. Ioe e taua foi lea vaega, ina ia mataalia ai ma mataituna ia le tatou atunu atoa. I le taimi lea i le afuafua mai o le tamaitiiti i totonu o lona tina, ma faapena ona agai mai ai, lea ua matauina ma ua fai i ai suesuega ma mautinoa, o i tonu lava le pogai o le poto ma le faaletonu. O le amatamata mai o le tamaitiiti ma afuafua mai ma le piitaga ma lona tina.

E i ai le semina na ma o ai ma Sili, o le Afioga i le Minisita, e taua ia. Na fai ai la le demonstration i le taua o le mea lea o le development. O au la sa ou alu i le mea o le milimili o le manava. Ioe, milimili atu la le manava ae ou te faalogo atu e pei e kiki mai foi lea. Ou fai atu loa i le instructor ae fai mai o lena e iloa e le tamaitiiti e le o le lima o lona tama lea e tagotago atu.

Ia ae o le Afioga i le Minisita ia Sili, o ia sa alu e tuutuu lona taliga i le manava o le fafine palagi. E tuutuu atu ou te vaai atu lava la o soisoi le Minisita. Ia toe tuutuu atu, soisoi, ia sau loa ou fai atu, o le a le mea la e te soisoi ai? Ae fai mai le Minisita, sole e sao lava, e iloa oe e le tamaitiiti. Ua ou tei lava i le fai mai, malo Minister. Vaai faalelei Leala lena e taumafai e faatu le isi sui e faapau ai oe.

Ia o le uiga la ma le anoa o le faamatalaga, o le moral story. Ioe, o le taua o le taimi lea. O tatou nei o sui usufono, o e ave le feau. Ioe, o Ofisa Sili o Pulega o Matagaluega ma tatou nei e faigaluega ma popoto ma atamamai, ave le feau i tua. Aua o i lea e tulai mai ai le faafitaluli.

Ioe, ulugalii foi ia e le i fuafuaina, nofo nofo lava te i ua pau le pepe. O ituaiga mea faapea, lea e ala ai ona tulai mai faafitaluli o olaga o tamaiti. Ae a mafai ona tatou foia mea ia, o le agai ina lelei na. Sau mai i, ECE, Primary Level, ia o lona uiga e sikolasipi uma fanau a lo tatou atunu, pe a lelei ona fuafua mai i tulaga ia.

O le ICT e pei ona saunoa foi i ai ni isi o sui usufono, na saunoa le Afioga i le Minisita e fitoitonu i ai fesootaiga, o le matou galuega e fau faatasi, galulue faatasi aua le aveina o le feau. E pei foi ona outou silafia, ua fia au cable la ua i ai? 1, 2, 3 tatou cables ia ua sau faatasi. Ua televave le sau o le... Ia o le agaga foi lena, ae o le auaunaga, ia faapena ona faasopoutu aua le Matagaluega o Aoga ma aoaoga.

O lea e saunoa nisi o sui usufono i le school net, le oo o le auaunaga ma le faaletonu. E i ai aoga ua le gafatia ua faaletonu a latou masini o le ala foi lena ua le mafai ona faaaauauina ai le auaunaga, ae o lo o taumafai. O le faamaumauga lea e tuu mai, o le 61% o Aoga Tulagalua o lo o latou faaaogaina le **SMBH** ma o lo o faapena foi ona ola i le taimi lenei. Aoga o Kolisi e 15 e 38%, ia o lo o faapena ona latou faaaogaina.

O lo o taumafai foi ia faapena ona faasopolia ni isi foi o auaunaga ina ia oooo. Ia o le olaga lea ua tatou ola ai, it's a totally different world. We are living in the world of technology nowadays. Ioe, ua alu i le atoa. Ioe o le google ia, o le mea lea ua i ai tamaiti, na ona leiloa lava o le tali, aapa i le google, ioe. $2 + 2 + 8 - 5$ square root of 10, e sau atoa i luga o le google. Ioe, ua vave, vave le aoaoina, ae le i mafai la ona aoaoina ai faiaoga nai toeaiina ma nai olomatutua lea e ala ai ona i ai le mea o le **capacity development** ia po o le **capacity building** se i aoao ai nai faiaoga i tua atu o le tulaga lea ua oo i ai, aua e le i maua atoa.

Ae sao ai la le Afioga i le Taitai, se o le pule aoga lava e mataala, finafinau, ua leva ona iloa. O le matou aoga i i Faletuamasaga, se e pei e fefefe nai olomatutua e tago i le mea te i ua pa. Ioe, ae o tatou e tatou te o atu e... ia o lea foi la ua i ai le fetuunaiga ma le Ofisa o Fesootaiga, ina ia vave ona fesoasoani mai latou o latou la e i ai le tomai faapitoa e faapena ona galulue faatasi ai ma le Ofisa o Aoga ma le matou Matagaluega ia oooo le auaunaga i tua.

Ia e i ai a se isi e le i faamalieina ae o lea o le a ou saofai i lalo ua lava lea, ui o lea...

Afioga Fuimaono Teo Samuelu Teo: Lau Afioga i le Fofoga Fatalai... ona o lea sa...

FOFOGA FETALAI: Se i tulai mai le sui usufono o Falealili Sasae....

Afioga Fuimaono Teo Samuelu Teo: Ona o lea sa taua foi i le taimi ua sola le vaega lea. Masalo ua uma vaega ia e tuuina atu ai se faaleleiga o le auaunaga lea. Ae ala la ona ou taua ma agai tonu i fesootaiga, ona o le galuega lea e pei e palasi i le vaega o Fesootaiga le School Net. E pei o lea ua provide e outou equipments nei, ae o le faafitauli i le matou pito, o lea foi ua uma ona tusi i le Regulator ma avatu foi le kopi o le tusi a le Regulator, e tau mai ai le latou feutagaiga ma le ISP. O le faalavelave, ia e le i oo atu tatou broadband i le vaega lea.

Ia e pei la e foliga e ala la ona avatu faapena, ina ia faamalosia ia tuutuuga ma feagaiga ia e faia e tatou ma tatou ISP, ina ia mafai ona improve le latou service, ma faaleleia atili auaunaga ia ina ia oo atu i tua. O lea la e taua uma mai ai lava ia nuu o le matou itumalo e aafia ai ma Sisifo, o lo o faaletonu le cover. Ia o le ala lena na ala ai ona avatu, ina ia mafai

ona silasila ane i ai, ina ia i ai sina fesoasoani mo le vaega lea. E pei ona tuuina atu ai se fautuaga faamolemole.

FOFOGA FETALAI: Tulai mai le Minisita.

Afioga Faumuina Asi Pauli Wayne Fong: E fia faasaoina le taimi o le Afioga i le Minisita lau afioga i le Fofoga Fatalai.

FOFOGA FETALAI: Ia se i tulai mai le isi sui usufono o le Nuu Tu Taulaga.

Afioga Faumuina Asi Pauli Wayne Fong: Faafetai lava, o lo o i ai le talosaga sa avatu lau Afioga, i le tulaga foi o le faleaoga. Ia e leai e manaomia i se taimi vave. Ae manaomia po o ua e taliaina lau Afioga? Ona ua fai si leva o le faleaoga o lenei nuu, masalo po o ua latalata i se 50 tausaga. Ia e faataatia atu i ina i lau Afioga, mo le taliaina po o le le taliaina foi.

Afioga Hon LOAU SOLA KENETI SIO: Ia faafetai i lau Afioga i le Fofoga Fatalai, o lea ua maua atu sui usufono e pei ona tutulai mai. Ia o lea foi ua maua atu lau Afioga i le Gafatasi, ia o lea foi ua fesoasoani mai le Minisita e fitoitonu ma ia tulaga, ioe, o le initaneti lea e te saunoa i ai, e le alu le mea lea i luga o le initaneti. E ese foi le... o le Samoa National Broadband e alu ai. Ae o lo o faapena ona faaauau le... ae faafetai o lea ua maua atu lau Afioga i le sui usufono.

O le mea lea e saunoa i ai le sui usufono o Faleata, ia o la ua uma ona i ai tatou faiga faavae. E fai le talosaga a le aoga ave sao lava i le JICA e pei o le Primary Level, ia o latou ia e fitoitonu i ai ma ua uma ona i ai le latou auaunaga lea i totonu o le tatou atunu, aua le fausiaina o tatou faleaoga. Ia ona avatu ai lea ma le supporting letter a le matou Matagaluega, ia e support ai, pe a faapea e talafeagai, ma vaai atu e sao ua tatau ona fai se faleaoga fou.

O le mea la lea lau Afioga i le sui usufono, ia tautuana ia e toe sau i le isi Paeaiga o lona uiga e oo atu i ai, ia ua faapena ona fai ia lou faleaoga. Ia ona faauma atu ai loa lea o se...

Susuga Laauli Polataivao Leuatea: Lau Afioga i le Fofoga Fatalai, sina avanoa lava ua ou matau ua lamalama faai le saunoaga ae sa taua i lau lauga faamolemole, e puupuu lava.

Lau Afioga i le Minisita, e pei lava ona ou tagi talatala atu i tulaga tau taaloga, ioe Loau, o lau tautua toto i le atunu o le Manu Samoa. Ua leai lava se alo o le atunu e le fia pei o oe. O le ala lena ua ou tutu atu i ou tafatafa ia e alofagia le lakapi a le atunu.

O le a uma tama lelei o fanau a le atunuu ona o i fafo. O le taeao lenei, o la e filifili ai alo o le nuu i Letui, o atu sao lava o i le 7's a Japan, le taeao lenei. O manumanuga na lau Afioga i le Minisita. O le a uma alo ma fanau a le atunuu le le toe foi mai i le Manu Samoa. Ia ua faapena ai lava ona o tatou coaches. Ua o tatou aumaia coaches e gata ai coaches o le lalolagi. Ae o le a le mea lea e tupu? O lena e i ina le tofa, uma foi tatou faiaoga. Muagututia Meredith, Pafuti Schaffausen, Sua Peter Schuster, ia o na e i ina. O lea e i inei resources, e fai ai le tatou au ae ia manaomia lau fesoasoani e alofa e faaleleia atili ia le tatou lakapi ia ma lou agaga faaaloalo.

FOFOGA FETALAI: Ia tulai mai le Minisita.

Afioga Hon LOAU SOLA KENETI SIO: Ia, o le mea lava lena na o ta musu ai i le tulaga na saunoa i ai le Afioga i le sui usufono. Ia o mea tau taaloga, ina ne i te i ua ta mimita atu faapea sa ou taalo, ae o le agaga moni, ia o lo o i ai lava Komiti Faafoe, o e o lo o faapena leaga o la e agai tonu lava i lakapi ia le Susuga a... Ae ua ese foi ia le divert o tatou taaloga i lenei vaitau.

Ioe, o le faatauaina, o taaloga uma. A outou matau foi i a tatou taaloga ia na mavae atu, ia o le tele ma le anoanoai o tatou pine auro, siliva, e agai foi i ai le tatou matau, ae e pei e lilifa se faamatalaga ona o la e tuliaupu mai le taaloga o le lakapi, ia o le tele ia o ona faafitauli ma mea e faapena ona le lelei ai le tatou au. Ia ae ou te talitonu lava o lo o taumafai lava ia le Pulega ina ia faalelei vaega uma.

O nai alo ma fanau ia e maua i a latou konekarate i fafo, a mea o auga ia o aute, auga ia o faigamea. O i fafo tamaiti, maua tupe o latou konekarate ia lafo mai i o latou aiga ma o latou matua e ola ai. Auga ia o aute. Aua tatou te popole tele i le tatou Manu Samoa. Faatoa tatou malo nei lava ia Toga ma Fiti i le 1980. Ioe, i le taimi o ou taalo. Ioe faatoa amata ona tatou malo ia Fiti ma Toga, a o tua atu, e na o le tatou malolo lava.

Ioe o lona uiga e le i leva tele ona maua mai lea tulaga i le tatou... ae o le isi mea i le matau, pei ua pupuu ma laiti ia tatou tama. Ioe, o lata lea matau. O le taimi o ou taalo, o au le isi center e pito sili ona lapoa ma umi, ae vaai ai i tamaiti i lenei taimi ua pupuu ma... O lona uiga, tilotilo pe o le tatou breeding e tatau ona fai. Ioe, tatou tilotilo i se isi faiga. Aumai ni papalagi ma ni... ioe, aumai ni tatou breeding process, ia maua ai ia ni a tatou tamaiti uumi ma lapopoa e faia ia le tatou... e le o se tala e fai ane ai. O le tala moni lava aua o la e fai i isi atunuu. Ioe, o le mea la lea, o le tulaga la e ala ai ona tau vaivai foi ia le tatou au i lenei taimi. Ia o lea na ou fesili nei ia Dr Tuitama, ae fai mai e sao o le mea lena o lea e tupu. Ioe ua immune ia le system a tatou. Aua le toe nonofo ia le isi Samoa ma le isi Samoa, o e vaai ia ni tou toalua i Iapani, ma Rusia ma Aferika i Saute, e

maua mai ai ni tamaiti uumi ma lapopoa. Ioe e fesoasoani i lo tatou au. E pei o foliga lea i lata ita matau i le laiti o alo ma fanau o i ai i lenei vaitau.

Ia ae a fua i le taaloga i lenei vaitau ua professional le taaloga, ia ua taalo lava i le tupe. Ia o fea la e i ai tatou tupe? Ioe e tagiilima lava o lo o fai ai ia si a tatou Iuni. Ia o le mea la lea, ia tatou galulue faatasi ia tasi lea o breeding lelei ia pe a alu ai Laauli aua e lelei ma tele ia ni a tatou props e maua mai ai a? Pe a faapea e faatino lenei...

Susuga Laauli Polataivao Leuatea: Lau Afioga i le Fofoga Fetalai, leaga o lea ua taua... e ala la ona ou faapea ona o lou Schmidt. Ioe, o le German blood, lea e mafua ai ae leaga e ese lau sport. Boxing and Politics is my sport.

FOFOGA FETALAI: Ia o le a la se fua i le sui usufono o Falealili Sasae?

Afioga Hon LOAU SOLA KENETI SIO: Ia vaai la i le taua o le mea lea e saunoa i ai ia le... o la e i ai lana sport. 10 fusuaga, 1 le malo ae 9 faiaina. Ae o le agaga moni tasi le la breeding lelei o le sui usufono o Falealili. Ioe e maua ai ni tagata ia ua tuai, ia ae o le tatou lea tilotilo...

Afioga Fuimaono Teo Samuelu Teo: Lau afioga i le Fofoga Fetalai, leai e pau lava le mea e faanoanoa ai, o le lavea fua o foaga ae le i faimisa. Leaga e leai sou faaiu afakasi po o Siamani. O lea lava e maua i totonu i inei. Ia ona o le le omai lava.

FOFOGA FETALAI: Ia malo, ia ua ou fautuaina le Minisita, e see ese loa mai lea vaega.

Afioga Hon LOAU SOLA KENETI SIO: Ia faafetai atu i lau afioga i le Fofoga Fetalai mo le avanoa. E faamalulu atu foi i le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau afioga i le Fofoga Fetalai...

FOFOGA FETALAI: Ia se i tulai mai ia le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea lea, e sao ia le fautuaga lea e aumai. Ae o le isi lena vaega o ou tiute. E te alu e sue ni breeders, ae aua e te taulamua ona vaai oe ia te oe. Ae o le tulaga lena ia e silasila i mea ia, ia a e fia maua foi ia se fautuaga ia ona e hire lea o Laauli.

Afioga Hon LOAU SOLA KENETI SIO: Ia faafetai i lau afioga i le Taitai. O le mea sili lea ua faataga mai. Masalo la e amata taeao, ae o lea se i ou tilotilo muamua i o, ia o lea e feololo lava. Ia e manatua ai lava ia Aperaamo, ioe ae na faanoi la ia Aperaamo ia Sara. Ioe faatoa tago ai lea e fai le breeding.

O le mea la lea, le malutauee o le malu nei, ia o le Maota aua Samoa, malu ave i fale i outou finagalo pe afai foi ua faapena ona le tautamalii se faamatalaga, o le aano moni, ia se i faapena ona penapena ia ma avatu foi ni motugaafa ia aua ia mea sa fesiligia ai foi lenei Matagaluega. O se auaunaga ua le tau, ia malu ave i fale i outou finagalo.

Ia manuia le Fono i lau afioga i le Fofoga Fetalai, maua lou malosi, ia aua le faafoeina o le Fonousu a Samoa, soifua.

FOFOGA FETALAI: Malo, faafetai saunoa i lau afioga i le Minisita o Aoga, Taaloga ma Aganuu, ma ua oo mai le faasologa i lau afioga i le Minisita o Tupe.

Afioga Hon SILI EPA TUIOTI (Minisita o Tupe): Faafetai tele i lau afioga i le Fofoga Fetalai, maua foi lenei avanoa e toe faaopoopo atu ai ia ni tali ma faamalamalama foi ni isi o Faiga Faavae o le Malo. Ou te talitonu foi e le umi, aua e pei ona silafia sa saunoa le afioga i le Palemia i le po anapo. E faamatala ma faamanino ia faiga faavae o lo o faataatia ai ia le Tala o le Tupe a le Malo.

O lea foi ua maua le lipoti o le Komiti o Tupe Maua ma Tupe Totogi, ia ua lava foi ia le taimi sa faatalatalanoa ai Matagaluega ma Faalapotopotoga, ma ua latou taliaina atoatoa ia le Tala Faatatau o le Tupe e pei ona faataatia. O lona uiga lau afioga, e na o le... e le tele ni mataupu ae o le a ou faasolo atu loa i le tuuina atu loa o ni isi o tali i fesili sa laga.

Masalo o le vaega taua lava lau afioga o le faataua lea o a tatou tupe maua. O le tele o tatou tupe maua o le a faapena foi ona mafai ona tatou tali atu ai i le tele o manaoga o Matagaluega, ia aemaise foi le tali atu i manaoga o afioga i sui usufono o le Palemene, ia aemaise lava i atinae ma galuega o lo o manao e faatino i totonu o alalafaga.

Lau afioga o le Tala Faaopoopo o le Tupe, o lo o faamatalaina, ia o le tele lava o tupe ia ua mafai ona faatino ai ni isi o galuega fou po o le faaleleia atili o ni isi o atinae o lo o faapena ona fai i le taimi lenei, o le fetuunaiga lea o a tatou tupe, sa i totonu o le Tala Autu o le Tupe. Ia o ni isi vaegatupe ua toe aveeseina mai i ni isi o Matagaluega, ona au le mafai ona gafatia ona faatino ni isi o galuega sa fuafua i ai ia tupe. Ua maua foi le avanoa e mafai ai ona aumai ia vaegatupe, e avatu e faasoa atu i ni isi foi o atinae taua, ua manatu le Malo ua tatau ona ave i ai ia le faamuamua i le taimi lenei.

Ia e momoli atu foi le faamalo i le afioga i le Sui Taitaifono o le Komiti o Tupe Maua ma Tupe Totogi, e pei lava i lau faalogo atu i le lauga i le po

anapo, e pei ua ia mauaina mai le ata lea o mea ua ave i ai ia le faamuamua i totonu o le Tala Faaopoopo o le Tupe.

O vaega ia o lea e pei ona taua muamua lea ua faailoa atu ai na amata loa ona fausia ia tatou galuega i le taulaga i Salelologa. E pei ona i ai ia le vaegatupe muamua ua tuu i lalo o le Matagaluega o Faamasinoga, ina ia amata ai loa ona tapena ia le tulaga o le design, ia ma fale e faasolo i ai le sii mai o tatou Ofisa o Faamasinoga mai Tuasivi, ia e faapena foi ia Fale Faamasino i Tuasivi o le a faapena ona faasee mai i Salelologa, ina ia faafaigofie ai foi le paia ma le mamalu foi o le motu i Salafai, ina ia faapena ona faigofie ona taunu mai i le taulaga e le toe sue ni isi avanoa e malaga atu ai i Tuasivi. Ia o lea ua i ai le tupe faaagaga e amata ai, ma tapena ia fale nei.

O le faamoemoe lava ia o le Tala Autu o le Tupe 2020/2021, ia o le a faapena loa ona tuu ia le vaegatupe atoa e fua i le design ia ma le faatulagaina, ina ia faapena ona faagasolo ma faataunuu ia lea faamoemoe. Mo le silafia foi e le Palemene, masalo po o le masina o Mati, lea o le a amata fausiaina ai le fale fou o le Faalapotopotoga o le NPF. O le a sii mai foi i tai i le taulaga ma o le a amata i se fale fogafalelua, o le a i ai ia le Ofisa o le NPF, ia ma o le a faavanoa foi ni isi vaega o le fale, e mafai ona faaaogaina e ni isi o Matagaluega po o Faalapotopotoga a le Malo, e manaomia tele lo latou auaunaga i le motu i Salafai.

Lau afioga o lo o tapenapena foi le tulaga i le faataatiaina o laina o le suavai faapea le eletise ina ia faapena ona tapena ma faamautu, i le isi 18 masina lea, aua o le talitonuga lea, o le a tele ni isi foi o pisinisi o le a avatu ia o latou lala i totonu o le taulaga, pe a amata ona faatino galuega ia a le Malo i Ofisa tetele o le Malo.

O lo o i ai foi le faamoemoe i totonu lava o le taulaga i Salelologa, o ni isi vaega o le Malo, o lo o i fafo mai i le taulaga, o le a faapena ona faagasolo loa ona fai ia Ofisa i totonu o le taulaga. Ia aemaise lava o lo o avanoa foi ia le tatou fogafale i luga o le tatou maketi, ia o le a faavanoa mo ni isi o Matagaluega e faatali ai foi ia fuafuaga mo le faatupeina o ni Ofisa tumau. O le talitonuga foi lava o le tatou Malo o le Faiga Faavae, ina ia faapena ona aumaia uma lava auaunaga a le Malo, e le gata i Matagaluega ae o Faalapotopotoga Tumaoti, ina ia faapena ona tuu uma i totonu o le tatou taulaga. Ia o le fuafuaga lena lea ua avatu tupe nei e amata ai ia le tapenaga, ia ona faasolo atu ai lea.

O le fuafuaga foi e tatau ona sifi mai ia le Ofisa o Leoleo mai Tuasivi e tuu i totonu o le taulaga, ona e taua o i ina o lo o toatele ai ia le atunuu. E tatau ona malupuipuia foi ia le tatou taulaga.

Lau afioga o lo o vaai foi i ni isi vaega tele e lagolago ai ia le tatou Tala o le Tupe Autu o le tausaga fou. Ia aemaise foi e pei ona tilotilo i le tulaga o le faaleleia o auaunaga. Ia aemaise lava ina ia faapena ona faafaigofie ona faaleleia ia le tamaoaiga, e le gata o le tatou motu nei, ae faapena foi i Salafai. E pei ona silafia sa talanoa ia le afioga i le Minisita o Atinae Tetele

i se faamoemoe i se vaa fou e faaaoga aua ia femalagaiga e faaleleia ai ia le saogalemu o femalagaiga i le va o Upolu nei ma Savaii.

Ia sa matou fono foi ma le Faalapotopotoga o le World Bank i le tausaga fou, sa amata ona faatalanoa i se tulaga foi lea e masalo ua oo foi i le taimi e tatau ona gafatia ia se faatupeina o le Faletupe o le Lalolagi o se tatou auala laupapa foi lea e alu atu i i Upolu, alu atu i Manono, Apolima ma oo atu ai i Salafai. Masalo o se tulaga e faafafia ai ia oo atu i tausaga ia pe 3, 4 i tausaga talu ai e pei e le o fiafia tele i latou e vaavaai ia ituaiga atinae ia aepeitai la i le talanoaga i le tausaga na tea nei, sa matou i ai faatasi ma le Pule Sili a le LTA, ia e pei o lo o i ai le avanoa. Ma o le a faapena ona faatalatalanoa atili, ina ia mafai ona maua se vaegatupe, e faatupe ai ia lena atinae.

E pei lava o le aoga ma le taua o lenei fuafuaga, ona o lea ua tapena ia le tatou 20/40 strategy. O le tulaga foi lea tatou tilotilo o le a le ituaiga tamaoaiga ma le soifua manuia e tatau ona tatou ausia i le tausaga 2040, pe a amata nei ona tatou faatino o galuega tetele taua nei, e faapea ona fesoasoani ai i le atinae o le tamaoaiga, ia ae faapena foi i le tulaga o le soifua manuia o le tatou atunuu.

Ia e pei ona mautinoa lava i le faataatiaina o le tatou Tala i le Tupe, mai tausaga ua mavae aua o lea o le a faaauau pea, o le faamuamua lava o i i le tulaga o aoga, ia ae faapena foi ia le soifua maloloina o le tatou atunuu. Ia o lo o ua faagasolo pea ia feutagaiga ma faalapotopotoga faavaomalo, ina ia mafai ona fesoasoani mai ma ua tuu mai foi lo latou lagolago i ai tatou. Pei e i ai le tupe tele lea sa aumai e le Faletupe o le Lalolagi, lea e i ai le \$8 miliona e lata i le \$9 miliona le tupe lea na aumai, e fesoasoani ai foi i le faatupeina o ni isi o galuega na manaomia i le taumafaiga lea i le tatou misela.

Ia o le 2 tausaga sa fai ai ia le feutagaiga ma latou, i le tulaga lava lea ina ia faapena ona tatou mafai a tupu ia ni faafitauli ma faalavelave faapenei, ae ia mafai ona vave ona taunu mai nei vaegatupe e fesoasoani ai, e le gata i le taimi o le misela, ia ae o le faaleleiina o le tulaga o falemai ia ma isi tulaga faapena, ina ia faapea ona fesoasoani mai ai i ni taimi, ina ia faapena foi ona tatou tali atu i manaoga o Matagaluega o lo o faatinoina ia galuega ia.

Lau afioga o le tulaga tau i le taua tele o tatou tupe maua lava i totonu o le atunuu, e pei ona silafia o lo o i totonu lava o le Tala o le Tupe lea ia le vaega e \$3 miliona lea e maua mai tatou dividends, mai ia tatou Faalapotopotoga Tumaoti. E i ai le manatu e tele se isi vaegatupe e tatau ona maua mai, i le taimi lenei o lo o faataatia foi ia aiaiga ma Tulafono a le Matagaluega mo Faalapotopotoga a le Malo, ina ia totogi mai ia dividends a Faalapotopotoga nei.

O le faafitauli lea e i ai nei, o le taimi e tatau ona totogi mai ai ia vaegatupe nei, ae o la ua tuu i totonu o tupe o la ua teu faavaitaimi i totonu o Commercial Banks. O lo o i ai la le fuafuaga e tatau ona vaavaai e fai se

Tulafono ina ia faapea, e declare loa le dividend e tatau ona totogi mai, o le priority lena. E tatau ona break ia term deposit, ae faafoi mai ina ia faapea ona fesoasoani mai i le faagasologa i le faatinoina o a tatou atinae. Ia o lo o i ai ia le fuafuaga o le a faatalanoa ia oo atu i le tausaga faaletupe fou, ia o le a faapena ona faatino ia lea avanoa.

Lau Afioga sa i ai se sui usufono sa saunoa faapea i le taimi nei o lo o tele tele le tatou surplus. Po o le a le mea ua tatou le faaaogaina ai. Mo le silafia o le tele o le surplus lea e i ai nei ona o le tulaga foi lea o tatou fesoasoani ia e aumai po o le faaletupe o le lalolagi po o le faaletupe o Asia po o nisi foi o tatou paaga e aumai le tupe a o le atinae lea e fai pe lima tausaga e faatino ai. O lona uiga la e mafai foi ona tatou faaaogaina tupe na, e tatau ona tatou mulimulitai i aiaiga na fai ai le maliega lenei a tatou Malo faapea faaletupe tetele nei. O le tulaga la lena e moni o lo o tele le tupe, a o le faalavelave e le mafai ona tatou tagofia leaga e specific lava i totonu o atinae tetele lea ua faatele...

FOFOGA FETALAI: Tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e faafetai atu i le Afioga i le Minisita o Tupe mo le folasaga, o lea e malamalama lelei i ai lou nei sui usufono. A silasila lau Afioga i tupe maua i totonu o le atunu, o la e i ai projections, a o actuals ia na i ai, o lena e 641 i le tausaga lea e 2018, lena e i ai le \$21 miliona lena e totoe. E le o faia, o lea ou te malamalama i le faaaogaina, o lea na fai projections o tupe faameaalofa ma tupe e aumai i tulaga mama. E le o tele la se tupe. O projections lea na i ai i le tausaga lea na tea nei faaletupe, e \$90 miliona lea na tuu e maua mai, a o le actual lea na taunu mai, na o le \$1.9 lea na maua. O le tupe foi lena na faaaoga. O lea e talanoa tatou i tupe totoe i a tatou lava domestic collection. A e silasila i ai lau Afioga, matou te malamalama i ai i le mea lena e te saunoa i ai. Faafetai.

Afioga Hon SILI EPA TUIOTI: Faafetai i lau Afioga i le Fofoga Fetalai. Sa i ai le fesili e faapea i le tulaga lea o le tatou procurement sa faapea i le tulaga lea ua tele tele variations ma le manatu e tatau ona taofia ma toe vaai lelei i ai. Mo le silafia e lau Afioga ma le mamalu o le Palemene, o ni variations, e eseese variations. O nisi variations ua ala ona fai ona ua toe sui designs. E ese le design na amata ai a ua toe fetuunai pei o le faataitaiga o le galuega la e fai i o i le Maliolio i le auala laupapa lea ua tau faamaea ona o le tulaga sa faia se suesuega a se kamupani mai fafo le DUAL DECK. Ua fai le lipoti fai mai ua lelei ae peitai ina ua amata le galuega ua toe maua atu ai ua faapea ua tau i le papa, ae peitai e le i lelei le faatinoga, o lea la na toe fai ai loa le galuega faaopoopo ina ia faapena ona toe eli pea i lalo ina ia mautinoa o lo o tau i le papa ina ia aua ne i tupu mai se faafitauli pe a tetele tafega, pe a mamafa foi le load i luga o le auala

laupapa lea la sa tele ai nisi o variations. Ia a i ai variations designs, e faapena foi ona i ai variations e tatau ona vaai i ai mo konekarate o lo o faatinoina le galuega, ona o lea ua ese le design sa i ai ma le tau, a o lea foi uai ai nisi tau faaopoopo ona o le tulaga ua sui designs.

O le faamoemoega lava latou ia o le tenders board, e tatau ona faamaitemea mai Matagaluega po o faalapotopotoga ia tumaoti aua o latou o lo o i ai le tomai po o le LTA po o le suavai po o le malae vaalele, o latou na o lo o faamoemoe atu i ai le Malo ina ia matua saili lelei le tulaga lea o designs po o ua talafeagai, fai dual deck ma tulaga faapena ona faatoa fautua mai lea i le tenders board. O le tele foi o tatou galuega ia o lo o faatupeina mai e le faletupe o Asia po o le faletupe o le lalolagi ma nisi o tatou paaga. Ia e pei foi ona silafia faapea foi e talia mai e faletupe na ona tuu mailea ia tatou tatou te faia. Masalo i tausaga taitasi toeitiiti le misi le masina ma omai a latou tagata e tilotilo po o lelei le faatinoga ma tulaga faapena. E le mafai foi ona fai ni variations se i vagana ua omai latou talatalanoa i le Matagaluega o Tupe ma le Matagaluega o le Works faapea le LTA ma latou ona toe vaavaai atili lea i ai, e tatau ona fai ni variations.

FOFOGA FETALAI: Malie le Minisita se i toe tuu atu le avanoa i le sui usufono mo Palauli le Falefa.

Afioga Hon Faumuina Tiatia Faaolatane Liuga: :Lau Afioga i le Fofoga Fetalai, ou te faafetai tele atu i lau Afioga i le Minisita mo le folasaga, lea sa taua o le design ina o le auala lea i Maliolio sa amata e le kamupani lea mai Korea. O le uiga lava lea o donor countries, e demand e aumai latou kamupani e faaaoga ia toe foi atu ai le tupe ae le lava lo latou silafia. O le mea foi lena o lea e tuualalo atu ai lava i lau Afioga i le Minisita ma le Minisita o Galuega esilasila lelei, e masani o tatou tagata i lo tatou lava siosiomaga. A o lea la ua aumai le kamupani lea ua maua e le gata o se kamupani e le aloaia tele faava o Malo, a o lea lava e manao e toe mimiti atu tupe ia e ave e latou i totonu e faagaoioi ai le World Bank, ADB ma isi. O le naunautaiga lau Afioga ina ia silasila totoa lau Afioga ma le tenders board ia mafai ai oan tatou finauina le aumai pea o tatou tama fanau ua agavaa ma latou iloa lelei lo tatou siosiomaga.

O le isi mea lau Afioga, o lea ua talanoa i le Komiti o Tauofoga. Na matou asia le falepuipui i Vaiaata, ua fa i le lima masina e le i toe faia le galuega lea, ua taofi, a ua amata ona elea uamea, ua amata foi ona afaina iviivi o lo o taatitia i lalo. O le talosaga, o lea e taumafai le Matagaluega ina ia faaitiitia le tau o lea galuega. O le mea la e ua i ai, ua tele atu le mea ua faaletonu i lo le mea sa tatau oan faaauau. Lau Afioga i le Taitaifono o le tenders board, e manaia lava pe a alu se tou asiasiga. Ua uma foi ona matou talosagaina le Matagaluega o Tupe, a toe alu se asiasiga a le Komiti, e tatau ona i ai so latou sui. O le taua ia, o lea foi e faataua e le Kapaneta le asiasi i galuega.

O le tuualalo i lau Afioga, se i silasila i vaega ia o le delay o galuega, o le taugata ma ua faaleagaina le tele o isi meatotino. Ma lou faaaloalo lava lau Afioga. Faafetai lava mo le avanoa.

Susuga Laauli Polataivao Leuatea: ia o le a tuu atu muamua ia le avanoa i le Afioga i le Minisita o Galuega.

Susuga Hon Papaliitele Niko Lee Hang: Faafetai mo le avanoa. E leai na ona ou toe soso atu i le mataupu lea e lagalaga mai ai finagalo o le sui usufono mamalu mo Palauli le Falefa. O le tulaga foi lea o tauofoga lea sa faapea e faia e le World Bank, o tauofoga ia lau Afioga o la e foi e silafia e le sui usufono a o Minisita o Galuega e le faia ai se finagalo o le tatou Malo ona e pule lava le world Bank ia i conditions o tauofoga, ma o le tauofoga foi e faia e le world bank, e open, e tatala i tua i atunuu la e i fafo. A aumai lava la le faaiuga a le world bank e le eligible tatou, o le tulaga lena. Ae peitai ane la le galuega lea, na toe maua lava e le world bank faaletonu o le kamupani Korea lea na faia le design. Lea la na toe fautua mai ai loa le world bank e ave loa la i le konekarate lona lua. O le konekarate lona lua la lea na maua loa e le tatou kamupani local lea e faatino ai nei le galuega. E pei la sa maua ai loa sa faaletonu le design i tatou inisinia lea na toe o atu toe vaai le galuega, lea la na mafua ai variations ia e faagaso i le taimi lenei. Ma o variations foi lena ua saunoa atu le Afioga i le Taitaifono, e le mafai ona faia pe a faapea e faaletonu mai lava le konekarate ia i le faaletonu o le latou evaluation o le design. Aua o mea uma lava o galuega e ave uma a i konekarate pos o galuega. E tatau la ona atoa mai latou konekarate ia aua ne i toe faatinoa ni variations. O le tulaga foi lena o la e faamamafa ai suesuega a le tenders board, a i ai lava ni variations e aumai e mafua mai i le faatamala o le konekarate, e le talia. O le faaiuga mautu lena o la e ua i ai i le tenders board. Vagana la galuega ia e tagai ane le Malo, silasila atu le Malo e faaletonu, o galuega la na e toe fai i ai le faaiuga a le Kabeneta e toe iloilo pe faamaonia ona o le mafuaga its beyond from the konekarate. A o isi mea faaopoopo, o mea e finagalo le Malo e faaleleia atili ai se galuega.

O le faataitaiga lau Afioga i le Fofoga Fetalai, e i ai le galuega sa pasia e le tenders board mo le police academy, o le vaiaso lea na tea na toe avatu ai le talosaga mo se variation. Na pau lava le tala a le Afioga i le Taitaifono ma lagolago i ai au nei, o le variation e le talia e le tenders board. Na o lelei lava le konekarate i le site vaai le galuega faatino, fai le latou bid, e aumai e laitiiti lava le bid a le konekarate lea. Sa masalomia lava la ma fesili i le alii lea e project manager i le poloketi lea a le Matagaluega o Leoleo, sa fesiligia lava, e lava lenei tupe aua e aumai bid a isi konekarate, e fai lava si maualuluga. Ia na faamaonia mai lava. Na o atu loa lea ma le talosaga e toe... e le i talia. O le tulaga lena o lea e faamamafa ai lava e le tenders board faaiuga ia. E le mafai ona toe suia se variation e

aumai ua toe sui lava e le konekarate ia le design ma sui mai le tau. A o variations ia e talanoaina, leaga ua tele faasea ua oo atu i lou ofisa lau Afioga i le Fofoga Fetalai, o galuega ia e tapena i Tiavea. O le tulaga o le variation lea mo le silafia foi e lau Afioga ma le... o le mafuaaga, na fai le survey muamua, saini uma le afioaga ua malilie i le taatiaga o le malae vaalele. Ae faatino atu le galuega ae toe faalavelave ane i ai isi aiga pe toalua ea pe toatolu. O lena la na mafua ai ona toe sui le site o le malae vaalele. Ae peitai ane la, pau lava lea o le location talafeagai e fai foi la si umi laitiit atu i lo le mea sa i ai muamua, o lena la sa toe fai ai le suiga mai le Pulega o le Malae Vaalele, tuuina mai le tenders board, ave i le kapeneta, fesiligia e le kapeneta, na iu lava la ina toe alu le asiasiga a le kapeneta se i faamaonia le tulaga lea. O le mea na tupu, ua sui atu le mea e taatia ai le malae vaalele ua fai sina maualalo, e tele le galuega e toe tanu. Ma e leai se isi mea e tatau lava ona faaaau pea i le tulaga lena ona o le mafuaaga la lea e mafai ai ona talia variations, ona its beyond foi i le control a le contractor aua e le i silafia nei mea. Ua uma ona pasia mai e le afioaga, ae o le a tapena le galuega ae toe faalavelavea foi i nai isi aiga. O lea la e mafua ai variations ia ona ua tele le faasea fai mai ua taugata. Ia o le tau lava lena lea foi la na aumai i le tenders board, approve e le tenders board mai fautuaga a konesale ma inisinia o lo o faaaaoga e le Malo, ave i le kapeneta, alu suesuega a le Kapeneta e faamaonia, lea la na faamaonia loa, lea ua faagasolo ai le galuega. Ma o lea foi la sa fesiligia e se sui mamalu le tulaga o le galuega, o la e faagasolo lava le galuega.

FOFOGA FETALAI: Malo. Atonu ua manino le faamalamalamaga a le Minisita o Galuega.

Susuga Hon Laauli Polataivao Leuatea: ia, o sina mea laitiiti lava lea lau Afioga leaga sa ou taua i lau lauga lou atugaluga i mea nei o variations lau Afioga. O lau lava tautaulemau lau Afioga i le Minisita o Galuega ma lau Afioga i le Minisita o Tupe, se i oulula silasila lelei i mea nei. A faapea o le tulaga ua le tuuaia le contractor, silasila la i le mea le faauluuluga na amata ai le master plan ina o mea nei. E le taugofie le sui sui. E faapefea ona fai nei mea? Ua umi tele ona faasolo taualumaga o mea nei i le tatou atunu, a o lea lava tatou te matau. O se mea e le lelei lona amataga ma lona fuafuaga.

FOFOGA FETALAI: E faamalulu atu i le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, sa ou manatu e malamalama le sui usufono sa i totonu o le Kapeneta. Ua leva ona i totonu o le Kapeneta ae o lea lava e laga maia ia

mea, ma talatalanoa ai foi i mafuaaga. E leai se mea e suia se i vagana ua aumai i totonu o le Kapaneta ma soalaupule ai le tatau ma le le tatau. E i ai le... ina ua tuanai Valelia sa toe fai uma ai lava le auala lea e alu atu i Apia e tau i Aleipata. O le tau na faatauofo ai e \$13miliona i lena taimi. Ae oo ina ua uma le galuega ae aumai le mea e tatau ona toe totogi e le Malo ua \$36miliona mai le \$13miliona i le \$36miliona. Na umi o matou falē i le Kapaneta le mataupu ona faatoa aumai ai lea o mafuaaga mo le faalavelave a aiga i le alu atu lava i inei e tau i tua, le mea lea o le o ane faalavelave taofi le galuega, taofi pe fia aso e taofi ai ae faatalanoa, o aso uma ia e totogi. Na alu alu lava le finauga iu ina vevela le talanoaga ona valaau loa lea o le pule o le kamupani mai Niu Sila, ona faifai lava lea o fetuunaiga pau mai le \$36miliona pau i le \$19miliona le mea na pau mai i ai. A o le mea lena lea e ala ai ona tofi komiti, a tupu mai loa ni mea faapea, o loa latou e faatalanoa. A o mea la ia e pei e fiafia aiga e fai, pei foi la o o, ae latou te le iloa o lea e taugata mo le Malo. E faigata tele le mea lea o galuega e fai atu, o le mea foi lena e tapa ai nuu i pulenuu ina ia fai faatalanoaga. O le ala la lea na ala ai foi ona ou malaga i le faiga o le auala lea e talanoa ai nei le Minisita, fono matou, e manao e fai le auala laupapa i tai i le auala sima. E tasi lava lau upu, e le faia i luga o le auala sima ae fai i uta. Pule outou po o le auala sima ae a alu i le auala sima e alu lava le isi auala laupapa. O lea ua oo i le taimi o le a fai ai le iuga ae toe omai lava toeaiina fai mai e mananao lava le nuu lea e fai i tai i le mea lea e alu ai le auala sima lea e tafe atu ai le Maliolio. Na ona omai lava o toeaiina e toafa matou feiloi ou faia atu, ia, a outou manao e sui, ua leai se auala e faia, o loa. Ia, e lei atoa le masina ae toe omai, toe tatalo mai, e malie ia le Malo ae toe fai le auala, ae fai loa i uta le auala laupapa lea o le Maliolio. Ia o le mea la lena lea na fai.

Lau Afioga i le Fofoga Fetalai, sa ou faapea e malamalama lelei i ai, ua fia tenders e avane i totonu ma talanoa a o saofai ai le sui lea a o lea lava e tau fesili. Lau Afioga i le Fofoga Fetalai o le faaopoopo atu lena.

FOFOGA FETALAI: Malo faafetai. Ia ua ou manatu... malie foi le sui usufono, e i ai le manatu...

Susuga Hon Laauli Polataivao Leuatea: Lau Afioga i le Fofoga Fetalai, malie lou finagalo leaga o lea na taua ua leva ona ou saofai i le kapaneta, e tuga le faalogologo mai a le atunu. E faapea ua ese le tala ananafi ese le tala nei. Malie lau Afioga i le Fofoga Fetalai, na o le lua ou tausaga, a o tenders uma na avatu, na ou tetee i ai, o variations na avatu, o la e mau i faamaumauga.

FOFOGA FETALAI: Malie le sui usufono. Ia o le tatou galuega e faapena ona fetuutuunai, e manatu foi e tuu atu avanoa a ia silafia foi e toe tuu foi le avanoa i le Malo. E faapena le fetuunaiga o le tatou galuega. O le

taimi atoa i le lua tausaga i le kabeneta, ae o faiga faavae foi na e tau mai i i le Nofoa, e malamalama foi i ai le tatou galuega e masani ai. O le mea lea ou te fautua atu ai i le sui usufono mamalu, e manino gofie le mataupu aua e le o se mea ananafi. E faapena foi le auala lea na alu i Faleolo, e oo ifo i le taimi e faatupe ai ua tagisia uma lava e aiga ina ia faatupe e le Malo le ulu, o le niu, e faapena. Ona toe sui foi lea o na mea. O le mea la lea, ia malilie ae faaaauau le saunoaga a le Afioga i le Minisita.

Afioga Hon SILI EPA TUIOTI: Lau Afioga o le upu mulimuli lava i le tulaga lea o tauofoga, o le tuu atu lava e fesiliglia, o le tele lava o taimi o lo o fai le fono o lo o fesili i le board, a o le tulaga lena e le faapea foi e faigofie. O isi variations o variations i le tulaga foi lea e talosaga mai contractors e leai se totogi na o le time variation. A o le tulaga lava e i ai le cost i le Malo ona o le tuai ai ona faatino ma faauma le konekarate lea ua i ai nei. O le tulaga lena lau Afioga, o lo o taumafai lava le Komiti ina ia faapea ona faaititia mea o variations. O le tulaga foi lena o lo o taumafai ai i tulaga lea ina ia mautinoa e lava le financial capacity o latou ia o contractors, aua leaga e tatau ona a le maea le galuega pe fai le galuega ae le lelei, e le faapea la e faafoi atu pe taofi e le Malo le retention lea e i ai le 12 masina ae tatau ona i ai le liability i le konekarate lea. A tupu mai se faafitauli i le 3, 4, 5 tausaga, e tatau lava ona toe agai le Malo e sue le konekarate lena ina ia omai e toe fai ona o le tulaga o le le faamaoni o le faiga. O le tulaga lena o lea ua i ai o le a toe faamalosi le Tulafono ina ia faapena ona pau lava le responsibility i le konekarate e le o faamaoni i le faiga o le mea. O ni shortcuts po o a nisi mea o i ai, o lea ua galulue ai le tenders board ina ia faapena ona aua ne i toe tupu mai tulaga o lo o i ai nei.

Lau Afioga ou te talitonu o vaega na o lo o i ai nei. O le taua foi... sa saunoa se tasi o sui usufono i le tulaga lea o le taua o malae vaalele ia e tatau pei o Tiavea i le tulaga lea e aoga foi mo le tamaoaiga o lena itu o le atunu ona o le tulaga lava ia i le suia ua me i ese ai mai Fagalii ona o le tulaga o le risk, o le popole lava ina ne i tupu mai se faalavelave. O lo o faapena foi ona tausia lelei pea o tatou malae vaalele i Maota ma Asau. O le faamoemoe lava ua tatau ona amata loa le feoaiga i vaalele e faaaoga malae vaalele ia aemaise lava i Savaii ona o le tulaga lea a oo loa ina louloua le sami ua le maua mai e tatou tagata tafafao latou vaalele ua faapena ona i ai. O le talitonuga foi i le aoga o le malae vaalele i Tiavea, o le tulaga foi lea ua tatau ona tatou tilotilo i nisi vaalele tau lapopoa o ATRS ua fai foi si toeaiina o nai vaalele ia Twin Otters e mafai ai ona o atu i Tutuila o i Toga o i Tuvalu ma tulaga faapena. E tele lava lava foi le aoga i ai o le atinae o le tamaoaiga o le atunu aemaise foi i itumalo o lo o i ai.

Lau Afioga, e momoli atu le faafetai tele i Afioga i sui usufono sa saunoa e uiga i le Tala o le Tupe. E mautinoa lava lau Afioga le faaataata atu o vaegatupe ia mo Salelologa, le taulaga ma...

FOFOGA FETALAI: Malie le Minisita o Tupe se i tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi: E faamalulu atu lava i lau Afioga i le Minisita o Tupe, e tasi lava si vaega le leaga o lea e tuufesili ai pea tagata, o lea na ou taua po o le a se galuega a lau Afioga ma lau Matagaluega i le mea lea foi lea e black list ai tatou i atunu i fafo aemaise i le mea lea i lalo o le SIFA ma mea na. A o lea e le i leva atu nei foi ona aumai le faamatalaga i nisi o atunu o la e ua tuu foi tatou i lalo o le latou black list, e le gata ia tatou a ua lavea ai ma Tutuila. Po o le a se gaoioiga o faia e lau Afioga ma le Matagaluega ina ia toe taumafai.leaga o le tatou atunu lea e tulaga lelei i le tele o mea nei. E lelei tele tatou reputation i mea nei, aemaise o lea e i ai tatou Tulafono e puipuia ai tatou mai vaega ia, ae po o le a se tulaga o faatino i lenei taimi mo le agai i luma. Ma lou faaalaoalo lava.

Afioga SILI EPA TUIOTI: Lau Afioga i le Fofoga Fetalai e ui lava e le i lauga ai le sui usufono, a o le tali puupuu atu, o le tulaga latou ia i le va o tatou ma le European Union, o lo o fai feutanaiga, sa laga foi e le Afioga i le Palemia i le fono a Taitai o Malo o le Pasefika le Forum, sa i ai le EU, o la e sa talosaga e tuu mai se taimi e talatalanoa ai tatou. A o le OECD latou ia, o le vaega foi lena sa faia lava le tulaga lenei i le monitor ina o tatou jurisdictions faapea, o la e ua upgrade tatou ua substantialy responsive. O la e compliance tatou i le va la o tatou ia ma le le OECD lea e faatinoa galuega nei ma suesuega nei, o lo o lelei tatou e le o i ai. A o le tulaga latou ia i le threat a le EU, ia o le tulaga foi e le o matua manino ia i latou i totonu o le latou council le tulaga e tatau ona i ai, a ua uma ona ave i ai le tatou tuualalo faapena foi i nisi o atunu o le Pasefika, ina ia toe tuu mai se taimi e toe fai ai fetuunaiga. Ia o le tali puupuu atu lea i lau Afioga.

Ia avea ia lenei taimi e faatalofa atu ai i si o matou itumalo ia tapaau ma Salelologa faapea foi auauna a le Atua i lo outou tatalo mai ma tapuai mai i galuega o lo o ua fai nei ma faamalo. O lo tatou sao foi lea i le tapenaina o faiga faavae ma Tala o le Tupe a le tatou Malo ina ia faapea ona maua, e le gata i le tatou itumalo, a ia faasalafa atu ia faapea ona manuia itumalo uma o Samoa, maua le soifua manuia, maua le atinae lelei, a ia faafetai le viiga ma le faafetai i le Atua. Faafetai mo le avanoa lau Afioga.

FOFOGA FETALAI: Malo faafetai, faafetai saunoa i lau Afioga i le Minisita o Tupe. Ia ua oo mai le faasologa i le Minisita o Tupe Maua.

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga mo le avanoa. E faatalofa atu foi i lau Afioga i le Fofoga Fetalai aemaise foi o lau Afioga i le Palemia, le Sui Palemia ma le mamalu o le Kapaneta aemaise foi o Minisita Lagolago,

aemaise foi o Taitaifono ma Sui Taitaifono o Komiti Faapalemene ma le la itu o le malu. Tainane foi le tatou faatasi ai ma Ofisa Sili o Pulega o Matagaluega ma Faalapotopotoga Tumaoti a le tatou Malo aemaise foi o le atunuu o lo o faafogafoga mai.

Lau Afioga i le Fofoga Fatalai o le a amata atu i le falepuipui se faamatalaga e le umi foi. O le tulaga i le tupe ua aumai nei i le Tala Faatatau Muamua o le Tupe mo le matou Matagaluega i le falepuipui, e faafetai atu i le Afioga i le Minisita o Tupe. O le tupe lea o lo o faamoemoe e fausia ai fale mo le aufaigaluega. O le taimi lenei i le mamao o le nofoaga ua i ai le falepuipui e lua sifi la e fai ai ona o le tulaga o le mamao. O le sifi e amata atu i le 9 e tau i le 5 ma le sifi o le 5 e tau i le 9 i le taeao. A tou tagatagai i ai e 16 itula le isi sifi ona o le faigata o le feoaiga i le po. Ae a uma le Maota lea ona vaevae lea i sifi e tolu, o le 9 i le 5 i le afiafi ma le 5 i le 1 i le po. O le sifi la lena e mafai ona o atu i le afiafi e malolo ai i le fale lea le sifi lea o le 1 e tau i le 9 i le taeao. E mafai foi ona faaaoga e le vaega lea e o atu e mafai lava ona api ai mo le latou sifi po lea e 5 e tau i le 1 i le vaveao ona o atu lea malolo ai i le taeao lea ae omai le vaega lea e 1 i le 9 e galulue. A malama le taeao ona mafai lea ona momoli mai i le taavale. O le agaga lena o le faamoemoe e fausia ai se fale apitaga mo le aufaigaluega lea, ona o le mamao tele o le nofoaga o lo o i ai i le taimi nei. O galuega i le falepuipui i Tanumalala o la e ua amata nei i le taeao ona toe amata. O la e na ave nei i le taeao le uta e amata ai loa ona fai ma faaee iviivi ma alu loa le falealuga o le galuega lea. O nisi manatu faapea i pagota pe mafai ona aumai e tuli i maota o faafeagaiga aemaise foi o nisi o le atunuu ia faasalaga. Sa fai le tulaga lea e le Ofisa o Famasainoga, e fai ma ave nisi e galulue i Faafeagaiga. Na fai fai le mafai ona faaauau. Ae o lo o i ai pea le polokalame a le Ofisa o faamsinoga o lo o ave ai ia vaega lea e i lalo mai i le 12 masina, e galulue i polokalame ia i le tapenaga....e le avatua i uta ae a fai faasalaga pe tuli itula, e tele lava o le vaega lea o lo o faaaogaina e le Victim Support e tai 4 itula i le aso ia faasalaga i ape 50 ma ona tupu itula. O faasalaga ia e mafai ai ona galulue, a maea ona magalo atu ai lava lea e le avatua i uta i le falepuipui.

O le manatu foi o nisi faapea efai ni braces i aao o nisi, po o le tauvae e faailoilo ai. O le mataifaioi lena a le Ofisa o Faamsinoga ma le Ofisa o Leoleo. Ona o tagata nei e faamoemoe e nonofo i o latou aiga, e le oo i ai la matou pulega e fafo mai o le falepuipui, o le matou lava galuega o le vaaia o e ua mafai ona faasala atu e le faamsinoga, e tuli o latou faasalaga i uta i le falepuipui.

Ona ou oo mai lea i le Ofisa o Tiute ma Tupe Maua. E i ai le manatu faapea mai, pe mafai ona matou connect pea ma le.... masalo o le MCIL, ona o latou, latou te siakiina **guard** foi ia o tiliva e o atu e leai ni lisiti. O la foi e galulue ai la matou Matagaluega, e tau tulituliloa le mataupu lea i tiliva ia e o i tua ae le faia ni lisiti, ona taumafai lea e faaoo atu i ai ni faasalaga o lo o i ai. O oloa, faataitaiga o taavale, e lua tiute la e i ai e

faatino ai tiute o taavale. O le tau ma le afi. E ala ona faaaaoga tau ia e lua, which ever the highest, e tau control ai foi le aumai o invoice pepelo. Ae i le matau a Matagaluega ia, ou te oo atu lava ua leva ona i ai ia tau ia, ina ia **fair** ma maua mai le tupe maua a le Matagaluega, i afi o taavale po o le tau foi which ever is the highest le tiute e mafai ona maua mai. **Controllingo le borders** o lea e faatalitali le x-ray.

E pau lava le agaga faafetai i le Malo ua mafai ona toe ave i Faleolo le...e faaaaogaina i le malaevaalele. Ona e tele o tausaga sa i i, e le ola le x-ray la e i ai. O le taimi lenei, faafetai ua mafai ona ave i le malaevaalele ma ua faaititia ai galuega a le Matagaluega, ua lava ai foi le aufaigaluega, e tasi le mea e galulue ai. Ma o la foi ua i ai x-ray e faaaaoga mo e, e malag mai Tutuila aemaise foi Fiti ma le tele o atunu, aemaise lava le tatou va ma Pago, o i ina lea faapea o lo o tele ai le fualaaau faasaina. E le mamao foi le tatou va ma Tutuila, e mafai lava ona o vaa, fetau i tai i le sami. E faigata lava le vaaiga ae faafetai ua ave i le malaevaalele, e fesoasoani tele lea mo le puipuiga o le agai mai i totonu o nei fualaaau faasaina. Ona e tasi lava le auala e faigofie ai ona maua o taifau, vane le paia o le Maota nei. E na o le lua lava a tatou **K9** o lo o i ai. O le tasi i le Ofisa o leoleo tasi le matou Matagaluega. E le taugofie ia taifau tulou i le tau. E tai NZ\$200,000 le tau o le taifau e tasi. Ae le gata i lena o le taugata o mea e fafaga ai ma le tausiga. Ae talitonu o lo o taumafai pea e tuitui i le Ofisa o Tupe, e fia mau mai se isi taifau e tolu ai taifau. Ona e le mafai ona faafaigaluega i le 24 itula, aua o Faleolo ma le uafu i Matautu o lo o faaaaoga ai taifau nei.

Lau Afioga e talitonu e pau ia o nisi sa fia malamalama i le matou Matagaluega. Faafetai foi mo fautuaga, e talia lava e le Matagaluega nei fautuaga, ona o lea tatou te mananao uma i auala. Ae faigata foi le suega o lafoga e le faigofie. O lea foi ua faaopoopo mai le Ofisa o Faatoaga mo **incentives**, sa le iai, ua alu atu ai foi le isi vaega o tupe maua. Ae o lea lava e taumafai le matagaluega, o le a lava le seleni e maua, o lea e mafai ona aoao mai ma tuu i le taga a le Treasury aua mea o lo o manaomia e le tatou Maota nei.

O le matou faamatalaga lea, ae se i oo sina tala i lou itumalo, i le Vaa o Fonoti. Faafetai i le tapuaia o le tou sui usufono, aemaise foi.....e tulaga ese foi la outou sui usufono i lenei vaitau. O suiga uma o alalafaga faapalota, amuia latou, ao lou sui, ua ou le iloa po o fea lea ou te tu ai. Ona o lou matai o Faleapuna, o au o le sao o lo matou aiga. A o lea ua o mai tuu i le itmaloo Anoamaa i Sasae. Ua le mautonu po o le a foi la le taimi e amata ai, pe a faapea e faatulaga ai lou sui, o lona uiga o le taimi lenei i Anoamaa i Sasae ua lua sui. A e ona o le Tulafono o lea ua fai. E moni lava faatoa amata i le toe lua vaiaso fai le faiga palota. E le benefit ai au. Ae le afaia, e usitai lava ma olo le fua i le mea ua ave i ai au e le Minisita o Faiga palota tuu ai. E talitonu le Palemene ma le faafogafoga a le atunu, o le a se taumafaiga a le Matagaluega e lua o lo o ou tauavea, e talitonu o lo o

galulue pea le aufaigaluega i le mafai e mafai ona maua ai se manuia o lo tatou atunuu.

O se matou tala lea lau Afioga i le Fofoga Fatalai, faafetai mo lou avanoa.,

FOFOGA FETALAI: Malo lava, ua oo mai le faasologa i le Afioga i le tamaitai Minisita o Tina ma Tamaitai.

Tofa Hon FAIMALOTOA KIKA IEMAIMA STOWERS (Minisita o le Soifua Maloloina): O le Minisita o le Soifua Maloloina.

FOFOGA FETALAI: Malie foi mai le upu a le Nofoa. O le Minisita mo le Soifua Maloloina.

Tofa Hon FAIMALOTOA KIKA IEMAIMA STOWERS: E toe faafeiloai atu i lau afioga i le Fofoga Fatalai i lenei itula o le aso. Malo foi le lava papale i le tau faafoeina o le Fonousu a Samoa. Faatalofa atu i le Taitai o le Maota lau Afioga i le Palemia, le sui Palemia le aiga Kapaneta, aemaise foi Minisita lagolago. E faapena ona faatalofa atu foi i lena itu i Taitafono o Komiti faa-Palemene o le tatou Maota faapea sui mamalu o le Fonousu a Samoa. Faatalofa faapitoa i Ofisa Sili o Pulega o Matagaluega ma Faalapotopotoga a le malo. E talitonu ma mautinoa o lo outou mamalu o lo o lima taumatau i ai le Malo, i la outou fautuaga aemaise o le faatinoina o galuega ma auaunaga eseese o lo o manaomia mo le atinae o si o tatou atunuu. E avatu le faaamalo, faamalo le galulue faaamalo le onosai. E faatalofa atu foi i lau susuga i le failautusi o le Maota, faapena le Matagaluega o lo o faapena ona tautuaina le mamalu o le Maota nei o Samoa. E faapea foi ona faafeiloai atu i le faafogafoga tapuai mai o Samoa, i Le Ao mamalu o le Malo ma le masiofo. O le Sui o le Fono o Sui Tofia ma le faletua, le afioga i le sui faamasino sili ma le Ofisa o faamasinoga. Le paia maualuga o Samoa i ona tulaga faalupe. Aemaise le faatalofa faapitoa i le aufaigaluega totofi a le Atua, o lo o nonomanu ma tapuaia o tatou faiva ma le atunuu atoa, aua se manuia mo a taeao.

Masalo o le a avatu ia lau faatalofa i si ou itumalo, ne i te i ua galo mulimuli. Ae ou te faatalofa aloaia atu ma faamanuia atu le tausaga fou i le faafogafoga tapuai mai a si ou itumalo pele o Gagaifomauga Nu 1. O le paia lava lea i sao e fa, le aiga sauimalau atipouniu ma le faasau. Lau fetalaiga i le tulafale, lau tofa Lavea le alii o le itu na e mua i malae, tausi vaatele aua le malae i Fanao faapea le paia i Safotu ma aiga. Ae le gata i lea faatalofa atu i si o matou nuu o Manase. Lau afioga Taito o lo o faapena ona taiulu, faapea foi i lau fetalaiga ia Tauasa.

Le aufaigaluega i fata fataulaga e fia o si ou itumalo o lo o faapena ona tatalo mo se manuia o Samoa. Faamalo le tapuai faamalo le tatalo, e lagona lava i le mafaufau le loto tele ona o la outou tatalo ma la outou tapuaiga.

Tatou faamoemoe pea i le Atua ma tuu atu i ai mea uma, ina ia faapena ona sologa lelei ma mafanafana pea la tatou savaliga i lenei tausaga fou ua amata.

Lau afioga i le Fofoga Fatalai, ou te talitonu e le tele sau faamatalaga e toe faia i le misela ma tulaga faapena, ua saausi foi le faafogafoga a le atunuu i le tele o taimi. Faapea foi, o lea ua tolu ia aso o le tatou mafutaga i le Fono, ua ou manatu ai, o le a se i agai se faamatalaga, ae le i agai i mataupu ia sa sausaunoa mai ai sui mamalu.

O le a agai muamua se faamatalaga e molimoli atu mai le taele o le agaga, mai ia te au o le Minisita o le Soifua Maloloina faapea le Ofisa sili ma le Pulega ma le Matagaluega, le agaga faafetai tele i le tapuaiga a le atunuu, a o feagai ai ma mafatiaga i lena tausaga ua tuanai atu, ona o le faamai o le misela. Faamalulu atu ona e iai foi le taimi na vesia ai ma fesiliglia po o fea o i ai le Minisita. Mo au nei ma le Matagaluega i le fuafuaga safaaataatia i le finagalo o le Malo e faia maia tonu, o le mea e aafia ai le soifua maloloina e **prioritize** galuega e tatau ona fai. Sa faapena ona faamuamua ia galuega ma auaunaga e tatau ona faatino, ma auaunaga e tatau ona manaomia. Aemaise o le faatinoina o le galuega mo le laveaina o le soifua o le atunuu. Samoa i ou tulaga faalupeina, o le a le toe oo i ai se leo, ou te faatulou faafetai le tapuai ua faamalo le tatalo, faamalo le faamalosiau ma le faamafanafana mai, a o feagai le Matagaluega ma le faatinoina o feau ma galuega, aemaise o togafitiga faafomai mo le laveaina o le soifua o si o tatou atunuu, aemaise ai o nai fanau laiti, sa pito i sili ona aafia. E moni ai le upu, o faiva e tapuaia e ae ma le manuia. A lea ua tali faaaliali le Atua i la outou tatalo ua mou malie atu tiga ma faigata. E ui ina motusia le mafutaga ma nisi sa pele, aemaise o nai fanau laiti, e molimoli atu faamaisega i aiga uma na mafatia ma aafia. Mai ia te au nei, le Pulega ma le Matagaluega, ia maua pea e outou le faamafanafanaga a le Atua. E faapena foi ona molimoli atu le agaga faafetai tele Samoa ona o lo outou agalelei ma lo outou alofa tulai e fesoasoani i auala eseese, sa outou faatino ai, e fesoasoani mai ai i le tatou Malo. I le mafatiaga sa feagai ma si o tatou atunuu. I ekalesia eseese i faalapotopotoga eseese, o le au faipisinisi, i Kamupani o tagata taitoatasi e ala i seleni o taumafa, o le faaoaloaina o falemai eseese. Aua ia gasegase faapena le aufaigaluega. Ua faamalo, faafetai tele le alofa ma le agalelei. Ne i galo se isi ia te au, ae o lo o ati le silafaga a le Atua. Ia alofa le Atua, o le sosia o le tamaoaiga toe faatutumu sautualasi mea ua faagaogaoina, ona o mafatiaga sa feagai ai i futia ua sola ma si o tatou atunuu. Faapena foi ona molimoli le agaga faafetai tele ia tatou paaga mai fafo, ma aumalaga sa faapena ona autovaa mai. E le gata o le fesoasoani i tagata faigaluega na o mai ma aumai mea faigaluega moomia e fesoasoani ai mo galuega laveai. Aemaise o i latou sa foai seleni ma fesoasoani eseese, o galuega laveai o le misela. O le matua tele lava o le lisi ua faapena ona faamau uma lava i latou sa faapena ona fesoasoani mai, ae o le manumanu i lo tatou taimi ae o lo o silafia e le Atua outou

uma. O le mea moni, ana le taunu mai aumalaga o aufaigaluega fesoasoani nei, mai ia tatou paaga i fafo, e taumate ma sa polepole le loto, pe mata e gafatia e nai o tatou tagata o lo o galulue i le falemai, ia galuega sa manaomia e Samoa i lena vaitau. E i ai lava le talitonuga o se tasi lea o fesoasoani tele mai ia i latou mai fafo, e talitonu na faaosofia i le musumusuga a le Agaga Paia o le Atua e auala mai ai le fesoasoani tele mo Samoa. Ona oo mai ai lea o se faafetai i lau afioga i le Taitaifono o le National Disaster Council, lau Afioga i le Palemia, sa e tu i le foe, ma e silasila mamao ma sa e le faataumuaalo, i lou tulai e taitai i taimi faigata, faatasi ai ma le lagolagosua malosi a Minisita uma o le Kapaneta. A o soua ma mafatia le atunu i le fesagai ai ma le faamai. Ua faamalo le foe, ua faafetai le faatoatoa, ua faamalo le tautua mo Samoa, faamanuia tele le Atua.

Lau Afioga i le Taitaifono o le Komiti o Galuega, ma faafoe le **National Emergency Operation Centre**, le NEOC. Le mamalu o Ofisa Sili o Pulega o Matagaluega uma ma Faalapotopotoga Tumaoti a le Malo, aemaise o le toatele o le aufaigaluega a le Malo sa galulue punouai i le ao ma le po. Talofa, ua outou sautia, laina ma mafatia. Ona o le tulituliloaina o se manino ma se taunuuga lelei o le faamoemoe, e pei ona nofo tatalo ma taputapuai mai le atunu. E avatu le faamalo tele i le galulue punouai. Faafetai le tautua atunu e ala i tou galulue punouai sa outou feagai ai.

E momoli foi le faafetai tele i lau afioga le Minisita le pulega ma le Matagaluega o Tina ma Tamaitai le Atinae o nuu ma afioaga ma Agafesootai. E tele le fesoasoani sa maua mai i le Matagaluega, aemaise o le tali mai, o le lagolago o le saofaiga a le pule mamalu, o le saofaiga a alii ma faipule e ala i sui o le Malo ma sui o nuu ma sui tamaitai, i le tau sailia mai o i latou e tatau ona tui puipui, i nuu ma afioaga taitasi. E le gata i Upolu nei ae faapea foi i Savaii. Faamoemoe o le a faaaua pea ma faamausali le tatou galulue faatasi i le agai i luma i soo se vaega, aemaise o le toe fafagu mai o le faaolaolaina o komiti tumama. O se tasi lea o faamuamua ua i totonu o fuafuaga faataatitia o le Matagaluega aua se Samoa manuia, ma se Samoa soifua maloloina lelei mo le agai i luma.

Ne i te i ua galo ia te au si au uo lea. Ae faafetai i le afioga ia Nanai Lavetiga Tuiletufuga ma le Matagaluega o le Savali, ma la outou ofisa. Sa fai ma le Ofisa o le malo, o le **Government Press Secretariat** i le gafa ma le faasalalauina atu o faamatalaga, i aso taitasi. Aemaise le Palemia sa tu i le foe i faamatalaga sa tuuina atu aemaise o faamatalaga sa avatu i fafo. Ao matou galulue ai i le faamai e pei ona silafia.

Ae le faaitiitia ai le taua o sau faafetai tele i le aufaigaluega uma lava a si o matou Matagaluega a le Soifua Maloloina, i Upolu nei faapea ma Savaii i so o se vaega. E faapitoa i le vasega o tamaitai ma alii fomai, faapea le vaega pito i toatele o le auauanaga, le au tausi soifua. E le galo, ma ou te le iloa foi po o afea e galo ai. I lau matau i la lea lava vaitaimi, i lo outou galulue punouai ma le leai o se faasea, galulue ma le filiga ma le le

faalogologotiga, i le uumi o taimi faigaluega, ae sa vaai pea lo outou naunau e faatino ma faaaauau galuega ma outou fofoga tausaafia. E masani ona ou ote, ae a matua sui lau vaai i lena taimi i la outou gaoioi ma la outou tautua. Aemaise la outou galulue faatasi ma le felagolagomai, ma i latou mai atunu mamao sa ofoina mai le latou tautua ma le fesoasoani mo si o tatou atunu. Afai o outou faafofoga mai, e molimoli atu le faafetai tele, malo le onosai, malo le tautua atunu. Lau Afioga i le Ofisa Sili ma le Pulega, Leausa, ua faamalo lava le lava papale, faamalo le onosai faamalo le galulue, e le i faigofie ona o le tele o galuega, ae sa tele foi faafitauli ma luitau sa feagai ai. aemaise o faitioga ma tuuaiga. Ae faafetai tele atu, sa maua pea le toa, faafetai i lo outou amanaia o sau tuualalo atu mai lea taimi i lea taimi. Aua sa faalagolago i outo tagata, i outou aao le soifua o si o tatou atunu, ao feagai ma taimi faigata ona o le faamai o le misela.

Lau afioga i le Fofoga Fetalai, ona ou oo mai loa lea i le sui sa sausaunoa, ma agai mai i le Matagaluega, i le tolu lenei o aso, Aso Lua, ananafi ma le aso. Sa ou faalogologo mai ma le totoa ma lou agaga fiafia, toetiti sui mamalu sa sausaunoa, sa momoli mai, sa momoli atu, outou moomooga ma faamaisega ae le gata i lea, sa molimoli mai la outou faafetai, o le mea moni lava ia, i le Malo e ala atu ia au nei ma le Matagaluega, ae le tau faafetaia le galuega. Ae o le mean a ou fiafia tele ai, i le maea ai o sausaunoaga a sui taitoatasi, ua ou toe faalogo i le motto lea a le kolisi lea a matou i gauta i le Don Bosco i aso o fai tuugavaa. Sa outou faaalia e tasi le fatu tasi le loto unai malosi mai fautuaga tatou galulue faatasi. Ua malo faafetai malo lo outou tautua malo. E pei ona ou tulai i le taimi ua sola, tofu tatou ma talitonuga. O lou manatu e le o outou finagalo ia, o lo outou finagalo e ese ai sou manatu. Ae atonu o se auala foi lea a le Alii, tatou galulue faatasi mo le manuia o Samoa ma ona tagata.

E toa lua na i sui usufono sa sausaunoa, ma o lea sa ou taumafai e sue mai ia tali, aua o le uiga lava lea o au nei. A ou le malamalama i se mea, ou te tulai ou te alu e saili ma ou te le manao e pepelo se isi. Le sui mamalu sa fesiligia le mataupu lea i se **pandemic plan**. Sa ou tulai ma ou alu atu i le Ofisa sili ma le au vaega fomai ia, o lea la e le gata i le pandemic plan, o lea e fia iloa tino ma fia faasao uiga o upu nei e vave ai ona malamalama. O le pandemic, o lea ua aumai le tali, e faapea mai lona uiga, o le pesia lea o se vaega tele o le lalolagi po se atunu i se faamai. O le faataitaiga ua aumai, 1918 le **Spanish flu**....O le misela, e ui ina sa pesia ai Niu Sila, Toga ma Fiti, ae le i oo i se tulaga e taua ai o se pandemic. O le **epidemic**, o se faamai lea ua pesi ma afaina ai le faitau aofai o ona tagata toatele i totonu o se atunu se tasi po o ni atunu, ae le aofia ai se vaega tele o le lalolagi atoa. E faapena la le misela. O le **endemic** o se faamai e tupu i totonu o se atunu i taimi uma. O le faataitaiga o le **malariai** Solomona ma le tele o atunu Asia. O Samoa nei lea e i ai faamaumauga ua tuuina mai e faapea mai, o le **typhoid**, e tusa e valu i le sefulu cases e aliae mai i le masina. O le fesili la e pei ona tuuina mai e le sui mamalu, ma faapea

mai, mo se pandemic plan ma faapea mai faatoa fai ia Novema 2019. O lea ua faamalamalama mai e le sao lea tulaga. O lo o i ai ia mea uma nei, **pandemic, epidemic, endemic**, o lea o lo o i ai le **avian and pandemic influencer preparedness plan** o le 2008. Sa fai i le taimi o le **avian influencer**, sa vevesi ai le lalolagi. O lea ua silasila mai i le tusi lea, ua maea ona review ma toe faafou o lo o i ai uma lava fuafuaga o plan, o togafitiga faafomai, ma poto eseese ua leva ona taatia le tatou plan lea Samoa 2019 Medical.

FOFOGA FETALAI: Malie le Minisita se i tulai mai le sui usufono mo Salega.

Tofa Olo Fiti Afoa Vaai: Faafetai i le folasaga malamalama a le tamaitai Minisita. Ae ua ou faalogologo atu i le tulaga faapea e le sao le tulaga na ou fautua i le pandemic plan lea. Sa faatoa ou lotea le faatalanoaina o se pandemic plan, a le tatou Matagaluega i le aso 3 o Oketopa 2019. Ona i ai lea o le faatonuga ina ia tuu mai se **draft** o le **pandemic plan** i luma o le....o lea la e i ai i i, ia te au mea ia. O le aso 12 o Novema, lea ua i ai le kopi lea o le pandemic plan a le tatou Matagaluega. E pei ona ou fai atu se fautuaga ma se tuualalo i lau afioga i le Fofoga Fetalai ma lau Afioga i le tamaitai Minisita, e le aoga ona tatou toe suesue i nei mea, ma tau mai po o ai e sese a o ai e sao.

FOFOGA FETALAI: Masalo e le taua...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E i ai le mea lea ou te tulai atu ai, se i e.....

Tofa Olo Fiti Afoa Vaai: ma tau mai po o ai e sese ae o ai e sao.

FOFOGA FETALAI: Masalo e le taua lea tulaga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau afioga o le mea lea ou te tulai atu ai, se i tuu pea i le Minisita e faasalalau mai ia mea ia e aoga mo le atunu, ae o le taumafai o le Minisita e faasalalau mai, ae tulai mai le sui usufono e faaali mai foi lona ia poto, e le o ia o se fomai. Ae sili ona faasalalau mai pea mea ia, o lea e fia faafogafoga ia le atunu. O lea lava e i ai ia plan a le falemai, ae se i faasalalau mai. Ae aua le faalavelave fua ia le tagata e seu ese le matapu, se i faamalamalama mai o lea e fia faalogologo ia le Maota lenei.

FOFOGA FETALAI: Malo, malie le sui usufono o Salega.

Tofa Olo Fiti Afoa Vaai: Lau afioga i le Fofoga Fetalai, o lea ua tuuaia e le Minisita au, e sese ia mea ia na ou fai atu ai. Ia sese o pepa o le tou Matagaluega.

FOFOGA FETALAI: Le sui o Salega, o lea ua maea ona faamalamalama e le Minisita i le taimi ua sola. Ia lea la ua toe aumai foi ia le tulaga lea, ia e leai e le faataumatatao, o le a lava le mea e aumai e le Matagaluega, tauaaao mai e le Minisita i luma o le Palestene, ia o tulaga aloaia lena. Ia ae malie e faamalulu atu i le sui usufono mamalu, o lea foi sa tatou siita ai i le tulaga o le Fonotaga talu ai. Ia ae o le a tatou toe foi i le ogasami lena, ona manatu lea, e le malie ia lo tatou toe foi i le fetotoai o saunoaga a sui usufono.

Tulai mai ia le Minisita o le Soifua Maloloina e faaauau le saunoaga ma faamaea mai ia le faapupulaina o mataupu.

Afioga Hon FAIMALOTOA KIKA IEMAIMA STOWERS (Minisita mo le Soifua Maloloina): Faafetai i lau afioga i le Fofoga Fetalai, faamalulu foi i le sui usufono. Ua ala la ona ou taua ona o lea e i totonu o le lauga ma o lea foi sa fesiligia ai ia mea ia o plans ia o lena ua outou silasila mai, Influenza, Preparedness, National Aviation, Pandemic Preparedness Plans amata mai i le 2008 o lea lava e faaauau mai ia tatou mea ia.

O le isi tusi lea o plans ia i le 2019 ia ma le tele o isi fuafuaga a le Matagaluega lea ua faataatia, Health Sector Plan lea na maea ia Iuni i le tausaga lea na tea nei ae e le i tupu le misela 2019/2020, faaauau atu i le 2029/2030. O le 10 tausaga i luma, maea foi toe iloilo, toe review ma toe sailiili, po o mautu ma lelei, ia ona toe fai foi lea o isi fuafuaga. E faapena se tilotilo a le Matagaluega.

O le mea la lea ou te fia faailoa, faafetai tele. E pei foi lava ona taua e le sui usufono mamalu i le taimi o lana sausaunoaga e ese ai ia isi fetaliaiga mulimuli ane, ou mimita lava ma ou fafia, ma ua faalototele ai foi ia lou nei tagata vaivai, i le lagolago lea na tuu mai ma sausaunoa mai e faapea, e leai so matou manatu matou te tusilima po o fea o i ai le sese. Ae ao ona tatou velo aso faatasi i le taimi lenei ma o tatou galulue malosi, faamalolosi i a tatou faiga faavae ma fuafuaga faatino i le faamaoni, ma ia i ai ia ni tatou plans.

Lau afioga i le Fofoga Fetalai ma le mamalu o le Maota i o outou tulaga faalupeina, paga lea, e pei foi ona sausaunoa ananafi ia le tele o isi sui usufono. Ia e tele ia aoaoga ma tele foi lesona, faapea mai le toatele o sui usufono sa saunoa ai, ia e aoga foi ia mea tutupu. Ia e le o toe tilotilo le Malo e ala atu i lenei Matagaluega i fatia ua sola. O le taulai a le Matagaluega lea ua i ai, taatia ia tatou fefinuaiga lea ma tatou o e fai le mea lea na outou saunoa mai ai e uunai malosi mai ia te au, tatou o faatasi

e palasi faatasi, ina ia aua, aua, aua ne i toe tupu mai ia se mea faapea ia Samoa i se taimi o lumanaí.

Ua faataatia ia o lena ua outou silasila mai, ae o le mea lea e tupu, e tele plans ae o le implementation ua tatau loa ona palasi loa ma faamalolosi uma e fai. E pei foi ona ou fai atu ananafi, o le mataupu na tupu, o le responsibility a tatou uma lava. O le tama ma le tina i totonu o le aiga, e tatou te talanoa soo lava o tatou o matai fainuu, palasi i totonu o pule mamalu a alii ma faipule, aua o i tatou te maua ai ia le faamalosi, aua o le fono le e pito maualuga i totonu o nuu ma afioaga, na ona fai mai lava o toeaiina, o outou uma na le aumaga outou uma na, palasi e ta 9 taeao ua savali i uta. E a, sue mai le mea lea, faatino uma mai le mea lea, o le tatou malosiaga lena e pei ona ou faafetai i le afioga i le Minisita, ia ma le Matagaluega o Tina ma Tamaitai.

O tatou e faia tonu, i so o se mea i totonu o tatou aiga, tatou o e fai ae ou te tatalo ma le malosi, o lo o i ai sina toa laitiiti, o lau lava tilotilo i totonu o le Matagaluega, a mautu resources uma e moomia, ona faatoa mafai lea ona siitia le auaunaga. E le gata i personnel, i fomai, o tausi soifua, o equipments, tools, vehicles mea uma, e palasi ai i tua le aufaigaluega, lea ua i ai le fuafuaga, ae loa aoga, palasi i totonu o aoga, e amata ona update.

O lea e pei foi ona fesiligia ia ma lipoti mai foi ia le toatele i uta, e fia maua le pepa mo le enrollment o tamaiti aoga, ua maea ona ma feiloi ma le Minisita o Aoga. Ua faapena foi ona feiloi ia Matagaluega e 2, ma o le ua lipoti mai ia te au ma ou toe lele i uta ou fai atu o le a le tou tonu ua fai? Ia o lea ua logo mai au e lea vaega o le matou Matagaluega, o lea o le a faaaoga ia le card samasama o le tui puipui o le misela aua o le e talitonu ua soo uma tamaiti aooga i le tui lea.

Ae mo le booklet lea e moomia mai i lalo o le Tulafono, e i ai uma tui puipui ae e pei ona ou fai atu, tuu maia o le tausaga lenei e mafai ai ona faatino ia le tulimatai o le faatinoga uma o le tui puipui, ia ona... e tele tupe a le Malo e alu ai pe a o mai ua leiloa, leiloa e oo atu foi i le faaiuga ua toe... O le mea lea e fai nei i uta, ua leiloloa uma le tele o booklets na ave.

O le isi foi mea, ia o lena e silafia e ala i lipoti ma faamaumauga a le Soifua Maloloina sa tuuina mai e ala i lea taimi ma lea taimi, ia o nai tamaiti uma ma nai fanau na aafia, ia e leai ni isi na fai ia ni tui puipui. Fesili atu po o fea le mea na tui ai ae fai mai ua galoo, aua e saini uma lava ma teine fomai po o ai lava na faia tui e leai ma ni mea o maua, aua foi e le i faia ia ni tui puipui.

Ia o se faapupulaga lea, e tele le galuega ua fia fai, o le isi mea ua ave i ai le faamuamua, ia o le uunaia ma le faamalosia, Primary Health Care, Public Health, le Community Health. Ua moomia ia le avatu i tua o services, i mea o lo o i ai tagata, communities. E pei foi ona talosagaina ia le toe faaolaola mai o Komiti Tumama, fia fai pe ana tele ni tupe se i aumai e faatino ai loa. Ia na fautua mai foi ni isi e faatoatele ia fomai, a mea o le

agaga lena o lea e moomia e faatoatele mai le aufaigaluega aua o le tele o lima e mama ai le avega.

Sa faapena foi ona faailoa mai i saunoaga a sui usufono, ia vans foi ia na faaaoga i a tatou taalogna na faaaoga i le misela. Mo lo outou silafia ma o lo o ou tatalo pea i le Atua ia to mai le pule e ala i le Komiti filifilia ua tuu i ai talosaga, ua leva ona taatia le talosaga, na uma loa le vaiaso muamua ou vili mai ia Loau, Loau faamolemole se i tau mai lava po o le a le mea o le a tupu i taavale? Fai mai e ave loa sau tusi talosaga. Faafetai lava i le Pule o le Treasury, na ona uma lava ou vili loa i le afioga ia Leasiosio, faamolemole pe mafai ona ou savalivali atu. Ia ae tali mai, o lea o le a ou alu atu. Aua e te sau o lea o le a ou alu atu. E ese le faigofie, faigofie pe a fesootai, tuitui, vave ia ona faatino ia le tatou galuega.

Ia o lea la ua taatia nei, na ou talosaga mo se 10 vans, ina ia tofu falemai i nuu i tua ma Savaii, ma se taavale. A ou tomanatu i le Paketi foi na... toeitiiti lava a leai se sui usufono na agai mai i le falemai e le i talosagaina ni ambulances. Ia ou te leilpa po o afea ona o le faasoasoaina o tatou tupe ae se i fai ai ia lenei taimi, aemaise ia lau afioga ma le mamalu o le Maota, galuega tetele lea o le a faaaoga ai vans nei, o atu i totonu o aoga, o i komiti, o i falemai i nuu i tua, feaveai ai vailaau, ua moomia tele ia taavale nei mo le auaunaga o lo o faapena ona maea tapena fuafuaga.

O le avatu foi i tua o services, ou te iloa o le a matua minimise ai ia faitioga i i i le falemai tele lea. O le a le toe tumutumu mai foi, ma o lata molimau na o ta ola mai la ita o ta vaai o o atu ia vans, o atu ia teine fomai, tasii atu pusa o vailaau, ia tulou lou gutu ma le afi, avatu ma first aid kits i na aso, vaipou mumu ma le viole sa faapena ona treat ai i tua tamaiti ma o ifo fua pepe, fai tui puipui, savalivali ifo nai toeaiina ma nai loomatua, faalogo i mea tiga panadol ma mea faapena, ia ae ou te talitonu, o le taunuuga lena, o le toe soifua maloloina o Samoa pe a outou foi i le mea na outou soifua ma matou ola mai ai i lena taimi.

O le tele o fuafuaga e fia maua ia le tamaoaiga le tupe ma mea uma e moomia, mo le faatinoina e ae loa aoga, amata le galuega lea. Ma ou te tatalo atu i ai tatou uma lava lea e i totonu o le Maota, e faapena ona tatou savalivali i o tatou falemai i totonu o tatou itumalo ma ia faapena ona lipoti mai. Ia o au ia e leai ni appointments e fai i sou Ofisa, a tuitui atu lava, vili mai le teine la e i i le afioga ia Pai ma Lafai, afio mai i totonu.

E ese le manaia o lea mea o lou faamalamalama lelei o se tagata e sulu atu. O lou Ofisa, o le tele o tagata e tumu atu, aso uma. E o atu faapea lava nai tagata a ta Minisita ona o ta pule lea, i mea nei o gasegase e ave i fafo. Faamolemole o Pai ma Lafai o le a, ia ona ta saofai lea i lalo, oi talofa e, malo lava onosai, ia vaai, e i ai ia le tatou process e tatau ona follow. E i ai ia le tatou faiga faavae e tatau ona mulimilitai. Ae e sau ina alu i uta, o lea o le a ou telefoni atu i le Ofisa Sili, e le faia e le Ofisa o le Minisita ni submissions. E ave i luga o le Kapaneta mo le ioega a le Kapaneta, ae alu i uta e vaai le fomai, fomai e fai lana lipoti, e alagatatau ona ave le mai i

fafo, tuu i totonu o le Komiti o le Overseas treatment, a iloilo iloilo ua satisfy ia le lipoti a le fomai, ua tatau ona ave i fafo i lona tulaga e le mafai ona faia i inei le togafitiga, tapena mai loa ma le PK, ina ua maea ona aumai ia le faamaoniga mai Niu Sila, i le toeaina lea o Papalii Benjamin, lea e vaaia ia le tatou scheme, I have approved ia Faaulusau Rosa, e sau i le appointment i le aso fia, tau mai ma le address, o le process lena ma le faiga faavae.

E i ai foi isi toatele e tumutumu ai lou Ofisa i le tele o aso ma le tele o aso, o lo o talosaga mai lea faapea, o la na o e tafafao na sau le uso ma lona toalua sue mai ni ana mea o fia maua mai i Niu Sila ma tafao atu ai ia si toeaina ma si loomatua po o ai lava. A la ua i le falemai. Ia o la ua fai ia faatinoga ona na oso ai i o le mai. Ae aumai se pili, e i ai le isi pili na aumai talu ai, e \$107,000 tupe Niu Sila, treatments. Ona ou faamalulu lea maumau e pe ana mafai e lo ta paoa ona fesoasoani atu.

A ou tago nei e fai le tusi e ave mo se approval a le Kapaneta, na o le mea e otegia ai au ma lau lou faavasivasi, ona e le o ma le faiga faavae o le Malo ua faataatia. So ia au la ma le faatinoga o mea uma tatou te galulue ai, se o le lelei o le tatou fesootai, lelei o le tatou faamalamalama, ona le tumu atu lea o tagata e faalavelave ia oe, ona alu ai lea o lou taimi, ae le faia ia le tatou galuega lea na totofi ai tatou, e tatou te o e tulei ma unai. E leai sou taimi e te vaai ai i le aufaigaluega po o faapena ona mulimilitai i mea uma ia na tatou plan e fai, ia ma faatino fuafuaga e pei ona faataatia.

Ne i umi sau faamatalaga, o lea sa i ai sui usufono sa... te i ou alu ae toe tu mai se isi e le i tali atua lana mataupu... Ia lea sa fautua mai isi i le falemai lea i Saanapu. Ia o lea ua faamau o lea foi e faafogafoga mai ia le Matagaluega o le Ofisa Sili ma le Pulega, ia se i tilotilo ma tulimatai, tilotilo i le ata, pe fetau ma ni tupe o i ai, faigofie lava ona ou ioe atu, toe faaopoopo ni isi potu se 2 pe 3. Ae fuafua lava i le seleni o lo o i ai i totonu ia ma le ata ua maea pasia e fai ai ia ni mea faapena. Ia ua lava ia lea talanoa, faafetai tele i le faafogafoga mai, atonu ua malamalama ia galuega, fuafuaga Samoa e, ia lava papale mai, ina ia aumai ia le tou faamanuia...

Tofa Hon Fonotoe Nuafesili Pierre Lauofo (Anoamaa Sisifo): Lau afioga i le Fofoga Fetalai, si vaega lea e tasi, sa le fia faalavelave i le saunoaga matagofie a le afioga i le Minisita, o lea sa tuu se i saausi lava se i uma.

FOFOGA FETALAI: Malo saunoa lau afioga, Anoamaa Sisifo.

Tofa Hon Fonotoe Nuafesili Pierre Lauofo: O si vaega lava lea laitiitifaamolemole sa afea i totonu o lau folasaga, foi lea i se tulaga i se tatou lipoti. O ai se fuafuaga o le tatou Matagaluega e tuuina mai se lipoti i le tatou Maota i galuega sa faatino e tusa ai foi ma lea faalavelave, e le o se mea fou o le mea masani, pe a tuanai ia ni faalavelave foi lea faalenatura. E

aofia ai uma lava, po o a ia ni galuega sa faatino, o fesoasoani sa maua mai, ia e le gata foi i vailaau sa fesoasoani mai ai ia nai atunu po o tatou paaga mai fafo, ia e faapea foi ia nai teams ia o fomai faapitoa sa fesoasoani mai ia ma isi mea uma ia ina ia i ai se record o ia faamaumauga ina ia taofia mo faamaumauga mo le tatou Fono Faitulafono. E pau lava lea o se fesili ma le agaga faaaloalo.

FOFOGA FETALAI: Malo faafetai, tulai mai le Minisita.

Afioga Hon FAIMALOTOA KIKA IEMAIMA STOWERS: Faafetai mo le faafesili a le sui usufono mamalu. O lea foi sa ou faamauina, o ananafi sa ou faataatia ai i luga o le Kapaneta ia le lipoti, faatali i se latou silasila ma se fautuaga e toe aumai, faatali foi se lipoti mai le Treasury.

Ia o mea uma sa maua mai, o meaalofa foi ia sa aumai sa aoga i le falemai, ua maea ona faatotogaina ai ia falemai e le gata i le tatou falemai tele, ae faapena ona sa ou asiiasi uma, faasafua le tufa, ina ia aua ne i faapito i lea falemai o le itumalo, ae ia laugatasia, o moega uma la ua lelei, tufa atu ia ieafu ma tagaaluga mea uma faapena Savaii sa ou taamilo ma matou taamilo ai ma le isi vaega o le aufaigaluega, e faapena ona faatotogaina ia le falemai i Tuasivi.

O fomai faapitoa e pei ona ou fai atu oka se lisi lea e i i, i totonu o nei mau tusi lea ou te saofai ai. O le tele ia o le lisi a ou tago e amata ona lau atu ia ae o la ua i ai ia le lipoti i totonu o le Kapaneta, ma le agaga faaaloalo.

FOFOGA FETALAI: Malo faafetai, ia ma ua oo mai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau afioga i le Fofoga Fetalai, o lea sa ou vaai o lea sa aumai i totonu o le Tala o le Tupe ia le vaega lea na maua i le taimi lena. Ae o lea sa ou taua, sa manatu o lea sa faafogafoga mai ia, lea ua i totonu o le Kapaneta ia le lipoti, o le la o le a vaai ai le Kapaneta, ona aumai ai lea i totonu i i. E masani foi le sui usufono sa i totonu o le Kapaneta i mea faapea.

FOFOGA FETALAI: Ia o lea ua faafogafoga le Palemene i le saunoaga a le afioga i le Taitai o le Malo, ma sa taua ai foi o ni isi foi o fesoasoani sa i totonu o le Tala o le Tupe lea e pei ona talanoaina. Ia manino lea tulaga o se taimi ona oo mai lea i le Palemene.

Tulai mai lau afioga i le Minisita o Faatoaga, Vaomatua ma Faigafaiva.

Tofa Hon LOPAOO NATANIELU MUA (Minisita mo Faatoaga ma Faigafaiva): Faafetai i lau afioga e na o sina faasaoga lava o le Minisita o Faatoaga ma Faigafaiva faamolemole e le o ia te au ia le vaomatua.

O le itu uma lava e tau i tua o le kegi a matou. O lea o le a faapuupuu atu le faafetai ona e puupuu le tatou taimi.

Ia e faatalofa atu i lau afioga i le Fofoga Fetalai, ia e faapea foi ona faatalofa atu i Taitaifono o Komiti taitasi o le tatou Maota ia faapena foi ia sui usufono o le Maota o le itu. Ia e faapea foi ona faatalofa atu i lau Susuga i le Failautusi o le Fono, ia faapea foi ia le Ofisa o le tatou Palemene. Ia e fia faatalofa atu foi i lo tatou atunu, i le paia i Tama ma Aiga, Aiga ma Tama, le usuga a Pule ma Tumua, Aiga i le Tai ma le Vaa o Fonoti.

Ia e faatalofa atu foi i le aufaigaluega paia a le Atua, o lo o faanono manu, faafaletuluia ma faafalele malu i so o se afioaga aua le talaiina ma le folafolaina o le afioga a le Atua i nuu taitasi o le tatou atunu.

E le umi sau faamatalaga, e na o le toalima lava latou sa afea ia le Matagaluega o Faatoaga, ae o lea o le a tali atu outou ia.... o le mea moni e le o ni fesili. E le o ni manaoga foi e na ona pei e faamataosi mai faapena outou finagalo, ae o lea o le a tali atu i le fuaiupu e tasi.

Taatia maia o lea o le a galulue i ai le Matagaluega. Na tou saunoa mai loa ananafi, galulue loa le Matagaluega i mea sa outou finagalo i ai, seivagana ai ia le sui usufono mai Vaimauga Sasae lea ua uma ona tali atu ananafi i manaoga ma finagalo sa faapea ona faaalia.

Ae lau afioga i le Fofoga Fetalai, se i faia lenei taimi se i fai sau faamatalaga i lo matou itumalo, leaga o la e faafogofa mai, ae ua uma ona ou tali atu i le Maota.

Ou te faatalofa atu i le paia maualuga o le matou itumalo, o Vaisigano Nu.1, le afio o le Tapau ma le Gafa, Safune ma Taulauniu, le afio o le Aloalii ia Vaai ia faapea aiga ia faapena foi ia si ou afioaga i Auala, Tapu ma Lealiifano ma le afio o le Toalima, ia faapea le maliu mai o Safune. Ia ae faapena foi ia si ou nuu o Asau, le paia ia Aiga ma Salafai, Susu mai Tufuga, afio mai Masoe ma le Falefa o Usoalii. Ia faapea foi le Faatualalua faapea ia Siufanua. Malo le tapuai malo foi le onosai, malo i la outou galuega ma la outou tatalo aua ia manuia a le Atua i galuega a lo outou sui usufono. Na ona faapuupuu atu ia ni o tatou faamoemoega, sa faapea ona lafo mai o lea ua maea ia le auala i Auala i le amataga o le 2018. Ua maea foi ona faatino ia le galuega o le vai faafetai i le afioga i le Minisita o Galuega ma le Ofisa o le Matagaluega o le Vai, i le faatinoina o na galuega sa outou faia i le toe suia atoa o le tatou laina, faapena foi le faatinoina o le vai lea sa amata mai Sataua lea ua inu ai lo tatou se vaega o le tatou itumalo i se vai magalo ae o le faamoemoe mo auala galue ua i ai nei ua uma ona feiloai ma le afioga i le Minisita o Galuega ia le auala i Vaisala, ia o se taimi o lo o faatalatalanoa pea ia le galuega i Utuloa, ia ma le vai o le pitonuu o Ogala i Asau, ia ae o lea sa tali lelei mai le talosaga na faia e lo outou sui usufono i le afioga i le Minisita, aemaise lava i le Minisita o Galuega ma le Ofisa o le Vai lea na maua ai le faamama avega, i le tau o le vai i Asau ia o le talosaga a tatou ae aafia ai Vaisigano Nu.2 le na laki ai

tatou lea na faaititia ai le pili o vai, o le tatou itumalo. Faafetai tele lava i lau afioga Papalii, e taua fua lou suafa o se tuli ua vale, ae tele le lagolago ma le fesosoani sa fai e le matou Matagaluega, ia o le galuega foi lena a le Kapaneta.

FOFOGA FETALAI: E na ona ou fesoasoani atu o le mea lena e i le vailiu lava o le Kapaneta. Ia faauma mai le saunoaga.

Tofa Hon LOPAOO NATANIELU MUA: O le galuega a lo tatou Matagaluega, o lo o faia ia... e ala la ona le lelei ni manatu mo le Ofisa o Faatoaga ma le Faigafaiva leaga tou te le o ia sui usufono o le Maota i o latou itumalo ma vaavaai i faatoaga la e fai. Ia ae ui i lea, ia o lea ua uma. Ia lau Susuga i le Pule Sili ma le Matagaluega o Faatoaga le Pulega ma le aufaigaluega, fai pea le tou galuega na e fai, faafetai. Ma le faaaloalo, ia manuia le tatou aso.

FOFOGA FETALAI: Malo faafetai, ia see mai i le Minisita o Galuega Tetele a le Malo.

Susuga Hon PAPALIITELE NIKO LEE HANG: Ia e faafetai atu i lau afioga i le Fofoga o le Fono mo le avanoa. Ia ae mua ona ou faatalou ma ou faatalofa atu i le pau o le Maota o Samoa o sasao nei. Le afio o lau afioga i le Fofoga Fatalai, afio o lau afioga i le Palemia, afioga i le Sui Palemia, ae faapea le paia ma le mamalu o Minisita o le Kapaneta, ia o lea foi e faavailolo mai ia Minisita Lagolago, ia tainane foi ia lena itu o le vai, afioga i Taitaifono o Komiti Faa-palemene, ia manatu o lena itu ua avea ma sui mamalu o Komiti taitasi.

Ia e fia faatalofa foi i le Failautusi o le Fono ma lau Matagaluega, aemaise foi ia le tapuaiga a Faauluuluga o Matagaluega ma Faalapototoga a le Malo, o molimauina ia le tatou fonotaga i lenei aso.

Ia e fia oo foi ia se faatalofa ia Samoa o tapuaia ia le tatou galuega, mai ona ao seia paia ona iu, aetainane ia le auositaulaga, le aufaigaluega paia a le Atua, o lo o nono manu ma faafalelemalu i nuu ma afioaga i fata fataulaga e fia o lo o talosagaina ia le tatou galuega, aemaise foi ia lo tatou atunuua aua se manuia.

Ia e le galo foi ona faatalofa ma faamanuia i le itumalo o le itumalo o le Nofoa Tu Taulaga i Sasae. E moni o lea o le a sui i le Vaimauga, ia ae talitonu faatoa faaaaoga le Vaimauga pe a aulia le faiga palota i le 2021. Ia faatalofa atu ma faatalou atu, tou sa ma outou faigata, paia faale-ekalesia, paia faale-malo paia faale-atunu, manatu ua uma ona paepae i ni isi foi saunoaga sausaunoa i ai ia isi sui usufono mamalu o le Palemene. Ia ma e le toe oo i ai ia sau faamatalaga. Ae o le a nuunuu atu faatini o tausala.

Ia lau afioga i le fofoga fetalai, o le tele lava o saunoaga a sui usufono mamalu sa molimoli mai ia le faafetai i le Matagaluega, aemaise Ofisa Sili

o Pulega aua e manatu e tatau pea ona ave le faafetai i e e talafeagai ai le faafetai. O le faafetai la i au Matagaluega ma Pulega o Faalapotopotoga lea sa i lalo o le vaavaaiga a le Minisita o Galuega Tetele, o tou afioga e tatau ai le faafetai lea. O outou lava sa faatinoina galuega, sa outou talia foi ia ni fautuaga, na avatu e le Minisita e auala mai i le Kabeneta mo le faatinoga uma o galuega ia e molimoli mai le faafetai i sui usufono mamalu o le Palemene, ae viia lava le Atua i mea uma. Lau Afioga o le tele foi o saunoaga ma manaoga, o mea masani lava ia, a talanoa le Tala o le Tupe, o mataupu lava ia e lagalaga mai ai finagalo o sui usufono mamalu e pei o auala galue, o le suavai taumafa, o moli auala, o taligalu, ia o patupatu o le auala, o mea uma lava na. Ae faafetai o lea lava e soifua le afioga ia taatiamai. O taatiamai la lea ou te fai atu ai, e i ai lona faaumi. O le afioga ia taatiamai faagaoioi ma faatino, ae le o le taatiamai foi lele faapula se i pula... A o le tulaga lena, taatia mai outou manaoga ma tou talosaga ma tou fautuaga o lea ua ou faamauina uma lava i lau api lea. O lea foi e faafogoa mai le pulega o le faalapotopotoga e aafia i a tou talosaga, ou te talitonu o la e ua faamauina uma lava a outou talosaga. O lea la e i ai le fuafuaga a vave lava ona pasia le tatou Tala o le Tupe ua gaoioi foi le pulega uma ma matagaluega lea e i lalo o le ma vaavaaiga ma le Susuga ia Seiuli, o le a gasolo loa e asiiasi tou talosaga ma fai le priority listing foi lea, aua e i ai foi faiga criterias ia e fuafua i ai galuega e muamua ma galuega e mulimuli. E faatino uma lava, ae pau le mea o se faasologa foi lele e prioritize ai le faagasologa o galuega, ona o le mea moni lava lau Afioga i le Fofoga Fetalai, ua tele tele galuega ae laitiiti le tupe, ae o le a fai fuafua atu lava. O le faamoemoe ina ia tele a tatou galuega e fai i le tatou tausaga mulimuli ina ia faamalieina uma finagalo o tou afioga i sui usufono mamalu. A ua le au lava le faasologa i se faipule, ia tautuana ia toe foi uma mai i le faiga palota ona toe tulituliloa foi lea o tou mataupu ia. A o le a taumafai lava matagaluega ma pulega ia e aumai tou talosaga e taumafai e faatino i se tulaga e gata ai le faatinoga.

Lau Afioga i le Fofoga Fetalai, e i ai lava la nai manatu ia po o ni mataupu sa laga mai i saunoaga a sui usufono na ona ou pai i ai ae pei ona ou fai atu, o lea ua faamauina uma lava. Sa laga mai e sui usufono mamalu mea ia o speed cameras, peitai ane o lea ua ave le vaega lea o le traffic a le LTA i le Matagaluega o Leoleo lea e Minisita ai le Afioga i le Palemia, atonu e maua mai se faamatalaga i le tapenaga.... o le taua ia o mea ia o speed cameras, ma e sao ua tele faafitauli ma faalavelave i luga o aualatetele, e mafua mai i le saoasaoa tele o taavale ona ua lelei tele a tatou taavale. O le tulaga lea, ou te fautuaina foi le Matagaluega o Leoleo se i tagai ane i tatou speed cameras foi nei e faapipii atu lava seia tau i le malae vaalele. Ia o isi mataupu ia ou te fia talanoa atu i ai, aemaise lava le tele o finagalo sa faaalia i se tatou vaa lea mo Salafai, e pei ona ou faamatalaina i le tatou Tala o le Tupe talu ai, e i ai le tapenaga ia ua fai e le Komiti Faatonu ma le pulega e tapena ai se vaa e faalua ai tatou vaa ia aua le

faaaogaina e le mamalu o le atunu o afifio ma papaaao i Puleono i Salafai. O lea la e i ai le... e fuafua ai se vaa foi lele e tele atu mo le mamalu o le pasese faapea foi le avanoa mo taavale ae toe saoasaoa foi. O lea la e i ai le faamoemoe o le a tapena mai e le Komiti Faatonu ma le pulega o le kamupani vaa ona matou savalivali foi lea i le afioga i le Palemia e ave i ai se proposal, ia ma tapena i auala masani e ave i le CDC aua foi se finagalo o le komiti CDC ona mafai lea ona faagaoioi se tapenaga mo se vaa fou. A o le faamoemoe ia taunu mai lea vaa a o le i aulia le faiga palota tele o le 2021. Sa saunoa foi se isi sui mo se vaa talafeagai i le taimi louloua o le tau. E na ona ou faamalulu atu i le sui usufono mamalu, e fiu tatou e sue i le lalolagi se vaa faapea e le maua, leaga e ave lava le faamuamua i le saogalemu. Po o le a le tulaga faapea e lelei le vaa, ae a louloua loa le tau, e i ai lava le faamatalaga foi lele, e sili le puipuia i lo le togafitia. Ma le isi, e pei ona ou fai atu, ailoga e maua i kamupani fauvaa nei ituiga vaa. Masalo o se vaa maulu, submarine. Sa toe faamanatu mai foi la le tulaga lea e se sui usufono mamalu i se vaa faaopoopo o lea ua ou talanoa atu i le fuafuaga a le pulega o le kamupani vaa ina ia toe maua mai se isi vaa e lua ai tatou vaa o le Lady Samoa III.

Saunoa foi se sui usufono mamalu i fees ia e toe faaopoopo pe a le oo lau faigamalaga. E talafeagai foi lea tau faaopoopo ona o lea foi e fai e le kamupnai vaalele le tulaga lea, a sui se aso o lau faigamalaga, e i ai mea o penalties charges, ae peitai ane e sao lava o le le faaaogaina o lou avanoa ua misi ai le avanoa o le tagata lea sa faamoemoe e malaga i le malaga lea. A o lea ua faamau le fautuaga, e i ai lava lou manatu foi lele se i toe teuteu le tulaga lea lea ou te faapea a faailoa atu i le tasi o le aso a o le i faia lau faigamalaga po o le lua foi o aso ona le totogia lea o sau... A o le mea foi lele o le a e malaga ae le i avatua se faaaliga, e tatau la ona totogi lau fee lea lea ona e le i suia lau booking i le taimi e tatau ona sui ai, ae se i tuu atu pea i le pulega pe talia lau fautuaga aua o lau fautuaga lena ina ia taumafai pe tasi lua aso ua faaali atu i le kamupani vaa o oe lea ua sui le aso e te faimalagaai, ona faapena lea ona fetuunai. A o le tau foi la lea e matau aua e \$29 pe \$19, ia taatia mai foi le fautuaga e a pe a tuu i lalo i le \$15. Ua talafeagai foi lea \$15. Ae ona o le saunoaga faapea ua tele tupe o le vaa, ua tele polofiti, ae aua ne i galo ia tatou, o le 50pasene o le polofiti lea a le vaa e ave e totogi ai dividends lea e faagaoioi ai le tala ole tupe lea e faatino ai galuega lea tou te finagalo i ai. Ma se isivaega o le polofiti lea e teu faavaitaimi aua la se suiga o se tatou vaa pei o le vaa lea ou te talanoa atu i ai. Ia o lea ua saunoa se isi sui usufono faapea e fai ni tatou airpoints. Ia taatiamai o lea o le a silasila foi i ai le Komiti Faatonu, o le vaa e taugofie ae vagana la le VIP aua e \$30, ou te iloa na o le pasese lena o le a accumulate ni travelers point ina ia faaaoga ai foi lea fautuaga, ae taatiamai.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, lea ina o se mea mo se faasaoga o tatou faamaumauga, e le o toe 50 pasene le dividend, o lea ua 35, mo le faasaoga o tatou faamaumauga. Ma lou faaaloalo.

Susuga Hon PAPALIITELE NIKO LEE HANG: E sao le saunoaga a le sui usufono mamalu o lea ou te talanoa atu i le taimi ua tuanai sa 50% a o lea ua sui i le 35%. O lona uiga, o le a laitiiti foi la se tupe e tuu atu i le tatou tala o le tupe ma le atoa ai foi ni tupe e fuafuaina e fai ai tatou galuega. Ae sao le saunoaga e le o toe 50, o lea ou te Talanoa atu i taimi ua tuanai, pe o le tausaga lea na tea na sui ai i le 35%. Faafetai foi i le Minisita o le Faalapotopotoga ua ae se finagalo e toe... ia o le a avatu uma la polofiti a Corporations a o a mea a faagaoioi ai a latou galuega? Faafetai o lea ua tuutuu i lalo le sao o corporations i lea foi tulaga taua aua le fesoasoani i tatou tupe maua.

Sa saunoa se sui usufono i le galuega lea i le Maliolio faapea ua tuai, a o le faamoemoe e tatala nei e le i oo ia Iuni. E i ai mafuaaga tatau sa toe taofia ai ona e alu atu le asiasiga a le Kabeneta o lo o i ai ni mea o faaletonu. O lea la ua toe talosaga i le LTA ma le konekarate e toe aumai se variation ona o la e lava e i ai le tupe o le poloketi lea e faaaoga la mo ni suiga faapea, a o le tulaga lena o le tatou Maliolio.

Sa saunoa foi se sui usufono i le tapunia lea o le malae vaalele i Fagalii. Ia ua uma foi ona faaalia i faasalalauga faalauaitele a le Malo i le mataupu ia ma mafuaaga tatau ua tatau ai ona tapunia lea malae vaalele. Ona o lea e le o saofai mai i i le sui usufono lea sa saunoa i le mataupu lea, a o le tulaga lena e faamalulu atu ua tautuaupega lou tatalo mai i le mataupu lea a ua uma ona fai le faaiuga a le Kabeneta. Ma e talitonu e le toe fefoifoiai i tua ni faaiuga a le Kabeneta ua uma ona fai.

Ia, masalo o nai mataupu ia e ese mai ai i mataupu masani, o lea ua ou taumafai e tali atu ai, ae a i ai nisi mea e le i talia, tatou toe fetaui i le ti ona toe faamanatu mai lea. Lau Afioga i le Fofoga Fetalai, masalo ua maea i i se tali atu foi i manaoga ma finagalo sa faaalia e sui usufono mamalu aemaise o a outou fautuaga ia ua talia fautuaga aua foi la le sologa lelei ma le agai i luma o galuega faatino a pulega ma Matagaluega lea e i lalo i le vaavaaiga a le Minisita o Galuega. Ae toe momoli atu le faafetai i a outou afioga i Ofisa Sili o Pulega o Matagaluega po o Faalapotopotoga lea e i lalo o le vaaiiga a le Minisita o Galuega, E ese le taua o le tou foi sao, faafetai foi mo le usitaia foi o faatonuga ma fautuaga e auala mai i le kabeneta lea sa faatino ai le faiga o outou galuega. Ma o le taiala foi la lea mo le tausaga mulimuli lenei, a faapea o lena tou te faafogafoga mai, ia faatele atili le alu i le atoa, aua le tatosoa foi tatou galuega leaga o le a uma le matou paeaiga ae onosai mai e topetope mai tatou galuega ia o lea pasia atu e le kabeneta ma faatino. E pei ona ou fai atu, o le taatiamai a tatou e

taatiamai ma faagaoioi ma faatino ae le o se tulaga e taatiamai ma nofonofo ai pea tatou.

Lau Afioga i le Fofoga Fetalai, o se faamatalaga lea e tali atu ai foi i saunoaga a sui usufono o le tatou Palemene. E momoli atu foi le faafetai i le Afioga i le Palemia ma le Kapaneta, ma le matou galuega e faifaatasi, e lagolago lava le isi Minisita i le isi Minisita ina ia tino ma vave ona faatino galuega a o le i maea le tatou Paeaiga. Ma le faaaloalo lava faafetai.

FOFOGA FETALAI: Malo. Ma ou te tapa lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ua ou toe tilotilo atu i le Maota nei pei ua tauau ina agai tele ia taatiamai ona ua fai si vaivai. O le matou nuu e sau ai le tamaloa e igoa ia Fiaai. E pei lava la e masani ai na o matou ae tau faalemasani le Maota nei. O lea la a ou tilotilo atu i le vaega lea e totoe, o le isi vaega pito lauga uumi lea e totoe, ua ou tu atu ai e toe fai le lafo teuteu, e i ai foi le agaga o lo o taumafai le Kapaneta e tali maeaea finagalo o le Maota nei, ma e le tatau ona tulitamoea le tatou maota nei. O lea ou te faatu le lafo, *Ina ia tolopoina taualumaga o le Fono Aoao pe a uma le sunoaga lea o le a sosoo ai nei ona faaauau ai lea i le aso a taeao le tatou fonotaga.*

Ou te lagona e tatau ona faamaea taeao le tatou galuega. Ae le o le tulitamoe i le afiafi nei. A uma le saunoaga lea ona tatou malolo ai lea, saili malosi mo le aso a taeao. O le teuteuga lena o le lafo po o le lafo teuteu lea, mo le faamaoniga e le tatou Maota.

Faaluaina e le Minisita mo Tina ma Tamaitai, Atinae o Nuu ma Afioaga ma Agafesootai ma le Minisita mo Tagata Tafafao Maimoa mai Fafo.

FOFOGA FETALAI: O le lafo ina ia maea le saunoaga a le Afioga a le Minisita o le a sosoo nei, le Minisita o le Faalapotopotoga o Tagata Tafafao maimoa mai fafo. Ona tolopo lea o le tatou Fonotaga seia aulia le itula e 9:00 i le taeao a taeao. Saili malosi le Kapaneta, aemaise foi taitai o le atunu, aemaise foi o le tapuai faafogafoga mai o i latou o Ofisa Sili o Pulega o Matagaluega ma Faalapotoptoga a le Malo ma le tapuaiga a Samoa.

Na faamaonia le lafo.

FOFOGA FETALAI: Ma lou faaaloalo ou te tapa le Minisita o le Faalapotopotoga o Tagata Tafafao Maimoa mai Fafo.

Afioga Hon SALA FATA PINATI (Minisita mo Tagata Tafafao Maimoa Mai Fafo): Ou te faatalofa atu i lau Afioga i le Fofoga Fetalai,

faapea foi le Maota nei, le afio o lau afioga i le Palemia sui Palemia le Kapaneta, Minisita lagolago faapena lena itu o le malu. A outou afioga i sui mamalu o le Palemene a Samoa. O Ofisa Sili o Pulega o Matagaluega eseese o lo o tatou molimauina lenei aso. Faafetai, e agalelei pea le Atua. Ua molimoli mai lo outou soifua i lenei aso. Ua tatou molimauina le agalelei o le Atua i foliga vaia ua i ai le fesiisiitai o le soifuaga, i tulaga eseese aemaise o faamanuiaga o lo o faapena ona molimau i ai le atunuu aemaise Samoa atoa. E lua ni sui sa faapea ona afea lenei Matagaluega, ae ou te talitonu, o le galuega lenei o le turisi, o le matafaoi lea a i tatou uma lava o le Maota. Aua o le galuega patino ia Samoa. O ai lava le sui ua tofia, o le tatou lea galuega o le tatou galulue faatasi, aua se manuia o le lumana i o lo tatou atunuu.

O le faamoemoega autu lava ia tele e e tafafao mai ma o latou maimoaina le matagofie o Samoa. E le gata i fale o lo o faapea ona latou faia le auaunaga ae faapea foi i matafaga, aemaise o itumalo eseese, faapea i alalafaga, o lo o i ai nofoaga faapitoa mo le tausiga o ia matafaoi. Na saunoa se tasi o sui mai Palauli, e agai tonu le saunoaga i le faamoemo, i mataaga i Palauli. Ae e le faigofie foi, ona e i ai le faitau ua talosaga mai i se taavale. O lea foi na avatu se lagona ma se vaivaiga, o le matafaoi lava lea a i tatou uma, sui mamalu uma o le Palemene a Samoa. O tatou uma lava e tofu ma lagona, afai nei ae faapito augafa se talosaga pe ave se taavale, mo le talosaga a Palauli. A faafefea Falealii, faafefea ia Safata, faafefea ia Anoamaa, o lena. E ao foi ona tatou fua, ia faapena ona **costable** ia le tausiga o tatou mea totino, ina ia sii le isi ae taitai le isi. E i ai lava le talitonuga o le matafaoi a le Malo ia tutusa pau uma lava lana tusiga. Ou te fia laga foi le mataupu e pei ona aumai e si ou uso ia Tafua, e tusa ai ma se fale ua faapena, ua maea ona faataunuina le gaosia o le fale, ae paga lea, o le suavai lava. O le faafitauli lea o lo o tulai mai. Ma o lo o galulue ai ia Matagaluega o le suavai e faaola ia lea vaega o le motu i Sasae, aua le faaaogaina o ia fale le taua mo i latou o lo o faapena ona autovaa mai i nuu mamao e fia maimoa ia Samoa ma lona matagofi. O le tulaga e pei ona i ai,..

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau afioga i le Fofoga Fetalai, e na ona pau lava lea o si mea... E taua tele le atinae lea a le Vaega lea o latou e asiasi maimoa mai. Lea e i ai a tatou faleui ia se i tulou, o lo o tu vava i Upolu, o lo o tuuina atu foi faapea Savaii. Ae tatou te iloa lelei, o mea nei o tagata asiasi maimoa mai, e le faapea e toatele i latou e manaomia le services lea, e ono tuliloa faletalimalo. O la ou te matau o la e i ai faailo e faasino ai i fale ia. Ae o le agaga sa faatu ai, e tulata i se aiga, e o ane latou e teuteu faalelei ma faaaoga foi e latou. O lona uiga la, e le faapea o tutu fale nei e le o faaaogaina. Ae o le mafuaaga lena na ala ai ona faatu fale ia, ia i ai se aiga latou te vaaia. O lona uiga ua maua fua ai lava

ma le fale lea e faaaoga e latou. Ou te iloa la, e faalesao le faasilasilaga lea sa fai i le aso ananafi. Sa ou fia tu atu, ae ou manatu o le a avea le taimi lenei e faailoa ai. E le faapea foi na o turisi. E aofia ai foi ma i tatou uma. O le mea la lea e tatau ona silafia aloaia, afai e le o iloa e le Maota lea, lau Afioga i le Minisita, faatonu le Ofisa Sili o lau M atagaluega ina ia fai se faiga ina ia lau silafia e le atunu e feafioai. E oo foi la i faipule ma minisita ma CEOs e feoai, ia o latou iloa lelei fale ia, aua e le matagofie i faipule, pe o tatou foi e femalagaai. O lo o i ai fale ia, o fale nei e faaaoga e tagata feoai, e le na o turisi la, ae mo tatou uma. Ma o se taumafaiga lena a le Matagaluega lea, o lea e lelei le agaga na ala ai ona fai. Ae ou te lagona e le o lelei ona faailo, ma le itu la lea, ia faamamafa i le aiga o lo o vaaia, e na o le pau lava lena o le latou sao, o le o ifo e teuteu lelei. Aua o fale a ia, o fale o latou. E mafai ona latou faaaogaina i taimi uma. E i ai le isi nuu na ou faalogo na tupu ai le mea lena, o le manatu foi lele, aua le vaaia e le aiga lea, ae alu ane se isi, e i ai le manatu foi lele e alu ane se faletua o le alii sili o le nuu e vaaai, e le malamalama. O le mea la lea, e faafefea ona alu ane le faletua o le alii sili e sau mai o...e mamao le mea e sau ai, e sau i i e teu. E pei e i ai se agaga foi lele, e i ai ni tupe e avatu. A o le mea lena e faaaoga e le aiga e tusa o le latou lava fale, e ui foi i ai latou, ae o le faamoemoe e faaaoga tele e le atunu e femalagaai. O le fesoasoani atu lena ia manino atoa ai, o fale nei na fausia faapitoa, e le gata i le aiga lea e vaaia o le latou sao lena o le latou vaaia, ae faaaoga tele foi e le atunu e feafioai.

FOFOGA FETALAI: Manino lea vaega, saunoa mai lau afioga i le Minisita.

Afioga Hon SALA FATA PINATI: O lea la na ona fia faafetai lava i le saunoaga matagofie a le Palemia. O lea na taua i le taimi ua fano, o le galuega lenei o le galuega patino lava ia i tatou ma nei o sui mamalu o le Palemene o Samoa. O le matafaioi lea a tatou na ala ai ona tofia i tatou, o le vaaai o meatotino a le atunu. A o le faamoemoe foi, e le o lava foi fale ia lea e taua e pei ona i ai le saunoaga a le Palemia. O ai lava se sui usufono o moomia lea auauanga, e tatala lava le avanoa. E pei lava na ou fai atu. O Samoa ia o tatou vaaia, ia o atu tagata ma avatu le tala e matautia le tumama ma le lelei o le vaaia o meatotino. Aua o le mea moni lava, iaae ou te le fai atu, o lenei lava mea o le manao mai o le **call of major**, ae o lo o e i le auala. E te alu lava e saili se mea..o nei aso, o lea ua uma ona tapena e le Malo ia ia fale. Ou te faafetai ai i le Palemia, aua o le **initiative** nei mea uma, e afua mai i le Palemia. O lo o i ai le saina lea na faamatai i Lepa po o Falevao ia Toilet. O le mea moni lea, e le o ni upu e vane ai. Amuia foi lea Saina ia ua faaigoa ia Toilet. E le o se igoa leaga ia Toilet, aua a igoa ia Toilet ua faapea o tama sasao na.

FOFOG FETALAI: E le i lavea le vaega lea i lau saunoaga.

Afioga Fuimaono Teo Samuelu: O si mea e fia faamalamalama mo faamaumauga. Masalo e le o le suafa matai sao lena, ao le suafa matai sao na faaee o Tuifalevao. E ese la ma le igoa palagi lea ua....mo faamaumauga ma le faaaloalo.

Afioga Hon SALA FATA PINATI: Lau afioga i le Fofoga fetalai, o le aitu lava o le moomu. O toilet a o Tuitoilet lena. O lea e fai mai nei Falealili, e moni a uso. O le matafaioi la lea e pei ona taua, ia vaai lelei meatotino nei. Ma o le a faapena foi ona faalauiola i nuu taitasi. O la e i ai sign tetele lava i Falealili i Togitoniga, o lo o i ai le faleletaua i ina po o le toilet e ui i ai turisi atoa ma le atunuua atoa. Ae i ai le faaletonu lena e i ai. O le faaletonu o tatou tagata, e le o lelei ona vaai e o tatou tagata meatotino, e faasino tonu ia i tatou lava. Se o le mitamitaga tele ia te au, o lo ta alu atu e faaaoga a o la e mama, lelei ona vaai. Ou te le taua le itu lea i sisifo, i le agai i tua, na aumai le talosaga i ni faleletaua aua ni....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le tulaga lava ia, e puupuu le mataupu, e faigofie ona vaai. E pau lava le mea o le faatonu o lau Ofisa Sili o Pulega, ia taitasi aso o le vaiaso ma alu e taamilo. O lana galuega lena e fai o le vaai o mea ia. O lea ua tele le tatou polokalame lea ua fai mo le faaleleia o faleui, i o i faletetele o le malo. E tatau la ona alu faapitoa ia e vaai ae aua le tuulafoaia i le vaega lea e i lalo. O le fautuaga lena lau afioga.

FOFOGA FETALAI: Ia malo, see ese mai loa le Minisita mai lea vaega.

Afioga Hon SALA FATA PINATI: Faafetai i le afioga i le Palemia, o le a faapena ona fai, aua o le mea moni o au lea ou te alu e vaai. Se o i e iloa ai ia o tatou tofi. O le maualalo o mea e te alu i ai o le tautaua foi lena o le tagata na te faia galuega e le manaomia e se isi e o e faatino, ae e iloa ai lou tagata. Aua foi o le matafaioi a tatou, tuu o tatou mamalu ma paia na e.... aveese. E leiloa ai tatou, ae iloa tatou ia tatou galuega faatino.

E talanoa tagata ia te oe i mea e te faia, ae e le talanoa i ni au mea e faapea e tele ni au mea, o a tupe? E le o tupe e fai ai le olaga nei. O le va feagai ai ma le va fealoaloai.

A lea e saunoa le Palemia fai mai Alo foi lea, se o le ataata lava. Service with a smile. O le tulaga na e te i ai? Ia o le tulaga e pei ona i ai ua lelei o le a faatino uma ia vaega.

Ae e momoli atu lau faafetai i Faauluuluga o Matagaluega o lo o i lalo o lau vaaiga. O le STEC, o la ua pack ia le matou talo. O le container

muamua lava lea a le STEC. O le faamoemoe lava ina ia mafai ona auina atu mo maketi i fafo, faafetai o le faailo lea o le container a matou lea ua alu.

Na faafuasei ona tatagi le faailoilo mo faalavelave faafuasei ma o lea na tuua ai loa le Maota Fono e le mamalu o sui usufono na auai, ae agai ese loa mai le Maota mo puipuiga o le saogalemu.

Na tolopo Taualumaga a le Fono Aoao Faitulafono i le itula e 2:20 i le aoauli seia aulia le itula e 9:00 i le taeao o le Aso Faraile 24 Ianuari 2020.